

УЗБЕК
ХАЛК
ИЖОДИ

Авазнинг арази



ҚўП ТОМЛИК

достонлар

«ТОШКЕНТ» БАДИИ АДАБИЕТ НАШРИЕТИ 1965



Айтувчи
БЕКМУРОД ЖУРАБОЙ ҮФЛИ
Езив олиб, нашрга тайёрловчи
М. И. АФЗАЛОВ
Муҳаррир:
МУҲАММАДНОДИР САИДОВ

Г ўрўғидан энди сухан бошлайлик,
Хозир бошқа сўзни йигиб ташлайлик,
Туркман, ўзбек, кавказ әлнинг ботири
Сифатин айтмоққа бунинг шошмайик.

Ул ўткан сўнг неча йиллар ўтибди,
Ҳар бир жойга унинг таърифи кетибди,
Ботирликда камлиги йўқ Гўрўғли,
Қўхиқоғга унинг донги етибди.

Қайга бориб айтсанг уни билади,
Неча шоир уни айтиб юради,
Чамбил дейди унинг ўсган жойини,
Овозаси кунботишдан келади.

Вақтисинда бўлиб ўтди арслон,
Тўрт бурчи дунёман юриб танишган,
Қанча душман бўлса ҳазар қилмаган,
Ҳовасакка душман билан олишган.

Гувлатган вақтинда Чамбил қалъасин,
Кўрса қўрққан душман кўзин оласин.
Тўлибой синчи дер экан отасин,
Ҳилолой дер экан туққан онасин.

Асли гўр ичинда туғилиб чиқсан,
Одам кўрса неча кун гўрга биқсан.
Етти ёшда чиқиб таниб тоғасин,
Ўн беш ёшда душман ўпкасин сиқсан.

Йигирмада бошига давлат қурган
Туркманинг элига бошлаб хон бўлган,
Кўриб неча унинг қилган ишини,
Ишидан ҳамманинг кўнгли тўлган.

Таърифин айтган билан адo бўлmas,
Ботирликда бундай одам ўтмаган.
Бошдан-оёқ унинг қилган ишини,
Кечакундуз ёзиб битса тугамас.

Бир умрича душман билан чайқашган,
Нечаман чайқашган отин айтмасдан,
Айтган билан соб бўлмайди сифати,
То ўлгунча душман билан айқашган.

Ер юзида қўймай қўргон шаҳрини,
Душманларга доим тўккан заҳрини.
Икки боласи ҳам қирқ йигит
Олиб берган ҳаммасига парини.

Нечовлари юзга чиқмай ўтгандир,
Неча йил орадан ҳозир ўтгандир,
Эшитамиз қулоқ билан, кўрмадик,
Олтмиш тўрт достон қиб таъриф битгандир.

Шу ҳам дейишади қўйган битолмай,
Аниқ айтиб таърифига етолмай,
Неча бор хуфя бўлган сўзларин,
Ташлаб кетган ўхшар баён этолмай.

Жойин айтар тоф бошида кўргон деб,
Айтиб бўлmas дейди, уни ўлган деб.
Агар шоир бўлиб айтса таърифин,
Ҳозир ҳам айтади ҳозир бўлгин деб.

Қани соз нима дейди, созанда нима дейди, мақом билан
сўз нима дейди. Кўз билан кўргандай қулоқ билан эшит-
гандай, тимсол билан келтириб айтадиган биз, тинглайди-
ган сиз. Қандай қилиб айтамиз сўз маъносига тушиб¹
тингласангиз...

¹ Тушуб — тушуниб.

Чамбил Чамбил бўлганда, Чамбил обод бўлганда, қирқ йигитнинг еғани қандай билан новвот бўлганда ва қандай Чамбил эди: олтмиш ошхонали Чамбил, етмиш жевахонали Чамбил, сақсон сардобали Чамбил, тўқсон тўпхонали Чамбил, оқ дарвозали Чамбил ва кўк дарвозали Чамбил, ер юзига овозвали Чамбил. Кўк дарвозадан келган киши Ҳасан кўлбар, қирқ йигит, Гўрўғли султон, Аваҳон ва яна Ҳасанхонга борган. Оқ дарвозадан келган киши Юнус пари, Мисқол пари, Гулнор парига борган. Туркман әлида Чамбил белида Гўрўғли султон ўтди. Қасд қилганини бошига етди. Бир умри душманнинг изига тушди. Сув ўрнига шароб ичди, қиз ўрнига пари қучди.

Гўрўғли Гўрўғли бўлган замонда, бошқалардан кўп аскар қилган әмас. Ўзининг туркман халқига қирқ йигит солган. Шунда Гўрўғли султон ўзининг шу қирқ йигитига қиласидиган раҳбарлигини, берадиган инъомини эълон қилиб айтди:

Қулоқ солинг халойиқлар сўзима,
Мақсадингни кўрсатарман кўзингга.
Эълон қилдим, айтиб сўзим халқима,
Хонимиз деб бўйин сунсанг ўзима.

Яна сизларга маслаҳат соларман,
Талабим бор ҳар бир жойга борарман.
Бошқа хондай мен кўп аскар қилмайман,
Қирқ йигит туркман әлимдан оларман.

Мен қиларман ҳар бир ишни ҳавасда,
Банданинг фикри бекор абасди!
Қирқ йигит оларман туркман әлимдан
Бу ишим ҳам сизга мажбур әмасди.

Ўз әлимни жонкуяр деб биларман,
Ўз юртим деб, Исфахондан келарман,
Мажбур қилиб мен олмасман қирқ йигит,
Раҳбарлигим аввал эълон қиларман.

Ичимда кетмасин алам-ҳасратим,
Мен билмасман на эканин қисматим.
Ҳар ким қилар бўлса менинг хизматим,
Мен берарман кўнглидаги мақсадин.

Келса қирқ йигитни олиб келарман,
Хар мингидан бирин хоҳлаб оларман.
Жони дилман агар қилса хизматим,
Ман унинг муддаосин берарман.

Хоҳлаган отини мен миндиарман,
Раҳбарлигим уларга билдиарман.
Қиласа менинг жони дилдан хизматим,
Хоҳлаган тўнларини кийдиарман.

Сув ўрнига шароблар ичдиарман,
Ғазо куни қирмизи қон кечдиарман.
Чин ихлосман қиласа менинг хизматим,
Қиз ўрнига парилар қучдиарман.

Зарбини душманга бориб ўткарса,
Ҳар ерда душманга зиён еткарса,
Шундай йигит менга бугун керактир,
Топширган хизматларимни биткарса.

Хизмат қилиб тиндири маса жонимни,
Душмандан олмаса отам қонини,
Осон деманг Гўрўғлининг бу ишин,
Текин деманг Гўрўғлининг нонини.

Жой-жойингда аҳволига қарамас,
Қўрқоқ, нокас ҳеч майдонга боролмас.
Мажбур қилиб олган билан ҳар кимни,
Етаклаган този овга ярамас.

Алқисса, буни деб Гўрўғли султон сўзларини халққа
эълон қилди ва ўзиға қарашли элга бу сўз ҳақиқий овоза
бўлди. Бўни эшитиб Чамбил қальбаси одам билан тўлди.
Шунинг ичидан Гўрўғли султон зўрлигини, ботирлигини,
ниятининг тўғрилигини, кўнглигини очиқлигини синааб қў-
риб, қирқ йигитни айириб олди. Қирқ йигит қаторда бўл-
масак, бошқа хизматининг бизга кераги йўқ, деган кишилар
қайтиб кетдилар. Қирқ йигит қаторида бўлмасак, бошқа
хизматларида туармиз деган кишилар ошпазлиқ, новвой-
лик, паррошлиқ ва қушбандлик, сайислик, дарвозабонлик
ишларида қолди.

Гўрўғлининг овозаси оламга кетган, кўп жойлар таъ-
рифини эшитган, бошқа миллатлардан ҳам хизматини қил-

моқ учун одамлар келган. Шунда Қанхордан¹— Тўлаб,
Манғитдан — Бўлак, Саройдан — Салингир, Жалойир-
дан — Ертибой оқсоқол.

Гўрўғли Эрам бодидан, ёш кунида Юнус билан Мис-
қолни олиб келаётганда, Ҳасан кўлбар уч кунлик болаэди.
Асли Зангининг боласи эди. Қўлбала қилиб, Гўрўғли ўз
қўлида сақлаб, вояга етказган эди. Ҳасан кўлбарнинг бўй-
лари минордай бўлди, қўллари чинордай бўлди. Узини
манман дейди, ҳар еганида овқатига тўрт ботмон талқон
еиди. Уни от кўтаролмади, тия ҳам кўтаролмади, фил ҳам
кўтаролмади, бу эса томоққа тўймайди. Гўрўғли кечакун-
дуз шунинг боқимини ўйлади. Бир ёққа талаб қилиб у йўл
тортса:— Эй, Ҳасан кўлбар, ётасанми,— деб келса, пиёда
мен гўрга бораманми, дейишини қўймайди. Ахири бир куни
Гўрўғли султон ўрдага кириб Юнус билан Мисқолга мас-
лаҳат солди.— Шу Ҳасан кўлбарни не қилмоқ керак?—
Юнус билан Мисқол айтди:— Узингиз биласиз.

Гўрўғли:

— Мен ҳамма нарсани билсан ҳам, шу Ҳасан кўлбарга
дар қолдим.

Шунда Юнус билан Мисқол:— Сиз топмаган бўлса-
нгиз Ҳасан кўлбарнинг иложини биз топамиш.

Кўхиқоффдан бир девнинг отига исми жоду ўқиди, илми
жоду билан девни Чамбилга келтириди. Ҳасан кўлбарга
девни олти қулоч оқ эшак қилиб берди. Бир чинорни йиқи-
тиб олтмиш газ калтак қилиб берди, қирқ газ узанги эш-
дириб олди. Икки бошини боғлаб оёғига солди. Бу ҳам
калтароқ бўлиб қолди. Гўрўғли султоннинг дунёда ўзидан
бўлган фарзанди йўқ эди. Ваянгандан Ҳасанни олиб кел-
ди. Гуржистондан² Авазхонни олиб келди. Аваз отасиминг
номини Булдуру қассоб дер эди. Онасиning отини Гулойим
дер эди. Уни Гўрўғли етти ёшида олиб келди. Авазхонни
қиёматли фарзандим деб Юнус билан Мисқол пари қўли-
га берди. Улар Авазхонни етти йил ичкаридан ташқарига
чиқармасдан илми сеҳргарлик ва жодугарликни таълим
берди. Қирқ йигит Авазхонни Гўрўғли олиб келди, деб
эшитган, ўзини қўрган эмас... Қанхордан Тўлаб ботир ҳам
келган. Гўрўғлига хизмат қиламан деб, Гўрўғлининг қили-
чини бир чопай деб келган эмас, Авазхонга ошиқ бўлиб
келган. Тўлаб ботир эртаю кеч Авазхонни бир кўрсам

¹ Қандаҳор.

² Эпик достонларда тез-тез уировчи жой исми.

дэйди. Ҳеч бир юл билан Авазхонни кўролмади, охири бир кун қирқ йигит сұхбат қилиб ўтиридалар.— Эй, қирқ йигит, менинг кўнглимда бир мақсадим бор, шуни ман сизларга айтмоқчиман. Шунда қирқ йигит: Айт,— деди. Тўлаб ботир қирқ йигитга қараб бир сўз деб тургани:

Азалдан не экан билмам қисматим,
Бунда келиб қилдик султон хизматин.
Кеча-кундуз биз юармиз Чамбила,
Қилиб султоннинг тузиин-иззатин.

Гўрўғлиниң хизматинда юармиз,
Кеча-кундуз биз олдинда туармиз.
Қайтармасмиз Гўрўғлиниң сўзини,
Хизматинда танда жонни берармиз.

Нима деса айтганига кўнармиз.
Гўрўғлидан нима роҳат кўрармиз.
Қайтармасмиз ҳаргиз айтган сўзини,
Ул деса майдонда бориб ўлармиз.

Қулоқ солинг Тўлаб арзи додига,
Қойилман Гўрўғли сиёсатига.
Бошқа кўнглимдаги хизмат бўлмаса,
Ишқим йўқдир тўни билан отига.

Тўлаб ботир дэйди менинг ўзимни,
Охир бир кун душман ўяр кўзимни.
Бир муддао бордир менинг кўнглимда,
Айттолмасман мен кўнгилда сўзимни.

Бу дунёниң томошасин билсангиз,
Мақсад шул дунёда ўйнаб-кулсангиз,
Армонисиз бўб бу дунёдан ўтардим.
Бир айтган сўзимни қабул қиласангиз.

Бу сўзларни айтиб Тўлаб ботир тўхтади. Шунда қирқ йигит Тўлаб ботирга айтиб турган сўзи:

Сўзинг маъқул бўлса ҳамма кўнади;
Нафни, қандай сўзни ёмон кўради?
Агар новване бўлса, Тўлаб, сўзларинг,
Гўрўғли дер, бундай одам ўлади.

Айтгин, Тўлаб, сўзинг энди билайик,
Бу хизматга ҳар ким бўлмас илойик,
Нафи бўлса, Тўлаб, айтган сўзингдан,
Албатта ҳаммамиз қабул қилайик.

Бул айтган сўзингни нафи бўлмаса,
Сўзингдан одамлар кўнгли тўлмаса,
Бир бузуқлик сўзни айтиб сен, Тўлаб,
Сенинг учун шунча одам ўлмаса...

Бекорга бир фосиқ хаёл ўйлама;
Қулоқка ёқмаган сўзни сўйлама!
Важ бўлса тинглайлик, Тўлаб, сўзингни,
Гўрўғлиман лекин, Тўлаб, ўйнама!

Зарбидан титрайди ҳар ерда қалмоқ,
Айб бўлар бир бекор сўзман бормоқ;
Бекорга бўлган йўқ, Гўрўғли султон,
Ҳеччи унга одам бошини олмоқ.

Хоҳлаган отимиз бўлса, минармиз,
Кўнглимиз кўтариб ўйнаб-кулармиз;
Хоҳлаган тўнимиз олиб бож кийиб,
Гўрўғли султонга хизмат қиласмиз.

Гўрўғлиниң хизматинда туармиз,
Агар ёниб турса ўтга уармиз.
То жондан кечмасанг жонона йўқдир,
Ботир ном кўтариб даврон сурармиз...

Гул очилмай боққа булбуллар қўнмас,
Ўлмай одам кўнгли дунёдан тўлмас.
Шамол куни овоз зое кетади,
Бедарак айтганман ул сўзинг бўлмас.

Тўдага солмоқчи бўлсанг ўзингни,
Аввал очиб қара, Тўлаб, кўзингни.
Ўйлаб юрган бўлсанг кўнглингда бир сўз,
Қани айтгин эшитайик сўзингни.

Алқисса, Тўлаб ботир бу сўзни қирқ йигитдан эшигиб:— Эй қирқ йигит, бу минган тулларни, бу кийган тўнларни, сен даври-даврон демагин! Мен бир сўз айтайн, бу

кўрганларинг, бу даврон сурдим деганларинг унга шогирда ҳам бўлмайди. Шунда туриб қирқ йигитдан бири:— Қани Тўлаб, айт, әшитайик, бул сўзингни мазаси борга ўхшайди,— деди. Тўлаб ботир:— Гўрўғлиниг Авазхон деган боласини ҳали кўрдингларми,— деди. Қирқ йигитдан бири айтди:— Кўрганимиз йўқ. Тўлаб ботир:— Шуни кўрмаган бўлсанглар, бошқа кўрганларингни ҳаммаси бекор,— деди. Қирқ йигитдан бири:— Эй, Тўлаб, у Авазхонни кўрганда киши нима бўлади? Авазхон деганинг бир ёш ўғлон, уни кўрдик нима, кўрмадик нима?— деди. Тўлаб ботир:— Эй, дунёнинг томошасидан ва қизифидан қуриқ қолиб юрган бу жонсизларни; Гўрўғлиниг Авазхон деган боласини олсанглар, бир гулдор мәҳмонхонага борсанглар, суҳбатни қурсангиз, косагул қилиб Авазхонни қўлига қосани берсангиз, сойчироқ қилиб Авазхоннинг ҳусни-жамолини кўрсангиз, беҳиштнинг эшигидан қараб тургандай бўласиз,— деди. Қирқ йигитнинг бири:— Эй, Тўлаб ботир, сенинг ажалинг етган экан, кунинг битган экан, дунёда одам қуригандек Гўрўғли билан ўйнашасанми?— деди. Шунда Тўлаб ботирнинг айтган сўзи:

Газо деса кечар әдинг жонингдан,
Олишарсан жон чиққунча танингдан.
Улиб кетсанг шу майдонда газода,
Қузғунлар тўяди сенинг қонингдан.

Ажал етса одам қочиб кетолмас,
Кўрқоқ киши хавфли ердан ўтолмас,
Қаерда бўлганинг ботир қирқ йигит,
Жондан кечмай эр мақсадга етолмас.

То ўлгунча югуарсан, чопарсан,
Ботир бўлсанг, майдонда жон сотарсан.
Таваккал деб кечсанг танда жонингдан,
Бекор кетмас мақсадингни топарсан.

Кўрқоқ кўнглига ҳақ сўзни олади,
Ўзи билмас умри ўтиб боради.
Унинг билан қўрқоқ мингга киролмас,
Дунё қизигидан қуруқ қолади.

Бул сўзима агар қулоқ солсангиз,
Авазхонни Гўрўғлидан олсангиз,

Қандай бўлар томошаси дунёнинг,
Бир мәҳмонхонага олиб борсангиз...

Бекорга жонларни қурбон қилсангиз,
Мард бўлсангиз сўзим назарга иласиз.
Бир куни олсанглар Аваз суҳбатин,
Сўнгра дунё қизигини биласиз.

Сизлар борманг, менинг ўзим борарман,
Сизларга бир маслаҳатни соларман.
Бир маъқул десанглар бўлар қирқ йигит,
Гўрўғлидан лекин ўзим оларман.

Бу сўзни қачон кўнглига олади,
Бошқа бир хаёлга султон боради.
Бу сўзим айтарман, султон билмайди,
Бекорга Авазни бериб қолади.

Алқисса, Тўлаб ботирдан бу сўзни эшитиб қирқ йигит:— Ҳа, майли, Тўлаб,— деб рози бўлди. Сўнгра Тўлаб ботир туриб қирқ йигитга айтди:— Ундай бўлса, сизлар саломга чиқманглар. Ҳар куни бир ўзим саломга борайин. Бир кун, икки кун кўзига кўринимагандан кейин, «Қирқ йигит нега келмади?»— деб Гўрўғли мендан сўрайди, сўнгра сўз очилади. Шу ерда Гўрўғлиниг бўйнига қўйиб, Авазни сўраб оламан,— деди. Қирқ йигит:— Ҳа, майли,— деди. Кунига қирқ йигит Гўрўғлиниг олдига саломга келарди. Энди Тўлаб ботирнинг бир ўзи келди. Бир кун, икки кун Гўрўғли бу ҳолни сўрамади. Учинчи куни борган вақтда Тўлаб ботирдан Гўрўғли сўради:— Бугун уч кун бўлди, қирқ йигит саломга келмайди. Бунга не сабаб? Минган отидан камлик бўлдими? Е кийган тўнидан камлик бўлдими? Е ойлик моёнасини озсиниб юрибдими?! Шунда Гўрўғлига қараб Тўлаб ботир бир сўз деб турган ери:

Сўзимни эшиting, айтай султоним,
Танда жоним бўлсин, султон, қурбонинг.
Жони дилман хизматингиз қилурман,
Хизматингга фидо бўлсин бу жоним.

Сўрадингиз биздан савол найлайн,
Номуомила сўзни қандай сўзлайн?

Бу сўзларни бугун мендан сўрарсиз,
Бу сўзларни қандай баён айлайин?

Мусофираман, саломингга келурман,
Қирқ йигитнинг муддаосин билурман.
Айтмоққа қўрқаман, султон, қаҳрингдан,
Бир гап билан қандай баён қилурман?

Сизни деб келибман Қанхор шаҳримдан,
Душманлар титрайди сенинг заҳрингдан.
Қирқ йигитнинг муддаосин айтмоққа,
Мен қўрқарман, султон, сенинг қаҳрингдан.

Бу ишларга зиёдадир ҳасратим,
Қирқ йигитнинг мен билурман мақсадин;
Билган билан нечук баён қилурман?
Қаҳринг солсанг куяр жону жасадим.

Бир нечалар ҳавас бунда келмоққа,
Сиз сўрайсиз қирқ йигитни билмоққа.
Қандай қилиб улар сўзин айтарман?
Қўрқаман, султоним, баён қилмоққа.

Айтсам ўз бошимга ўзим етарман,
Бир оғзинг ўт, бир оғзинг сув, султоним.
Қаҳринг солсанг бекор ўлиб кетарман,
Сизни дедим, кечдим дунё-молимдан.

Хабар бермоққа қирқ йигит ҳолидан,
Бир оғзинг ўт, бир оғзинг сув, султоним.
Айтмоққа қўрқаман танда жонимдан.

Оласи кетмайди душман кўзидаи,
Гуноҳкор бўлмасин Тўлаб сўзидаи.
Алар сўзин қандай қилиб айтарман?
Зарур бўлса сўрарсиз-да ўзидаи.

Алқисса, Тўлаб ботир бу сўзларни айтиб, сўзнинг бу ёғини очмай тўхтади. Гўрўғли султон бу сўзнинг нима сўз эканини билмай, қирқ йигит отидан кўнгли тўлмай юрибдими ёки тўнидан кўнгли тўлмай юрибдими деб хаёлига келиб, Тўлаб ботирга қараб бир сўз деб тургани:

Эшиздим мен, қулоқ солиб сўзинига,
Еру осмон қоронидир қўзимга,
Қирқ йигитнинг нима бўлса мақсади,
Айтгин, Тўлаб, жавоб бердич ўзингга.

Қирқ йигитнинг мақсадини билайи,
Бул мартаба берган бизга худойим,
Қирқ йигитнинг айтгин, Тўлаб, мақсадин,
Кўлдан келса мақсадини қиласин!

Бу иш маънисини, султон, билмайди,
Уч кун бўлди саломимга келмайди,
Уч кун бўлди кўринмайди кўзимга,
Кўрмаган сўнг султон тоқат қилмайди.

Қирқ йигитим азаматим, эрларим,
Уларман ободдир Чамбил белларим,
Уч кун бўлди саломимга келмайди,
Жонкуярим, барча ёвмид элларим.

Кўзимга кўринмас тахту ободим,
Аваз, Ҳасан менинг учар қанотим.
Уч кун бўлди, қани йигитим, келмайди,
Кўрмаган кун менда йўқдир тоқатим.

Тарқатайин юракдаги ҳасратим,
Тилладан ясайин улар жасадин,
Не сабабдан уч кун бўлди келмайди.
Айтгил, Тўлаб, агар билсанг, мақсадин!

Қўрқма, Тўлаб, сўйлай бергил жонингдан,
Баён бергил қирқ йигитнинг ҳолидан!
Нима бўлса муддаосин берайин,
Айтгил, Тўлаб, кечдим сенинг қонингдан!

Нима деса сўзларига әрарман,
Елғиз келганингга раҳмим келарман.
Кечдим, Тўлаб, энди сенинг қонингдан,
Нима бўлса муддаосин берарман.

Гўрўғли султондан бу сўзни эшитиб, кўнгли хотиржам бўлиб, Тўлаб ботир ўлмаслигини билиб, Гўрўғлига қараб, қирқ йигитнинг устидан сўйлаб бир сўз деб тургани:

Кўрқиб әдим ёмон қаттиқ жонимдан,
Сиз хабар олдингиз гаріб ҳолидан.
Хизматингда энди ўлсам розиман,
Қуллуқ, султон, сиз кечдингиз қонимдан.

Ёмон одам ёмонлиги қолмайди,
Доно киши сўз маънисин англайди.
Қандай айтай қирқ йигитнинг сўзини?
Айтмоққа султоним, оғзим бормайди.

Сўрадингиз зарур бўлди нетарман,
Буни ҳам айтмасам ўлиб кетарман.
Эшитинг, султоним, тинглаб сўзимни,
Қирқ йигит мақсадин баён әтарман.

Бошимга тушганда бир қайғу туман,
Йўлингга қурбон бўлсин тандаги жон
Етти йил бўлди, келди Чамбилга,
Сизнинг бордир, фарзандингиз Авазхон.

Қирқ йигит дер ажал етса ўламиз,
Бизда бўлса Авазхондай тўрамиз...
Етти йил бўлди келди Чамбилга,
Дейди, тўрамизни қачон кўрамиз?

Кеча-кундуз доим хизматда бўлсак,
Кўрсатса, Авазнинг жамолин кўрсак...
Армонсиз бўб ўтар әдик жаҳондан,
Бир кўриб Авазни биз сўнгра ўлсак.

Авазхонни бир кун султондан олсак,
Тилло добил эгар қошига чолсак...
Худо берди бизлар бўлдик тўрали,
Салтанатман Ҳовдак қўлларга борсак...

Отлар чопиб Авазнинг хизматида,
Үрдак-сўналарга қушларни солсак...
Завқ билан шикор қилиб майдонда,
Хизматида ўрдак-сўналар олсак...

Кўрсатса, Авазнинг жамолин кўрсак,
Бир оқшом Авазман суҳбатни қурсак,

Косагул қилиб биз Аваз тўрани,
Қўлларига дейди, косани берсак...

Хизматига доим жондин кечармиз,
Кафан тўнин бизлар танга бичармиз.
Бир оқшом берса Авазни суҳбатга,
Қўлларидан, дейди, шароб ичармиз.

Бермаса Авазни бунда нетармиз?!
Бу тожу — тахтинг баҳридан ўтармиз.
Бир оқшом бермаса Авазни бизга,
Нимамиз бор, бу Чамбилдан кетармиз.

Боғларнинг ободи очилган гулдир,
Олмайди берганман у дунё пулни.
Ана эшитсангиз айтдим мақсадин,
Қирқ йигит мақсади кўнглида шулдир.

Алқисса, Тўлаб ботир сўзни тамом этти. Гўрўғли султон Тўлаб ботирдан бу сўзни эшитиб нима қиларини билмай қолди. Чопиб ташлайин деса «қонингдан кечдим» деган. Бермайман деса, кўнглида нима мақсади бўлса, берраман, деб оғзидан чиқкан. Гўрўғли султон номи бор. Бир сўз икки бўлишига қўймайди. Шунда Тўлаб ботирга қараб бир сўз деб тургани:

Аввал бадкорда бўп Қанхордан бездинг,
Юз минг армон билан бағримни эздинг.
Қирқ йигитдан чиқмас эди бу ишлар,
Наслинг бузиқ эди, Чамбилни буздинг.

Ғанимга бостирдинг менинг изимни,
Қора қилдинг, Тўлаб ботир юзимни.
Сандан рози бўлдим энди ман, Тўлаб,
Хўб оқладинг менинг берган тузимни.

Мен билмай юрган әканман ғанимни,
Сен куйдирдинг, Тўлаб ботир, жонимни.
Нодонлигим етар бўлди бошимга,
Берибман билмай ҳар кимга ионни.

Юрагимга солдинг дарди аламни,
Кунда ёғиз келиб бердинг саломни.

Шунча йилдан бери единг тузимни,
Ахир ҳавас қилдинг, Тўлаб, боламни.

Йиглаб келиб менинг ақлимни олдинг,
Кунда сенин кўриб ҳайратда қолдим.
Қойил бўлдим, Тўлаб, мен шумлигингга;
Ахир қоронғи кун бошимга солдинг.

Оласи кетмади сенинг кўзингдан,
Англамай олдиридим, Тўлаб, сўзимни.
Қирқ йигитдан чиқмас эди бу ишлар,
Бу шумликлар бўлди, Тўлаб, ўзингдан.

Аввалбошдан буни Гўрўғли билмади;
Буэуқ сўз ҳеч хаёлига келмади.
Кечиб шу сабабдан Тўлаб қонидан,
Кўрқоқ Тўлаб-ку деб кўзга илмади.

Аввал билсам тандин бошинг кесардим,
Бошинг кесиб, қонинг сувдай ичардим.
От-тўнинг олиб ҳайдаб Чамбидан,
Ўлдирмасам ё баҳрингдан кечардим.

Мунгайганинг кўриб раҳмим келарман,
Англамайин бир сўзингта эрирман.
Муддаоси бўлса, онинг Аваҳон,
Сўзим икки бўлмас боргил, берарман.

Ғазаб билан тўлиб юзига боқди,
Тўлабнинг бағрига ўтларни ёқди.
Чидаёлмай Гўрўғли ҳайбатига,
Деди, Тўлаб:— Энди феълимдан топдим.

Султон кўзи миљтиқ ўқидай тегди;
Гўёки Тўлабнинг ич-бағри куйди,
Чидаёлмай Гўрўғли ҳайбатига.

Тиллари боғланиб ақлидан шошди,
Алами Тўлабнинг ҳаддидан ошди.
Пушаймон қиб Тўлаб қилган ишига,
Ранги ўчиб яна қонлари қочди.

Алқисса, Гўрўғли султон туриб ўрдага кетди. Тўлаб
ботир ҳам йиқила-сурила қирқ йигитнинг қошига етди.
Қирқ йигит: «Нима бўлди?» деб сўраса:

— Ҳеч нарса,— деб Тўлаб сўйлай олмайди. Тиллари
бойланиб, пешонаси тақрайиб, қуёндай икки кўзи бақра-
йиб, қуруқ бир чиқмаган жони қолибди. Тўлабни бир со-
атдан кейин ақли ўзига келиб «Уҳ» деб қирқ йигитга қа-
раб бир сўз деб тургани:

Чиқмай базўр қолди энди танда жон,
Ҳайбат билан қараб эди у султон,
Англамас эканман шундай юрганда,
Бўлмас энди қилган билан пушаймон.

Ҳар кун саломга борганда кўрардим,
Ҳайбатин англамай қайтиб келаардим,
Яна бир боққанда қайтиб юзимга,
Аниқ, лекин келолмайин ўлардим.

Аваҳонни лекин сутондан олдим,
Биларман, бошимни балога солдим.
Қачон бўлса энди султон ўлдирав,
Қутулмасдан энди балога қолдим.

Бугун мен англадим: паймонам тўлди,
Сизлар учун энди гуноҳкор бўлдим.
Аваҳонга ҳавас қилмай кетайин,
Сизлар учун энди, қирқ йигит, ўлдим.

Буни деб Тўлаб ботир сўзини айтиб турсин. Энди сўз-
ни Гўрўғлидан кетирсан: Гўрўғли султон аста-аста ўрда-
га борди. Қайси ўйл билан бу сўзни Аваҳонга айтарини
билмай саргардон бўлиб қолди. Юнус билан Мисқолни
ёнига чақириб олди. Бошидан ўтган воқеани бирма-бир ба-
ён қилиб, буларга маслаҳат солди:

— Аваҳонни бошқа бир уйга олиб боринглар! Йў-
ғимда шу сўзларни айтиб қўйинглар. Аваҳон отамнинг
бир сўзи икки бўлмасин деса, шу ёқдан бўйнига олиб кел-
син. Менинг олдимга келиб икки сўз қилмасин. Агар
Аваҳон, «Отам мени қиёматлик фарзанд қилмоқ учун
олиб келганмикин, ё қирқ йигитга сийлов қиламан деб
олиб келганмикин» деса, сизлар эшигинлар, мен эшитма-
ёқ қўяйин. Бўлмас әкан, деб қўйинглар,— деди.

Шу билан Юнус билан Мисқол Аваҳонни олди. Бош-
қа бир уйга борди. Шунда онаси Юнус парининг Аваҳ-
онга қараб айтиб турган сўзи:

Бир сўзим бор айтай сенга Авазхон,
Онанг — оға Юнус, сенга меҳрибон.
Етти йил бўлиди келдинг қўлимга,
Отанг — дуогўйинг Гўрўғли султон.

То ўлгунча сени дуо қилайиқ.
Яхшилигинг, жоним болам, билайиқ
Зиёда азалда ул мартабанг,
Бу давлатга келиб бўлдинг илойиқ.

Келдинг бу Чамбила гетти ёшингда,
Кечакундуз бўлдинг менинг қошимда.
Ботирлик нисбати яна кўнглингда,
Гўрўғли давлати сёнинг бошингда.

Ишларинг ақла га тўғри келмайди,
Гўрўғлидан ҳеч одам кам қилмайди.
Эрнинг эрлигини ҳар ким билмаса,
Худойимнинг борлигини билмайди.

Лабим тишлаб, болам, бошим чайқарман,
Илож йўқдир, болам, энди қайтарма.
Зарур бўлди сенга айтмоққа бир сўз.
Энди болам, сенга бир сўз айтарман:

Бир хатолик ўтди отанг ўзидан,
Англамай олдириб қўйган сўзидан.
Ўтган ишга пушаймон суд¹ қилмайди.
Еш оқади бирдай отанг кўзидан.

Ўзи уялади сенга келмоққа,
Бу сўзларни сенга баён қилмоққа.
Эр ҳалқин кўнглида шумлик бўлмайди,
Кирқ йигитга мойил бўлти бермоққа.

Кирқ йигитни суҳбатига киравсиз,
Уларман бир оқшом суҳбат қуарсиз.
Отам сўзи икки бўлмас десанги,
Бир оқшом уларга шароб берарсиз.

Сизларга юради отанг суюниб,
Аваҳ деса туар әди у ёниб.

Бизларга айттириб ўзи ўлтирад,
Ўзи айтмоққа бу сўзини уялиб.

Алқисса, Авазхон онасидан бу сўзларни әшитиб, индамай қайтиб кетаверди. Гўрўғли султон олдига бориб, салом бериб, икки қўлини алифлом, бўйини хам қилиб, отасига боқиб бир сўз деб тургани:

Ассалому алайкум, келдим, отажон,
Бу ишлардан зарра еманг қайфу-ғам.
Ҳарна десанг, тарқ қиласмсан амрингни,
Хизматингдан бошин тортмас Авазхон.

Тирик борман қайтармасман сўзингни.
Қиёматли болам, дединг ўзимни.
Нима хизмат бўлса айтинг қиларман,
Қилсан деб ҳеч гумон қилма кўзингни!

Етти ёшда бунда келди Авазхон,
Отам бўлди сиздай Гўрўғли султон
Хизматингга лозим кўрган ўзимни,
Бир худойим бўлар менга меҳрибон.

Ҳуқм қилгай Аваздайин ўғлингни,
Керак әмас, олмам дунё пулингни.
Нима десанг тарқ этмасман амрингни,
Берай хизматинга жони-дилимни.

Юракда қолмасин алам-ҳасратим,
Куймасин бул учун жони-жасадим;
Қиёматли болам десанг Аваҳни,
Берасиз-да Авазхоннинг мақсадин.

Кирқ йигитнинг суҳбатига киравман.
Хаёлинин ани англаб кўярман.
Бузуқ бўлса агар улар хаёли,
Бирорини бирорига урарман.

Кирқ йигитман бугун суҳбат тузарман;
Хаёлинин англаб суҳбат тузарман.
Кўнглингга малол келмасин, отажон,
Ёмонининг тандан бошин узарман.

¹ Суд — фойда.

Қайтармайин мен борарман, сўзингни,
Хизматга буюрдинг Аваз қўзингни.
Ким әканим билдирамасам буларга,
Айланишиб қўймас экан ўзимни.

Бу сўзи әшитиб Гўрўғли султон:— Эй Авазхон, болам сени қирқ йигитга берганда қўл-оёғингни боғлаб бермайман, у ёғи ихтиёр ўзингда. Ҳар ким ёмон бўлса жазосини топмоғи керак,— деди. Шундай қилиб, Авазни қирқ йигит қўлига элтиб берди. Аваз қирқ йигитнинг суҳбатига кирди. Навбати билан қирқ йигитга шароб сузиб бериб турди. Қирқ йигит Авазхонни биринчи кўриб, ҳаммаси ҳусни жамолига қойил бўлиб, шаробни ичиб, бошлари қизиб, маст бўлиб, ярим оқшом бўлипти-ю, ярим соат ҳам бўлмагандай... Авазхонни ўйқу ғалаба қилди ва қирқ йигитнинг қайфи учиб, Авазхоннинг қўлидан кося қарс этиб ерга тушиб, бир-бирига суяниб, қирқ йигитлар йиқилиб қолди. Авазхон эшикдан чиқиб, кетмоқчи бўлди. Тўлаб ботир ўзига навбат келса шаробни ёқасидан қуийб ичмай ўтириб әди. Авазхон қарадики, суҳбат бузилди. Кетмоқчи бўлиб, эшикдан чиқиб тўғри юрди. Шунда Тўлаб ботир олдидан чиқиб:— Тўхтанг, тўрам,— деди. Авазхон:— Ҳа, нима мақсадинг бор?— деди. Тўлаб ботир:— Эй, Тўрам, отангиз Гака билан Евмиддан қирқ йигит олган, суҳбатда агар бирори қийшиқ ўтиrsa, шунинг бўйнига гуноҳ айб соглан әди. Бу йўл отангиздан қолган әди. Отангизни йўлига қараганда сиз гуноҳкор бўлдингиз. Бир нарса, гуноҳликни бўйнингизга олиб кетинг,— деди. Авазхон:— Мен бу ишларнинг тамоми — тартибини билмайман, бир нарса, сен айта қол,— деди. Шунда Тўлаб ботир, «икки юзингдан икки мучи берсанг, қандай бўлар экан»,— деб айтай-айтайин, деб ўйлади. Яна ўзича: «Икки муччини берсанг оламан, борди-ю, аччиғи келса, агар бутимдан ушлаб деворга бир урса, таппидай деворга тармашиб қоламан»,— ўйлаган билан Тўлаб ботир айта олмади. Тўлаб ботир Авазхонга қараб бир сўз деб тургани:

Эрлик шулдир ҳеч камликка қўнмасин,
Ботир йигит минг яшасин, ўлмасин!
Бу ўйлар интизом, тўрам, англасин,
Гуноҳкор қилди деб малол келмасин.

Хўнарли ҳар ерда чевар қўлидир,
Тўлаб ботир бу ҳам ҳақнинг қулидир.
Бу ишлар деганингиз бир интизом,
Отангизнинг ўзи соглан йўлидир.

Камчиликдир элда қатордан қолмоқ.
Гуноҳкорлик айб ҳар кимга солмоқ.
Гўрўғли овқати эса кам әмас.
Суҳбат интизоми, айб солиб олмоқ.

Ҳаркимам бош тортмай буни беради.
Бу суҳбатни юрган бари кўради,
Бугун сиздан олсам айб солиб,
Эрта ўзимизга навбат келади.

Отангизга буни айтиб берсангиз,
Отангизнинг бугун отин олсангиз,
Ҳам томоша қилиб қўлни, келарсиз.
Добил қоқиб қўлларга қуш солсангиз,

Тўққиз қатор ўрдак, сўна оларсиз,
Ўйнаб-кулиб кечга қайтиб келарсиз.
Қуш палов қиб бериб бу қирқ йигитга,
Яна бир оқшом суҳбатга киарсиз.

Алқисса, Тўлаб ботир буни айтиб қолди, ул куни тонг отди, эрталаб Авазхон отасининг олдига борди. Эшикдан салом бериб кирди. Авазхон хафа бўлиб мунгайиб турди. Гўрўғли султон Авазнинг хафалигини англаб, ғазаб устидага Авазга қараб бир сўз деб тургани:

Қўзларим тўрт бўлар сенинг йўлингга,
Душман айналдими согу сўлингга,
Ихтиёргинг бера бердим қўлингга,
Кўзимнинг равшани, қўзим, не бўлди?

Мунгайиб берарсан менга саломни,
Ким солди бошингга қайғу-аламни.
Ким озор бериби менинг боламга,
Кўзимнинг равшани, қўзим, не бўлди?

Гўрўғли бўп, давлат бошимга қўнди,
Сени кўриб юрагим ғамларга тўлди.

Не сабабдан, Аваз, рангинг сўлди?
Арслоним, жоним, қўзим, не бўлди?

Сенсан менинг бу Чамбилда ободим,
Биринг қўйруқ бўлсанг, биринг қанотим.
Сенсиз бўлмас бу жаҳонда тоқатим.
Юртимнинг ободи, қўзим, не бўлди?

Айтгин билай кўнглингдаги сўзингни,
Хафа қилма бекор, болам, ўзимни.
Қандай душман озор берди қўзимга,
Тахтимнинг эгаси қўзим не бўлди?

Ҳарна десанг мен қарапман раъйингга,
Шукур қиласай яратган худойимга,
Икковинг ўтарсан ўлсам жойимга.
Юртимнинг ободи, қўзим, не бўлди?

Мунғайиб келарсан, болам, қошимга,
Давлат қушимсан қўнган бошимга.
Етти ёшда душман билан олишдинг,
Энди кирдинг, қўзим, ўн тўрт ёшингга.

Бу ишларни кўп душманлар кўролмас,
Кўролмаган билан, қўзим, келолмас.
Мен бу ишда, ҳеч ким озор беролмас,
Чамбилинг ободи, қўзим, не бўлди?

Айтгин сўзинг, болам, энди билайин,
Каттароқ иш бўлса отга минайин,
Кўнглингдаги мақсадингни қиласайин.
Тахтимнинг ободи, қўзим, не бўлди?

Узоқ бўлса йўлларига тушайин.
Душман бўлса тандан бошин кесайин.
Бошин кесиб қонин сувдай ичайин,
Айтгин, қўзим, жоним Аваз, не бўлди?

Алқисса, буни деб Гўрўғли султон сўрагандан кейин,
Авазхоннинг отасига қараб берган жавоби:

Бир иш учун хафа бўлар, Авазхон,
Эр йигит бошидан кетмас қайғу-ғам.

Ким озор беради дейсиз Авазга,
Ўз ҳолимга хафа бўлдим, отажон.

Амрингиз тарқ этмай суҳбатга кирдим,
Косагул бўп орада турдим.
То яrim оқшомгача мен, отажон,
Тикка туриб қўлда шаробни бердим.

Яrim оқшом уйқу ғалаба қилди,
Тушди-да косаси қўлимдан синди.
Косани синдирган бўлар гуноҳкор,
Гуноҳкорлик, ота, бўйнимга минди.

Оting бўлса эрта миниб ол, деди,
Тилла добил әгарингга чол деди,
Тўққиз қатор ўрдак, сўна ўзима,
Кечкадан қолдирмай, эртадан ол деди.

Эрта кечга ани олиб кел деди,
Қирқ йигитга қуш палов қиб бер деди.
Гуноҳкорлик соқит бўлсин бўйнингдан,
Яна бир оқшом суҳбатга кир, деди.

Ундан бошқа, жоним ота, ишим йўқ,
Бу ишларга, жоним ота, ҳушим йўқ.
Бул айтган сўзларни қилиб келмоққа,
Остимда отиму, қўлда қушим йўқ.

Бир кўрар агар банда ўлмаса,
Бекор экан бошга давлат қўнмаса,
Ўз ҳолимга бугун хафа бўларман.
Остимда от, қўлда қушим бўлмаса.

Кимнинг отин бугун бориб оларман,
Кимнинг добилин әгарга чоларман,
Ўз юртим, ўз элим бўлмаса,
Кимнинг қўлларида добил чоларман?

Иложим йўқ энди қандай қиларман,
Мақсадимни яратгандан тиларман,
Қуруқ тўра бўлган билан ҳеч гап йўқ,
Ўз ҳолимга, жоним ота, йигларман.

Алқисса, буни Авазхондан әшиитиб, Гүрӯғли султон:—
Эй, болам Авазхон, бул ишлардан хафа бўлма, мен бирордан бир носазо сўз әшиитдим, деб кўнглимга келиб эди.
От билан қуш бўлса, унинг масаласи сағалдир. Шу ишни қилган ёдам, сени фарзандим деб қўлга олган киши, албатта сени аввалдан гамингни еб қўйгандир. Бу ишлар тўғри. Сұҳбатда гуноҳкор бўлишингга хафа бўлма. Ботир халқи, болам, жон олиб, жон берадиган жойда хафа бўлмайди. Сен бир гуноҳкорликка шундай хафа бўласанми?— деб Гүрӯғли султон Авазхоннинг кўнглини кўтариб, Авазхон хафа бўлибди, Фиротни әгарлаб келтириб берингиз, бир кўнглини кўтариб келсин, деб фармон берди. Сайисларнинг Фиротни әгарлаб келишининг баёни:

Кирқ йигит, Гүрӯғли суҳбатни кўрди,
Сайисларга қараб юзини бурди.
Гүрӯғли овози шу дам чиққандан,
«Лаббай» лаб сайислар хизматда турди.

Эгарлаб келтириб деб ул дам Фиротни,
Ҳукм қилиб шоҳ Гүрӯғли буюрди,
Амри подшо вожиб бўлар ҳадди йўқ,
Уч сайис баробар туриб югорди,

Таблахона ичра турган Кўк гирот
Фиротнинг ёнига сайислар кирди,
Тилла қашов гулдан әди жўроби,
Сайислар Фиротни танига урди.

Шоҳ Гүрӯғли замонида нор әди.
Майдонга киргандан аждаҳор әди,
Оқилойман, Худойберди боз соки
Бир Фиротни уч сайиси бор әди.

Уч сайис Фиротни ўртага олди,
Тилла қашов отнинг танига солди,
Не ишнинг бўлганин билмай Кўкфирот,
Бу ишга Кўкфирот ҳайронда қолди.

Бу ишнинг бўлганин Кўкфирот билди,
Симдай бўйинин эгиг юганга келди,
Бисмилло, деб энди ул дам сайислар,
Тилла юган отнинг бошига илди.

Кечакундуз ул сайис қараган,
Ёмон кунда әр кунига яраган,
Силаб-сийпаб тарбият қиб сайислар,
Қиз сочидаи қўйриқ ёлин тараган.

Ғазо куни майдон-майдон чопганди,
Ҳар ким минса мақсадини топганди,
Рост қаддини келтирмоққа Фиротни,
Ҳар боққанда олти ой бирдан боққанди.

Кўриб есин деб емини Кўкфирот,
Табласига қўш шамлар ёққанди,
Ишқивозлик қилиб отга Юнусман, Мисқол,
Манглайига тилла тумор таққанди.

Майдон кириб ўйнар бўлса Кўкфирот,
Душман қони селдай бўлиб оққанди,
Унга битган қарчигайнинг қиёғи,
Душманларга азоилдай сиёғи.

Қаттиқ ерда юрса қариш ботади,
Пўлатдан битганди онинг туёғи.
Чу деганда қарчигай қушга тенгди.
Кишмишдан берганди овқатман, емни.

Чотонидан юкли тая ўтгандай,
Мисли арабадай ўмрови кенгди(ρ).
Тилладан қилганди унга қозиқни,
Кишмишдан беради доим озиқни.

Кийикка ўхшайди Фиротнинг сони,
Ўмрови кенг анинг бағри ёзиқди,
Ўзи туси гулли бодом қизилди.
От қўйганда душман сафи бузилди.

Ўроқ манглай, ярим олчин қулоги,
Мисоли дутордек бўйини узинди.
Фирот билан Чамбил эли ободди,
Қарчигайдай унга берган қанотни,
Бисмилло, деб энди ул дам сайислар,
От белига солди баҳмал банотни.

Майдонларда қиласар әрлар әрликни,
Душманларга доим қилган шерликни.

Бисмилло, деб солди, энди сайислар,
Фиротнинг белига тилла терликни.

Ғазо кун майдонда учиб қўнади,
Узоқнинг хизмати шундай бўлади,
Силаб-сийпаб энди ул дам сайислар,
Яна солди икки тилла жўнани.

Ед этиб кўнглида парвардигорни.
Кўнглига келтирмай ҳақдин ўнгарди,
Бисмилло, деб солди Фирот белига,
Қоши ёқут, ўзи тилла әгарни.

Кўкғиротни юришлари майнди.
Юришига жами душман қойилди,
Бисмилло, деб тортди Фирот белига,
Ярашиқقا тилла туға айлни,

Бир умри душман изига тушганди.
Чу деганда қирқ газ зовдан учганди.
Бисмилло, деб тортди Фирот белига,
Тилла туға чигатоили пуштонди.

Кўкғиротнинг товушлари товурди,
Икки узанги, икки пуддан овурди!
Шилдирлатиб чочоқларин сайислар,
Ялтиратиб солди тилла довурди.

Ҳамма анжомини тахт қилиб олди,
Тилла ўмилдириқ ўмровга солди,
Уч қуббали ҳар бирори косадай
Кўрган одам буни ҳайрон бўп қолди.

Назаркарда думин кўтариб олди,
Ўн саккиз қуббали қуюшқон солди,
Кичкинаси катта эди таркашдан,
Анжомлаб Гўрўғли олдига борди.

Газначига султон юзини бурди.
Аваз, асбобин келтириб деб буюрди,

Тахт эди Авазнинг барча асбоби,
Қучоқлаб газначи дарров келтириди.

Қайтмаган эди Аваз гапидан,
Мақсадини тилар бир худойидан.
Келтирган асбобни кўриб Авазхон,
Е пири, деб Аваз турди жойидан.

Гўрўғлининг берган анжомин кўрди,
Ҳамма асбобини қўлига берди.
Совут, қалқон чоройна боз тилла тўн,
Келиб Аваз анинг устида турди.

Борганда Гўрўғли пари элига,
Ғазо қилган кирган майдон ерига.
Бир камар келтирган эди Эрамдан
Авазхон келса бойлар деб белига.

Ҳамма анжомини аввал шайлади,
Ул камарни яна белга бойлади.
Бисмилло, деб энди ул дам Авазхон,
Кўкғиротга қараб қадам тайлади¹.

Авазхон Фиротнинг ёнига борди,
Фиротнинг юганин қўлига олди,
Кўриб Авазхоннинг сиёсатини,
Қирқ йигит ҳаммаси ҳайронда қолди.

Кўрмай туриб аввал кўнгли тўлмади,
Гўрўғли нисбати буни қўдлади.
Ёв-яроқ тахт қилиб Аваз чиққан сўнг,
Гўрўғлидан бир зарра ками бўлмади.

Алқисса, Авазхон Фиротни ёнига бориб, пешанасини
силаб, узангига оёғини солиб, әгарнинг қошидан ушлаб
олиб, Фиротнинг белига миниб, тилла добилни әгарнинг
қошига чолди. Лочин қушни қўлига олди. Шикор қилиб
у кун Авазхон Ҳовдак қўлига борди. Кун шамол бўлиб
чонғит бўлди. Чонғит сертоб кўзни тутди, қоронғилик бўл-
ди. Авазхон добилни ҳам сололмади, кун кеч бўлди. Чам-
 билга қайтайин деса, Авазхон Чамбилнинг қаёқда экани-

¹ Ташлади.

¹ Оғирди.

ни билмади. Фироти синамол эмас. Фиротнинг борган ёғини - Аваҳон қабул қилмади. Аваҳоннинг ҳайдаган ёғига бу Фирот юрмади. Охири Аваҳон шу кун кўлнинг бошида қөлди. У кечя ётди, эрта билан тонг отди. Чонғит кўтарилиб, олам равшан бўлди. Аваҳон жойидан туриб, бир чилимга ҳәёли қочди. Тамаки бормикин деб киссасига қўл солди. Киссасидан тамаки топмай неча гапларни кўнглига олди. Ўгай ота ўгай она ўзингни кўрганда жоним дейди қўзим, дейди. Кўзинг пана бўлгандан кейин бир қалмоқ боласи-да, юрса юрибди, кетиб боярпти-да, биздан яхши жойни топса борсин дейди-да,— деб Аваҳоннинг кўнглига келиб, Фиротнинг белига миниб, баланд тепанинг бошига чиқди. Сўнгра ҳар ёққа қаради. Кўзига бир қора уй кўринди.— Шу кўринган уйларга борайин. Агар чилимкаш бўлса, шу ерда бир чилим чекиб, кайфимни чоқ қилиб, сўнгра келиб қуш солайин,— деди. Шу уйларга қараб юрди. Кун чиқар-чиқмас бориб уйларнинг ичига кирди. Кўрса чеккароқда бир уй якка турибди. Қигиз ўрнига баҳмалбанот ёпдирган, эшиклиарни тилла билан нуқрадан чопдирган, ҳар ким кўрса ақлини олган, кўрган одам ҳайрон қолган, шунча анжом уйда, албатта, бир чилим ҳам қилиб қўйгандир,— деб Аваҳон шу уйга қараб юрди. Эшик олдига бориб турди. Отдан энкайиб қаради. Уйнинг ичидаги тўлиб ётган қизларни кўрди. Қора уйнинг тўрида, каравотнинг устида бир қиз ухлаб ётибди. Қараса, кўрсанг кўргудай, жамолига қурбон бўлгудай, қизил олма олиб қўйнига илгудай, ҳар ким бўлса ёнига боргудай, сочлари тарапланган, оч бели бураланган, қоши кўзига муносиб, кўрганнинг кўкайин кесиб, бўйнига ҳайкал жеватин осиб, ётибди, ҳамма еридан мушки анбар сасиб, бир қиз жойидан туриб ўт-пўт ёқайин деб тараффуд қилиб юрибди. Аваҳон буни кўриб, қизга қараб бир сўз деб тургани:

Ҳар ҳаёлга тушган бандарайи,
Бунинг отаси қасрнинг шойиди,
Сабаб билан бунда тушди гузарим,
Бу маконлар кимнинг макон жойиди(р)?

Менга баён бергил асли зотини,
Айтсам адo бўлмас таърифотини,
Нима дейди отасининг отини,
Бу маконлар кимнинг макон жойиди(р)?

Қулоқ сод бу дамда айтган сўзима,
Оти-зотинг баён бергил ўзима.
Пари янглиғ кўринади кўзима.
Бу маконлар кимнинг макон жойиди(р)?

Кўрган одам бунинг ақлидан шошди,
Ошиқнинг алами ҳаддидан ошди.
Нечовлар буни деб эсдан адаши,
Бу маконлар кимнинг макон жойиди(р)?

Кўрганларнинг ҳаддан ошар ҳасрати,
Кўргани кўйдирар жони жасади.
Мей билмайман нима экан мақсадин,
Бу маконлар кимнинг макон жойиди(р)?

Отасида борми тожу давлати,
Бунда кўринади шоҳлик савлати.
Бу ётган нозанин кимнинг авлоди,
Бу маконлар кимнинг макон жойиди(р)?

Баён этгин оти-зотинг билайн.
Сабабман дуч қилди бизни худойим,
Йўлларингда жоним қурбон қилайн.
Бу маконлар кимнинг макон жойиди(р)?

Алқисса, бу сўзларни айтиб, Аваҳон сўради. **Хизматкор** қиз Аваҳга нима деб жавоб беради:

Бу ерлардан бесар¹ одам ўтолмас,
Ошиқ бўлган бундин омён кетолмас.
Боравер, йўлингдан қолма ёш ўғлон,
Ҳавас қилган билан одам етолмас.

Эрта билан эшигимдан ўтарсан,
Оти-зотин буни сўраб нетарсан!
Ҳавас қилмай кета бергин, ёш ўғлон.
Ҳавас қилсанг, бекор ўлиб кетарсан.

Така-туркман дейди бунинг зотини,
Душманларга қилган сиёсатини.

¹ Бесар — бошсиэ, ақасиз.

Майдонга кирганда тарафсиз полвон,
Аҳмад сардор дер отасининг отини.

Бунинг ўзи Аҳмад сардор ёғизи,
Бисотида бир ўғил ҳам қизи.
Оти Бўтакўзи сардорнинг қизи,
Енингдаги ётган қизлар канизи.

Қай бир ишин бунинг баён айлайин,
Сабаб билан дуч қилди сизни худойим,
Буни сўрсанг Аҳмад сардор қизиди(р),
Отин сўрсангиз Бўтакўзойим.

Маконимиз Ҳовдак кўлнинг ёқаси,
Аҳмад сардор така элнинг оғаси.
Кимнинг кучи етар булардай зўрга
Чамбильбела Гўрўғлиниг тоғаси.

Алқисса, каниз қиз ҳам сўзини тутатди. Буларнинг сўзи билан Бўтакўзойим уйғонди. Қараса, эшикнинг олдида бир отли тўхтабди. Эшикдан отининг узангиси кўриниб турибди. От узангисини кўрган киши мунча дунё харажат бўлган деб чўтлаб бўлмайди. Бўтакўзойим жойидан туриб, анчайин одам эмаслигини билиб, қора уйнинг эшигидан келиб қаради. Кўрдики, отининг устида бир йигит турибди. Шу вақтда Авазхон ўзи айни ўн тўрт ёшида, тилла жига бошида. Авазхонни кўрган вақтда парилар ҳеччи бўлмайди. Қошинда Авазхон ўш ўғлон, деграси хандон, зарафшон кокил, ўтказган ёкути маржон, чор сийна қўксисда, яғрида қалқон, майдонга кирган тарафсиз полвон суроил гардон, зарекили оч белига чулғанган, оқ юзи ой билан кунга талашган, ҳар ким қўрса Авазхонни уч кунгача ақлидан адашган. Бўтакўзойим буни кўриб Авазхонга қараб бир сўз деб тургани:

Эрта билан эшигимда турарсан,
Саргашта ўғлон, нечук бунда юрарсан?
Қайси мамлакатда даврон сурарсан,
Ҳайбатли ўш ўғлон сизга йўл бўлсин?

От устида кўрдим хушқоматингни,
Билдим, мисли Рустам сиёсатингни,

Нима дейди айтинг, ўғлон, отингни.
Ҳайбатли, арслоним, сизга йўл бўлсин?

Бир сабабман эл-юртидан адашган,
Оқ юзинг ой билан кунга талашган,
Сиёсатинг бедовингга ярашган,
Ҳайбатли, арслоним, сизга йўл бўлсин?

Очиликнан қандай боянинг гулисиз,
Бирорни бир деган жони-дилисиз,
Қайси юртда, қайси шоҳнинг ўғлисиз,
Ҳайбатли, арслоним, сизга йўл бўлсин?

Қаерлардан мунда гузаринг тушган,
Ҳуснингни кўрганлар хуноба ичган,
Англамасин бунда юрганинг душман,
Ҳайбатли, арслоним, сизга йўл бўлсин?
Шаҳзода деб борди сизда гумоним,
Отдан тушинг бул дам, азиҳ мөхмоним,
Ҳайбатли, арслоним, сизга йўл бўлсин?

Баланд кўринади сенинг ҳимматинг,
Мен қиларман шоҳлигингни иззатин,
Жони-дилман қилай бу кун хизматинг,
Ҳайбатли, арслоним, сизга йўл бўлсин?

Буни эшитиб Аваз Бўтакўзойимга қараб бир сўз деб тургани:

Макон жойим дейди Чамбил қалъаси,
Худойимнинг кўпдир турли балоси.
Исмимни сўрасанг, исмим Авазхон,
Чамбил белда Гўрўғлиниг боласи.

Очиликнан тоза боянинг гулиман,
Гўрўғлиниг балки жони-дилиман,
Исмимни сўрасанг, исмим Авазхон,
Гўрўғлиниг Аваз отли ўғлиман.

Чин ошиқ бўлганинг бўлмас уяти,
Подшодан бўлмайди, элдин зиёти,
Исмимни сўрасанг, дейди: Авазхон,
Остимдаги Гўрўғлиниг Фироти.

Кечака кўлларингда добилим чолдим,
Адашиб йўлимдан майдонда қолдим,
Эрта билан кўринган сўнг кўзима,
Бугун келиб мен сиздан хабар олдим,

Кечака шикор этиб Ҳовдак қўлингдан,
Саргардон бўп келдим бугун чўлингдан.
Бир чилимга бадхумор бўп келаман,
Бир чилим бер, чакай, нозик қўлингдан.

Хабардорман доим ўнгу сўлимдан,
Қолдирманг, нозанин мени йўлимдан.
Бир чилимга бадхумор бўп келаман,
Чилим беринг, чакай, нозик қўлингдан.

Тушмоққа фурсат йўқ, отнинг белидан,
Кечака ман кетганман Евмид элидан,
Чилим беринг бугун нозик қўлингдан,
Қолмайин айланиб анча йўлимдан.

Айтган билан адо бўлмас ҳасратим,
Қўрар банда азалдаги қисматин,
Ҳозир сиздан бир чилимди(р) мақсадим,
Бир чилим бер, чакай, нозик қўлингдан.

Бу кун тушмай от устидан, оҳ урайин,
Ҳовдак кўлдан добил чолиб кўрайин,
Соқит бўлиб бўйнимдаги қарзимдан,
Сўнгра сенинг сўргонингда бўлайн.

Бўтакўз ойнани олиб қирқ қиз билан ўтирганда, ойнана
қарап эди. Шунда канизларга қараб айтар эди. Ҳоҳи
одамзод бўлсин, хоҳи пари бўлсин, мен бир кишини хоҳ-
ласам, мени ҳам хоҳламай кетадиган киши бормикан? Ава-
зхонга:— Отдан туш!— деб эди.— Бир чилим берсанг бў-
лади,— деб Аваҳон отдан тушмади, ўзининг бурунги
айтган сўзига Бўтакўз канизлардан уялиб, Аваҳонга қа-
раб бир сўз айтиб тургани:

Етти ёшда келиб бўлдинг мусулмон,
Менинг отам дейсан Гўрўғли сulton.
Билмаган одамга айтгин бу сўзни,
Ҳолинг маълум, исминг бўлса, Аваҳон.

Ким эканинг сени, Аваҳ, биламиз.
Гўрўғли-чун сени иззат қиласмиз.
Уялмай айтасан Гўрўғли отам,
Бу сўзингга бизлар, Аваҳ, қўламиз.

Айтар сўзинг билмай, Аваҳ, шошарсан,
Мунча манманлик қиб ҳаддан ошарсан,
От кимники, тўн кимники, Аваҳхон,
Кимнинг давлатига мунча тошарсан.

Ахир зулми ситам ўткай жонингга,
Бу ишларни ўйламай сан танингга,
Юртинг қайда, элинг қайда, Аваҳхон,
Тўйганга маст бўлиб юрсанг нонингга.

Ўзингдан бошқани писанд қилмайсан,
Айтган сўзни ҳеч назарга илмайсан,
Етти ёшда Гуржистондан келибсан,
Сен ўзингнинг ким эканинг билмайсан.

Яхши одам ўз элидан кетарми?
Бошқа элга келиб тўрга ўтарми?
Уз элида иш келмаса қўлидан,
Бегона элида мақсадга етарми?

Баракалла, шунча қиласан ҳимматга,
Лойиқ кўрмадингми бизни ҳизматта,
От устида туриб чилим сўрадинг,
Арзимадинг бугун, Аваҳ, иззатга.

Қари киши мақтанганман кучи йўқ,
Бизнинг элда чилим билан иши йўқ.
Ҳавонг баланд кўринади, Аваҳхон,
Такаббурга чилим берар киши йўқ.

Ким эканинг аввал ўзинг англагил,
Билмайдиган элни бориб алдагил.
Бизлар сенинг ким эканинг биламиз.
Бора бергин, Аваҳ, йўлдан қолмагил!

Добилингни чолиб отингни чопгин,
Исминг Аваҳ бўлса ҳаддингга боқин!
Қулнинг тенги чўри бўлар, Аваҳхон,
Боргин излаб, ўзинг тенгингни топгин!

Доно киши ўз элидан адалмас,
Нокас одам номусига талашмас.
Тенгинг топиб чилим сўра, Авазхон,
Биздан хизмат қилмоқ сенга ярашмас.

Очилганда қандай боғнинг гулисан?
Гўрўғлиниң қандайгина улисан?
Гўрўғлида ўғли туғул қизи йўқ,
Тўрт тиллали сотиб олган қулисан!

Алқисса, бу сўзни эшитиб Бўтакўзойимга қараб Аваз-
ниңг айтатётган сўзи:

Үйламай сўйлайсан бунча танингга,
Шу сўз ярашами менинг шаънима?
Сочинг узун, ақлинг калта, Бўтакўз,
Бекор жабр қилдинг ўзинг жонингга.

Бугун менга айтган шунча сўзинг-а,
Айтган сўзинг ярашмайди ўзингга.
Банда бўлса бари ҳақнинг қўлида,
Ким эканим кўрсатарман кўзингга.

Ҳозир ман сўйласам бунда куларсан,
«Қул» деб бизга бунча таъна қиларсан?!

Шу сўзингман, тўхта, энди Бўтакўз,
Қул эканим, бек эканим биларсан.

Шу сўзингга бугун Чамбил бормасам,
Эрта кеб юртингга офат солмасам,
Чамбилбели энди бизга харомди(р),
Шу Чамбилда токи сени олмасам.

Бугун бориб, эрта қайтиб келмасам,
Қанча қувватинг борини билмасам,
Чамбилбели энди бизга харомди(р),
Қирқ йигитга чилим соглиг қилмасам.

Ғазаб қиличини қиндан тортмасам,
Чамбилбели энди менга ҳаромди(р).

Алқисса, буни деб Авазхон отини қайтариб кета берди.
Бўтакўзойим ҳам чилим бермасдан қола берди.

Бўтакўзининг онаси Авазхонни қўриб келаётib эди. Шу
ҳолда келиб қолди. Бўтакўзойимдан сўради:

— Келиб-кетиб бораётган қандай отлиқ?— деди.

Бўтакўз онасига айтди:

— Гўрўғлиниң Гуржистондан олиб келган Авазхон
деган боласи,— деди.

— У нимага келиб, отдан тушмай кетиб боряпти?—
Бўтакўз:

— Менга келиб, узангисини тираб, от устида туриб,
катталик қилиб, чилим бер, деди. Мен унга:— Бунча кат-
талик қиласан? Ниҳоят Гўрўғлиниң тўрт тиллали қули-
сан-да!— деб эдим, шунга аччиғлаб кетаётир,— деди. Она-
си туриб:

— Ундаи деганча энди жувормарг бўлдим десанг бўл-
майми? У айтган сўзингни сан Авазхонга айтдим деб ту-
рибсан. Билсанг, уни сан Гўрўғлига айтганинг. Гўрўғли-
ниң «қиёматлик болам», деган сўзини назарга олмай,
«Гўрўғлиниң сўзи нима, ўзи нима» деганинг. Ҳали ҳам
бўлса, чилимни қўлингга ол, орқасидан бор. Улай-буладай
деб кўнглидан чиқариб қол! Бўлмаса, сенинг касофатинг
халқа тегади. Лекин бугун ҳўли-қуруқ бирдай ёнади. Сен
энди Гўрўғли билан ўйнайсанми.— Бу сўзни эшитиб Бўта-
кўзойим, қўлига чилимни олиб Авазхоннинг изидан югу-
риб, «Тўхтанг, тўрам», деб товушлаб бир сўз деб келаёт-
гани:

Назар сол ўнгу сўлингга,
Қўплар қарадим йўлингга,
Чамбилинг эгаси, тўрам,
Янги кеб тушдинг қўлимга.

Мен доим йўлга қарадим,
Қора зулфимни тарадим;
Келарми деб сиздай тўра,
Утган одамдан сўрадим.

Ишқингда бўлдим мен сарсон,
Мушкулимни қилинг онсон;
Мана чилим тайёр қўлда,
Чакиб кет, тўхтанг, бегижон!

Сурма қилайин изингни,
Қақшатманг сардор қизини.
Бир кўрганда ақлим бердим,
Тўражон, ойдай юзингни¹.

Ҳар дамда тутар хуморинг,
Кифтингда тилла туморинг,
Бир кўрганда ақлим бердим,
Сен билан ойдай дийдорим.

Ақлимни одди худойим,
Нодонман қандай ҳилайин.
Шошиб неча сўзлар айтдим,
Кечиринг, тўрам, гунойим.

Йўлда тўрт қилманг қўзимни,
Расво қилманг мен ўзимни.
Ақлимни олди жамолинг,
Билмасман айтган сўзимни.

Бу сўзларни англаб олғил,
Эшитиб Чамбилга борғил,
Жони-дилман қабул қилай,
Бориб, сен совчини солғил!

Сизни мен тўра билайин,
Сиз билан ўйнаб-кулайин.
Бориб совчингизни солинг,
Тақдирим қўшса худойим.
Үйимга олиб кетайин.

Турли таомлар тортайин,
Бу мақсадимга етайнин,
Қабул қилсанг ҳозир, тўрам,
Сиз билан бирга кетайин.

Қайting, тўрам, бирор оқшом,
Маконимга тушиб кетинг!
Шароб берай ўнг қўлимдан,
Иzzат билан ичиб кетинг!

Алқисса, буни деб Бўтакўзойим қанча изидан югорди,
Авазхон қарамастан кетди. У кеча орадан ўтди. Кун чош-
гоҳга етди. Авазхондан дарак бўлмади. Гўрўғли сulton
Мажнункў отга әгарни босиб, «нима бўлди экан?» деб
Авазхонни сўроқлаб чиқмоқчи бўлиб туриб эди, шул вақт-
да ташқаридан бир одам келиб: «Авазхон келди!»— деди.
Авазхон келиб дарвозадан кирди. Гўрўғли сulton Аваз-
хоннинг келганини кўрди. Авазхоннинг кайфи учган, ав-
зойи бузилган, ўзи ҳафа. Үрдак ҳам йўқ, сўна ҳам йўқ.
Чамбидан қандай кетган бўлса, шундай қайтиб келибди.
Гўрўғли сulton тахтга қараб кетди. Авазхон отдан тушди.
Сайислар отни олди. Қушбонлар қушни олди. Авазхон
аста-секин Гўрўғлининг олдига борди. Гўрўғлининг олдига
салом бериб кирди.

— Бу ёқса ўт, Аваз!— деди, Гўрўғли. Аваз ўтмай
эшик олда турди. Гўрўғлини кўрган замон Авазнинг қўзи-
дан ёши тўкилиб кетди. Буни кўриб Гўрўғли сulton дарга-
ваб бўлиб, илондай заҳри тўлиб, ҳар бир туклари бигиз-
дай бўлиб Авазхонга қараб бир сўз дегани:

Кеча шикор қилиб Ҳовдакка бординг,
Бу кун оқшом келмай, қаерда қолдинг?
Қора кунни менинг бошимга солдинг!
Авазхоним, жоним болам, на бўлди?

Изингдан сўроқлаб одам бормади,
Аҳволингдан хеч ким хабар олмади,
Сени кўриб менда тоқат қолмади,
Чамбилим ободи, қўзим, на бўлди?

Дилу жондан беҳроқ¹ эдинг менга сен,
Бирор сенга солган ўхшар дарду кам.
Кўзимнинг нурисан, ўзинг, Авазхон,
Учарда қанотим, қўзим, на бўлди?

Бугун талаб қилиб отимни миндинг,
Кеча шикор бориб сен бугун келдинг.
На кўрдинг, жон болам, бориб на кўрдинг,
Танда йўқ тоқатим, қўзим, на бўлди?

Мақсадинг на, болам, айтгин билайнин,
Қандай савдо солди бизга худойим?

¹ Юзингга.

Е ўлайн, ё мақсадинг билайн.
Кел, майли, чўқатим, қўзим, на бўлди!

Сени кўриб қуриб танда мадорим,
Тезроқ айтгин меңда йўқдир қарорим!
Бермаган ўхшайди овинг барорин,
Қўзимнинг нурисан, болам, на бўлди?

На бўлса, болам, айтгин сўзингни,
Бирор озор берган ўхшар ўзингга.
Ким озор берди менинг қўзимга?
Арслоним, жоним қўзим, на бўлди?

Сенинг учун танда жондин кечайин,
Душман бўлса йўллағига тушайин,
Бориб ани қонин сувдай ичайин,
Беармон бўлайнин, қўзим, на бўлди?

Алқисса, бу сўзи эшитиб, Авазхон отасига қараб бир
сўз деб тургани:

Хафа бўлмай, жоним ота, найлайнин,
Қулоқ солсанг, энди, ота, сўйлайнин;
Неча турли савдо ўтди бошимдан,
Қўрган сирим сизга баён айлайнин.

Кеча шикор қилиб Ҳовдакка бордим;
Бу кеча адашиб саҳрода қолдим.
Эрта билан тонг отган сўнг мен туриб,
Ҳар тарафга боқиб-қўзимни солдим.

Қулоқ солинг, ота, менинг сўзима,
Неча фикр, хаёл тушди ўзима,
Баланд қирга чиқиб, ҳарён қарадим,
Кўп убо кўринди менинг қўзима.

Мен адашиб юрак ғамман тўлибди,
Кўп қора уй кўл бўйига қўнибди.
Эрта билан туриб эдим жойимдан,
Кўнглим бир чилимга мойил бўлибди.

Унга бордим мен бир чилим топай, деб,
Чилим топсам агар мундан чекай, деб.

Урдак, сўна оларманми бугун, деб,
Қайтиб келиб кўлда добил қоқай, деб.

Шул орада ғаним тушди изима,
Англамай борибман сардор қизина,
Бир чилим бер дедим, йўқдир гуноҳим,
Ҳа деганда қул деб айтди юзима.

Қул бўлсан, отажон, бунда нетарман,
Бул тожи баҳтинг баҳридан ўтарман,
Ё олиб бер сардор қизин, отажон,
Ё жавоб бер, ўз юртима кетарман.

Мен мақсадим сардор қизин олмоқдир,
Сардорнинг юртига оғат солмоқдир.
Шу манманлик қилганига Бўтакўз,
Мақсадим шул яна қайтиб бормоқдир.

Ҳамро даркор эмас менинг қошима,
Раҳм қил, отажон, кўзда ёшима,
Сардор билан бир олишиб кўрайин,
Жавоб беринг, ота, ёғиз бошима.

Бу сўз чиқмас юрагимдан ўлгунча,
Тирик юриб бу камликка кўнгунча,
Ўлиб кетмоқ яхши энди, отажон,
Бўтакўздан шунча хўрлик кўргунча.

Бундай қилсан қайтар бошимдан баҳтим,
Шулдир ўлмай тирик синган раҳтим.
Энди мен тенглигим ундан олмасам,
Керак эмас менга тож билан тахтинг.

Бўтакўз йўлинда жавлон этарман,
Ё ўларман, ё мақсадга етарман.
Душманлардан тенглигимни олмасам,
Гўрўғли отингни, бекор, нетарман?

Сардор майдонга бориб кирмасам,
Сардорнинг қуввати қанча билмасам,
Бўтакўзни олиб келиб Чамбила,
Қирқ йигитга чилим солрич қилмасам.

Энди куним, ота, бўлди қоронги,
Жавоб бергин, Аваз отли боланди,

Бўтакўзга айтганимни қилмасам,
Чамбилинг энди бизга ҳаромди.

Алқисса, бу сўёни әшитиб Гўрўғли султон лол бўлиб қолди. Авазхон боласи бўлса, Аҳмад сардор тоғаси. Иккочи ҳам ўзиники. Авазхоннинг мақсадини қиласайин деса, Аҳмад сардорнинг насоги ўзига тегади. Гўрўғли ўйланиб туриб кирк йигитни чақириб олди. Уларга маслаҳат солди: — Аҳмад сардорнинг қизи Бўтакўзойим, Авазхонга «Гўрўғлининг қули бўласан», деб бир неча сакта сўзлар айтиб, унинг кўнглини қора қилибди. Менинг «қиёматли болам», деган сўзимни ёътиборга олмай, «Гўрўғлининг сўзи нима, ўзи нима?» деган ишни қилибди. Бугун Авазхонни олдай солиб, ҳамманг изидан ияринглар! Аҳмад сардорнинг қизини Авазхоннинг қўлига олиб беринглар! Нима ишга лойиқ кўrsa, Авазхоннинг ихтиёри ўзида. Бошқаларга индамай, бир Бўтакўзининг ўзини олиб қайтиб кела беринглар! Қирқ йигитдан ҳеч бир жавоб бўлмади. Аҳмад сардорни хеш кўриб, Авазхонни бегона кўриб Гўрўғлининг сўзига жавоб бермай ўтириди бариси.

Сўёни Ёртибой оқсоқолдан әшитинг: «Ўлсан гўрга, бир чиқайин тўрга», деб жойидан туриб, Гўрўғлига қараб бир сўз деб тургани:

Номамла сўзларга бошим чайқайин,
Сўз кесаман, сўйламайин қайтайн.
Әшитинг сўзимни бул дам, султоним,
Ман ҳам кўнглимдаги фикрим айтайн:

Қиёматли болам дерсиз Авазни,
Авазхон ҳар ишни қиласар ҳавасни,
Сардор тоға, сиз жиянсиз, султоним,
Аҳмад сардор чолмагангиз абасти.

Бегонани қанча боқсанг кетади,
Манманлик сўз эр бошига етади.
Сардор тоға, сиз жиянсиз, султоним,
Бу католик ҳар кимлардан ўтади.

Дунёнинг тўрт фаслини, султон, биласиз,
Сардор чопиб қизин олиб келасиз...
Ҳар кимда ҳам бордир дўст билан душман,
Тоганг, чопиб кимни қойил қиласиз?

Бизлар борсак у ҳам одам йигади,
Хўли қуруқ бугун бирдан куяди.
Бир ердан зиёни тегса сардорнинг,
Неча жойдан унинг нафи тегади.

Сиздан лозим әмас бунча зўрламоқ,
Ҳар ким яхши, ўз ҳолини борламоқ,
Аҳмад сардор у ҳам сиздай бир арслон,
Ярамайди эрни бунча хўрламоқ.

Әшитинг, Ёртибой оҳи-зорини,
Ким ўйламас султон номус-орини.
Хизматингни қилиб турган қирқ йигит,
Қайсиси туркмандан олди ёрини?

Бугун аввал бошдан шикорга борди,
Адашиб бир кеча саҳрова қолди.
Бегоналигини дарров билдириди,
Ҳа деганда ўзингга чангалини солди.

Аваз келиб нодонликман айтади,
Бермаганда Аваз бизни қайтади¹,
Қайси бир хон фуқароман урушса,
Билгин, султон, адолатдан қайтади.

Қулоқ солинг, бу дам, султон, сўзима,
Аваз баттол кўринади кўзима,
Тоганинг қизига ҳавас қиалган сўнг,
Чангол солган шу әмасми ўзингга?

Қулоқ солинг Ёртибойнинг тилига,
Булбул ошиқ бўлди боғда гулига,
Сардор қизин ўзинг олсанг берармиз,
Қиз бермаймиз сотиб олган қулингга.

Алқисса, буни әшитиб Гўрўғли султон қилични қинидан тортиб олди. Ёртибой оқсоқолга қараб ҳавола қилди. Ёртибой айтади:— Эй султоним, мен бир ўзингиз қилиб қўйган Ёртибой-да, айтар сўзимни айтдим. Мени ўлдираганингиз билан, лекин ер тўймайди, «Баракалла, Гўрўғли султонга, Ёртибойни ўлдириди», деб уни билан ҳеч ким сиз-

¹ Қандай қилади.

га қойил ҳам бўлмайди. Ёртибой оқсоқол бўлади, боради, Гўрўғли султон қаригандан сўнг, душман билан олишмоқча чамаси келмай ўзини Ёртибой-портибой деган нософ сўз сизга қолади. Гўрўғли бунинг сўзига жавоб тополмади ё буни чополмади. Қайтиб жойига ўтирди. Қирқ йигит, Ёртибойнинг сўзи маъқул,— деб ўрнидан туриб кетди. Шу билан Авазхоннинг сўзи бу ерда ҳам мансиққа чиқиб қолди.

Авазхон ҳар гап бўлса кўнглида ўйлаб, кулиб, ўйнаб юраверди. Орадан уч кун ўтди. Қирқ йигит билан Гўрўғли султон, Ҳасанхон, Авазхон ҳаммалари ўтириб сұхбат қилиди. Авазхон ўзи тилақ қилиб косагул бўлди. Шу даврада шароб сузиб берди. Ҳаммаси маст бўлиб қолди. Эшикни ёпиб Авазхон ташқарига чиқди. Ёв-яроқ асбобини тахлаб олди, аста-аста сайисларнинг олдига борди.

— Дарров Фиротга эгар босинг! — деди.

Сайислар айтди: — Бошқа отга эгар бос, десангиз босамиз, Фиротга Гўрўғлининг ўз оғзидан эшитмагунча эгар босилмайди, — деди. Авазхоннинг аччиғи келди.

— Эгар босмайсанми! — деб қиличнинг ярмини гилофдан сугурди. Уч сайис баравар туриб бирдан сайисхонага қараб кетди. Авазхон аста-аста кейинидан борди. Қараса, Фиротга эгар босиб ётиби. Авазхон:

— Фиротни қўйинг! Мажнункўк отга эгар босинглар! Фирот Чамбилининг ободи эди. Гўрўғлининг қаноти эди, Фирот ўзининг қўлида турсин, — деди. Мажнункўк отни эгарлаб, тахтлаб берди. Авазхон Мажнункўк отнинг белига миниб, Чамбил дарвозасидан чиқиб, Гуржистон йўлига тушиб жўнаб кета берди. Кетайин деса, Чамбилини кўзи манглақиймайди, кетмайин деса, алами ичига сифмайди. Манглайини отнинг ёлига ташлаб, икки қўзини ёшлаб, Гуржистон йўлига бошлаб, кетиб бораётир эди, Юнус пари онасининг Авазга кўзи тушди. Авазхонни бу ҳолда қўриб, Мажнункўк отнинг жиловидан ушлаб, Авазхон боласига қараб бир сўз деди:

Етти ёшда келдинг Ёвмид элина,
Бугун миндинг Мажнункўжнинг белина.
Қулоқ солгин куйган онанг тилина,
Кўзимнинг равшани, қўзим, на бўлди?

От ёлига манглайингни ташлайсан,
Зор йиглаб икки қўзинг ёшлайсан.

Бугун қайси элага сен йўл бошлайсан,
Юргимнинг ободи, қўзим, на бўлди?

Қайгуда бошингди(р), қўзингда ёшинг,
Елғизсан, олдингда йўқдир йўлдошинг.
Сени қўриб менда йўқдир бардошим,
Тарафсиз полвоним, қўзим, на бўлди?

Сени қўриб менинг йўқдир тоқатим,
Сен эдинг Чамбила менинг ободим.
Сен кетиб синдирма отанг қанотин,
Султоннинг қаноти, қўзим, на бўлди?

Сени қўриб ҳаддан ошди ҳасратим,
Авазхон, сен менинг жоним фарзандим.
Сендан бундай эмас эди мақсадим,
Чамбилининг ободи, қўзим, на бўлди?

Отангни қайтарма бошдан бахтини,
Қариганда синдирамагил раҳтини,
Кимга ташлаб кетдинг Чамбил тахтини,
Кўзимнинг равшани, қўзим, на бўлди?

Қўриб тоқатим йўқ, сенинг ҳолингни,
Кўйдирмагил, болам, менинг жонимни;
Кимга ташлаб кетдинг, дунё молингни,
Кўзимнинг равшани, қўзим, на бўлди?

Авазхоннинг онасига қараб қайтарган жавоби:

Бошимдан кетмади менинг қайғу-ғам,
Бу сўзларга чидамайди Авазхон,
Ўз элима, она, энди кетарман,
Хўш аллаёр рози бўлгин, онажон!..

Тополмассиз менинг босган изимни,
Кўрмогингиз гумон тирик юзимни.
Гуржистонга энди талаб қиласман,
Кўп едим ман, рози бўлгин тузингни.

Бунда юриб ғаним тушди изима,
Сабаб билан бордим сардор қизина,
Бир «чилим бер» дедим йўқди гунойим,
Ха деганда, қул, деб айтди юзима.

Құл бұлсам, онажон, бунда нетарман?
Бу давлат баҳридан әнди ўтарман.
Рози бұлгил, она, берган түзингга,
Әнди бугун Гуржистонға кетарман.

Чамбильбелинг бұлған билан гулистон,
Хозир менга, она, бұлды чўлистан.
Әнди биздан рози бўлинг, онажон,
Қайтадан борайин әнди Гуржистон.

Йиғлаб келдим бек отамнинг бошина,
Бир раҳм қилмади кўзда ёshima.
Ёртибой оқсоқол яна, қул, деди,
Қирқ йигит ёнида, отам қошида.

Учди давлат бошдан қайтиб қўнмади,
Бу тўралигимдан қўнглим тўлмади.
Қиёматли фарзанд бўлиб султонга,
Ёртибойга ахир қурбим бўлмади.

Эр йигит ҳам шунча камлик кўрарми?,
Ажал етмай, она, одам ўларми?
Әнди мен кетарман, она, элима,
Эр йигит ўлмайин, хўрлик кўрарми?

Гуржистон йўлида отим чопайин,
Эсимнинг борида әлим топайин.
Чамбильбелда токи тўра бўлганча,
Гуржистонни бориб молин боқайин.

Алқисса, бу сўзни айтиб Аваҳон тамом этди, онаси
Аваҳоннинг бу сўзини эшилди.

— Эй, Аваҳон болам, мақсадинг Аҳмад сардорнинг
қизи бўлса, отанг олиб бермаган бўлса, биз олиб берам-
миз, Аҳмад сардорнинг қизини ит суратинда қилиб, ор-
қангдан элтиб қўй, десанг элтиб қўямиз. Нимаики бўлса
бизлар қиласин,— деди. Аваҳон айтди:

— Эй әна, аввал ҳам сенинг олдингга келганимда сўз
бошқа әди, әнди эшитар сўзимни эшитиб, яна қайтиб бориб
«онам олиб берар экан» дегандан, кишига орият ке-
рак,— деб юртига кетмоқчи бўлди. Юнус пари туриб айт-
дикি:— Эй Аваҳон, сенга шу Ёртибой оқсоқоллардан

Гўрўғли сўз эшилтирган бўлса, Гўрўғли одамнинг қадри-
ни билмас экан, бу Чамбидан сен кетадиган бўлсанг биз-
нинг ҳам нимамиз бор бу Чамбидла. Сен кетсанг, бивлар
ҳам кетамиз,— деб Юнус пари Аваҳон билан розилашиб,
каптар суратида бўлиб, учиб, Эрам боққа, Кўҳиқоғга
кетди. Шунда Аваҳон йўлга тушиб, Гуржистон томонга
кетди. Аваҳоннинг Гуржистонға йўл тортиб кетишининг
баёни:

Минибди отнинг белига,
Талаб қилиб әлига,
Тўғрилаб тушди Аваҳон,
Гуржистоннинг йўлига.

Аваз йўлга солади,
Мажнункўк ўйнаб боради.
Куюндай бўп чанглари,
Бўлак-бўлак қолади.

Юғани бирдай босади,
Авазни олиб қочади,
Кундан-кунга юриши,
Тулпарнинг ҳадди ошади.

Ҳайдайди бирдай тушмайин,
Ерда юради учмайин,
Ерда юргани бўлмаса,
Мисоли кетар қушдайин.

Неча бир белдан ошади.
Оғзидан кўпик сочади;
Баланд-пастни билмайди,
Қасирлаб, оёқ босади.

Аваҳон йўлни бошлайди,
Душманни кўрса шошмайди,
Қирқ минг душман келган билан,
От қўяр кейин қочмайди.

Остидаги Мажнункўк,
Шошмайин оёқ ташлайди,
Боради яккадан-ёлғиз,
Соп бўлмас бу йўл қулатуз.

Бирдай Аваз ҳайдайди,
Ҳам тиимай кечаю кундуз.

Мингани бедов сараси,
Уч ойлик йўлдир ораси,
Ўн кун ўтган вақтинда
Авазхон энди кўрибди,
Гуржистоннинг қорасин.

Бедовни мингандаралаб,
Борди элни қоралаб,
Дарвозадан кирибди

Энди Аваз оралаб.
Қанча душман келганиман
Кўрқмайди Аваз панараб.

Етти ёшда Аваз бундан кетибди,
Етти йил орадан яна ўтибди,
Етти йилдан бери кетган Авазхон,
Қайта бошдан Гуржистонга етибди.

Кечакундуз Аваз бирдай тинмади,
Бир кун бирор жойда тоқат қилмади.
Аваз хаёлидан чиқиб кетибди,
Ховлисиннинг қайда эканин билмади.

Билган эрга ўлимдан номус кучли,
Бир ҳовузга Авазнинг кўзи тушди.
Ажаб бир салтанатли сарҳовуэди,
Сарҳовуз бошига Аваз етишди.

Ўйнатиб ҳайдаган Мажнункўк отни,
Уч кечаю кундуз бирдай тунг қотди.
Сарҳовуз бошига келиб Авазхон,
Мажнункўк отнинг жиловин тортди.

Деди Аваз:— Мен бу ерда турайин,
Тўхта, мунда бир ўйланиб қўрайин.
Бу сарҳовуз экан кимнинг ҳовузи?
Бирор одам дуч кеб қолса сўрайин.

Алқисса, шу ерда Авазхон отини тўхтатиб, теваракка
қараб турди. Сарҳовузни қаер эканини билолмайди. Шу

вақт ичкаридан бир қиз икки қўлида икки сатил¹, сувга
кела берди. Ул қиз ё ўн икки, ё ўн уч ёшда эди. Бунинг
қошинда Аҳмад сардорнинг қизил ҳеччи эмас. Аҳмад
кўриб Авазхон мен осмоннинг остинда, ернинг юзиnda
бир Аҳмад сардорнинг қизи десам, ўзимнинг юртимда
Аҳмад сардорнинг қизидан ҳам яхшироқ қизлар бор
экан. Туржман элинда, Аҳмад сардорнинг қизига бир чи-
лим деб, дунёда ёшитмаган сўзимни ёшитиб эдим. Бунга
ҳам бир сўйлаб кўрайин, бу нима дер экан, деб қизга қа-
раб бир сўз деб тургани:

Эниб келдим тоғларингдан,
Бир гул узсам боғларингдан.
Бир сув бергин қўлларингдан,
Ишиб кетай, йўлим йироқ.

Келдим йироқ йўлларингдан,
Сувсан келдим чўлларингдан,
Бир сув бергин қўлларингдан,
Ишиб кетай, йўлим йироқ.

Тушмам отнинг белларидан,
Сўз ёшитсан тилларингдан,
Бир сув бергин қўлларингдан,
Ишиб кетай, йўлим йироқ.

Гуржистонга бўлдим меҳмон.
Тахдим² сўрсанг, мен мусулмон,
Отамдир, Гўрўғли сulton,
Бир сув бергин қўлларингдан,
Ишиб кетай, йўлим йироқ.

Бу йўлдан қайтмасин раъийим,
Мададкорим бир худойим.
Чамбилбелда макон — жойим,
Бир сув бергин қўлларингдан,
Ишиб кетай йўлим йироқ.

Бу дам йўлимдан қолмайин,
Бу ер қаердир англайн,

¹ Челак.

² Теги — тахти, авлоди.

Бошим гавғога солмайин,
Бир сув бергин қўлларингдан,
Ичиб кетай, йўлим йироқ.

Тинмайин отлар чопарман,
Туриб ҳар ёна боқарман,
Билмайман қачон топарман,
Бир сув бергин қўлларингдан,
Ичиб кетай, йўлим йироқ.

Ҳовуз бошидан ўтарман,
Сув берсанг, ичиб кетарман.
Макон жойимга етарман,
Бир сув бергин қўлларингдан,
Ичиб кетай, йўлим йироқ.

Алқисса, буни деб Авазхон турди. Авазхондан бу сўзни эшитиб, сувга келиб турган қиз қўлидан челягини ташлаб, икки қўзини ёшлаб, зор-зор йиглаб, Авазхонга бир сўз деб тургани:

Тушмасанг, тўхтагил, отнинг белидан,
Келган бўлсанг бугун Ёвмид элидан,
Жонидилман сизга хизмат қиласман,
Мен садага Ёвмид деган тилингдан.

Меҳмон бўлсангиз, мен меҳмон қиласман,
Мададкоринг бўлсин, йигит, худойим,
Шояд сиздан бир хушхабар эшитсан,
Саломат бўлинг сиз, йигит, илбим.

Бир қарчигай вақтинда бундан учган,
Дўстлар кулиб, таъна қилишар душман.
Етти йиллар ўтиб кетди орадан,
Қиёмат кун менинг бошимга тушган.

Яхши меҳмон, Ёвмид элдан келсангиз,
Мен бир сўз сўрарман, сиздан билсангиз,
Сира ўлманг, бу жаҳонда минг яшанг,
Менинг бу сўзимга хабар берсангиз.

Ғазаб қиличларин майдонда таққан,
Ғазо деса танда жонини сотган,

Душманлар танига ўтларни ёқсан,
Юрт эгаси шоҳ Гўрўғли омонми?

Тўрт бурчи оламман юриб танишган.
Ер юзида ундан ўтмас донишманд,
Қўҳиқофда девлар билан олишган,
Чамбилинг эгаси сulton омонми?

Ўйнаб-ўстап жойи анинг Ваянгани,
Ўзининг исмини дейди Ҳасанхон,
Майдон кирса сувдай оқар қизил қон,
Катта ўғли Ҳасан тўра омонми?

Етти ёшда ўзин ютидан кечган,
Сабабман сultonнинг қўлига тушган,
Ота билан онаси хуноба ичган,
Юрт эгаси Аваз тўра омонми?

Бу дунёнинг кечган дунё молидан,
Гўрўғлиниг хабардордир ҳолидан,
Киличин бўяган душман қонидан,
Гўрўғлиниг қирқ йигити омонми?

Гўрўғлиниг бисотида бор эди,
Хотин қиёмати эътибориди,
Иккови ҳам унинг севган ёриди,
Юнус билан Мисқол пари омонми?

Майдон деса ҳаргиз бошин тортмаган,
Гўрўғли сирини халқа айтмаган.
Ғазо деса ҳаргиз қўрқиб қайтмаган,
Барча ётган Ёвмид халқи омонми?

Алқисса, бу сўзни эшитиб, Авазхон қизнинг сўзига ақли лол бўлиб, «Бу қандай киши эканини, шунча Чамбилини орзу-ҳавас қилиб юрап экан, кўрмаган кишилар шунча Чамбилини тавсиф қиласди. Мен бориб туриб шу ердан қайтиб келдим. Мен бекор қилган эканман. Чамбилининг қадрига етмаган эканман», дейди Авазхон. Авазхоннинг қизга қараб бир сўз деб тургани:

Мен сўзладим, сен йигладинг зор-зор,
Чамбилини эшитиб бўлдим бекарор,

Ким авлоди, кимнинг насли бўласан?
Ота зотинг баён этгин, муштипар!

Бундан бурун бу ерларга келмадим,
Пасти баландини мен фарқ қилмадим.
Ким авлодинг, кимнинг насли бўласан?
Мен сенинг ким эканинг билмадим.

Бунда туриб, Чамбилбелни биларсан,
Бир-бир барин унинг баён қиласан.
Ким эканинг, айтгин, энди билайин,
Исеминг нима, сен ўзинг ким бўласан?

Мусулмонча бердинг биэга саломни,
Ким солди бошингга қайғу-alamни.
Ким авлоди, кимнинг насли бўларсан?
Баён бергил отаңг билан онангни!

Айтгин, сенинг ким эканинг билайин,
Қандай зор қақшатиб қўйган худойим,
Оти-зотинг баён қилгил, муштипар,
Мен ҳам сўнг билганим баён қилайин!

Хайрон бўлдим мен эшишиб сўзингни,
Ёшларга тўлдириб икки кўзингни.
Сенда бир хусумат, ўтган ўхшайди,
Баён қилгил, ким эканинг ўзингни!,

Алқисса, буни айтиб Авазхон сўз сўрагандан кейин,
ул қизнинг боз Авазхонга қараб айтиб турган жавоби
турур:

Мен баён қилайин сизга зотимни,
Йўловчи эшифтгин арзи-додимни.
Булдуриқ, қассобининг ўзин қизиман,
Гулжамолдир, менинг отимни сўрсанг.

Кўп кулфатлар солди менинг ёшимдан,
Дарди кўпdir бошимдаги сочимдан,
Кай бирин сизга баён қилайин,
Неча турли савдо ўтди бошимдан.

Зор қақшатиб қўиди бизни худойим,
Отамнинг отидир Булдуриқ қассоб,
Онамнинг исмини сўрсанг, Гулойим.

Ўлим деса қўрқар экан танда жон;
Беҳад юрагимда кўпdir қайғу-ғам.
Етти ёшда кетган Чамбил белина,
Елғиз оғам исмин дейди, Авазхон.

Сувдайин кўзимдан оқар тинмай ёш,
Чамбил деса мен бўларман бебардош,
Етти ёшда бундан борган Авазхон,
Мен эдим шу Авазхонга қариндош:

Етти ёшда кетди султон қўлинда,
Бизлар қақшаб қолдик майдон чўлинда.
Кетганига етти йиллар бўлибди,
Икки кўзим доим Чамбил йўлинда.

Биздан хабар Чамбил элга бормади,
Чамбилни әшишиб тоқат қолмади.
Етти йил бўлибди Чамбил кетганга,
Қайтиб биздан ҳеч бир хабар олмади.

Кеча-кундуз мен йиглайман зор-зор,
Бул ишимга ҳеч бўлмади сабабкор.
Бўлай десам Чамбил элдан хабардор,
Қувватим йўқ, мен бир ночор муштипар.

Иложим йўқ энди, қандай қилай ман,
Кеча-кундуз бирдан тинмай йиглайман¹.
Ҳар қаерда бўлса бўлсин саломат,
Елғиз оғам эсонлигин тилайман.

Омон-эсон қайтиб йўлга кирсангиз,
Боргандан сўнг Авазхонни кўрсангиз,
Елғиз синглинг Гулжамолни кўрдим, деб,
Бориб мендан хабаримни берсангиз.

Гулжамол деб әшифтингиз отимни,
Ҳар қандай қиб етказинг арзи-додимни.

¹ Шевада йиллайман, жилайман.

Кетар вақти яна бунда келсангиз,
Балки ёзиб берай салом хатимни.

Алқисса, буни деб Гулжамол кўзидан ёшини тўкиб
йиглаб турди. Аваҳон ҳушёр бўлиб ўзидан хабар олса,
келиб тўхтаган ўзининг синглиси Гулжамол эканлигини
билиб, отидан тушиб Гулжамолга қараб юриб, айтаётган
сўзи:

Муштипарсан, қилолмадинг сўроғинг,
Бугун яқин қилди йўлнинг йироғин.
Кўнглингдаги мақсадингга етишдинг.
Келгил бери, кўришайлик, чироғим.

Бир бошингни солдинг алам-ҳасратга,
Ўйласангиз жон омонат жасадда.
Етти йилдан бери куйиб йигладинг,
Оқибат етишдинг бугун мақсадга.

Эшигтан сўнг мен англадим сўзингни,
Худо расво қила ёзи ўзимни.
Танимай қолибман сани, Гулжамол,
Худой олган экан менинг кўзимни.

Бошингдан кўчибди қоронги туман,
Йиглай-йиглай юрак-бағринг бўлди қон,
Етти ёшда кетган султон қўлингда,
Келиб турган ёлғиз оғанг Аваҳон.

Етти йил доғимда хуноба ичдинг,
Балки сен ўлди деб баҳримдан кечдинг.
Бир-бирини кўрап экан ўлмаган.
Қайта бошдан мақсадингга етишдинг.

Ман кетганда йиглаб изимдан чопдинг.
Кўзларинг тўрт бўлиб йўлларга боқдинг.
Етти йилдан бери куйиб доғимда,
Охири боз яна оғангни топдинг.

Ажал етган ўлди, дунёдан ўтди,
Неча ғурбат, неча савдолар ўтди.
Бир кунча бўлмади шунча куйганинг,
Тирик банда яна мақсадга етди.

Етти ёшда кетдим султон қўлинда,
Зор қақшаб қолди ҳақдинг чўлинда,
Икки кўзи тўрт бўлганди(р) йўлимда,
Дуогўйим, каъбам, онам омонми?

Ёшлигимда дўстори қиб суйганди,
Етти йил доғимда бирдай куйганди,
Бугун келди деган хабар тийганди,
Дуогўйим, каъбам, онам омонми?

Етти йил менинг йўлимга қараган,
Келарми деб ўтган кунни санаган.
Хабаримни йўловчидан сўраган,
Дуогўйим, каъбам, онам омонми?

«Во бодам», деб кўздан ёшин тўкканди,
Ёшлигимда юзларимдан ўпганди;
Тарбият қиб ўстирганди, кетганди,
Дуогўйим, каъбам, онам омонми?

Улмай туриб тирик доғимни кўрган,
Ўйқидан уйғониб хаёлин бўлган,
Бешигим суюниб оқ сутин берган,
Дуогўйим, каъбам, онам омонми?

Етти йил куйганди бағрини доғлаб,
Боролмаган Чамбил элга сўроқлаб,
Аваҳон эканин аниқ билган сўнг,
Оғажон, деб йиглар белин қучоқлаб.

Яқин қилиб қўйди бугун олисди,
Ёшлигидан душман билан олишди,
Сарҳовуз бошинда ул дам йигиниб,
Ака-сингил — бу иккови топишиди.

Неча кунлар унинг бошиндан ўтди,
Кўп йилдан сўнг энди мақсадга етди,
Кўришиб Аваҳман энди бўлган сўнг,
Югуриб Гулжамол уйига кетди.

Алқисса, Гулжамол акаси Аваҳон билан топишиб,
уйига бориб онасига қараб, суюнчи беринг, деб бир сўз
айтгани:

Юракда қолмади алам-ҳасратинг,
Етти йил куйганди жони жасадинг,
Сөвинчи бер энди менга, онажон,
Бўлди кўнглингдаги асл мақсадинг.

Ховлиқкан юраклар, она, босилди,
Етти йил кўзингдан ёшинг сочилди,
Суюнчи бер энди бизга, онажон,
Қайта бошдан яна кўзинг очилди.

Елғон дема, менинг айтган сўзимни
Етти йил куйдирди доги ўзингни.
Суюнчи бер энди менга, онажон,
Қайтиб берди Чамбил кетган қўзингни.

Кўз ёшинг, она, бугун қурибди,
Кўнглингдаги мақсадингни берибди.
Суюнчи бер, энди бу дам, онажон,
Чамбил кетган Аваз, қўзинг келибди,

Сув олмоққа бордим ҳовуз бошига,
Ёлғиз отлиқ турган экан қошида,
Танимайин мен ҳам, она, оғамни,
Кетган эди менинг оғам ёшинда.

Етти йил кўзингдан ёшларинг оқди,
Сарҳовуз бошинда оғами топдим,
Оғамини таниб, кўришиб бўлган сўнг,
Сизга хабар бергани уйимга чопдим.

Қаёқда болам, деб жойидан турди,
Шул вақтда Авазхон эшикдан кирди.
Етти йилдан бери кетган боласин,
Ўтирган жойида — уйида кўрди.

Етти йил баробар доғида куйди,
Ўзи билан хабари бирга тийди.
Қулоқлаб бўйнидан ул дам Авазнинг,
«Келдингми, болам», деб юзидан сүйди.

Кўнглимда айтувчи боламни кўрсам,
Худонинг тақдирига энди кўнсам.
Юрагимда энди армон қолмади,
Шул замон энди мен олдингда ўлсам.

Бошларимдан ўтди турли аломат —
Ҳар турли душманлар қиади маломат.
Бу дунёдан энди бўлдим ман рози,
Ўлмай кўрдим, болам, тирик, саломат.

Етти йилдир юрагим ғамга тўлди,
Учган қарчиғайдай қўлимга қўнди.
Юрагимда зарра армон қолмади,
Кўнглимдаги менинг мақсадим бўлди.

Душманларнинг куни бўлсин қабоҳат,
Ҳар иш солса қиадим ўзим қаноат.
Чамбилнинг этаси Гўрўғли сulton,
Ўлмасин жаҳонда, бўлсин саломат!

Душманларга доим бўлса юриши,
Менга яхши бўлди қилган бу иши.
Улуғ бўлсин мартабаси бундан ҳам,
Тошга солса сувдай кессин қиличи!

Мушкулимни яна қилганди онсон,
Душманини қилсин ер билан яксон!
Кундан-кунга ортиқ бўлсин давлати,
Бўлсин у гўёки Рустами достон!

Алқисса, буни деб онаси билан топишиб ўтириди. Шу ҳолда бир киши четдан англаб Авазхоннинг отасига чопиб кетди. Булдуриқ қассобга борди. «Боланг келди», деб Булдуриқ қассобдан суюнчи олди. Гўштлар бариси чангалда қолди. Бўз йўргага миниб Булдуриқ қассоб ҳовлига солди. Келган бўйича дарвозадан кирди, отидан тушиб, йиграб, ўғлига қараб юрди, эшикнинг олдига келган вақтида:

— Ота, кирма! — деди. Булдуриқ қассоб эшик олдида турди. Булдуриқ қассобнинг ташқарида туриб айтган сўзи:

Сенинг учун, болам, рангим сарғайди,
Хазон урган гулдай, болам, мунгайдим.
Омон бўлсин дедим менинг ёғизим,
Дуо қилиб доим қўлимни ёйдим.

Жон чиқиб мен яқин келиб ўлмоққа,
Фурсатим бўлмади гўшни бўлмоққа,

Етти йилдан бери сени соғиндим,
Интизорид отанг, сени кўрмоқقا.

Мен тополмай қолдим босган изингни,
Ушлаб қолдим бори ёлғиз қизимни.
Мақсадинг не бўлса айтгин, жон қўзим,
Тезроқ кириб мен кўрайин юзингни.

Нима бўлса мақсадингни берайин,
То ўлгунча энди сенга эрайин.
Етти йилдан бери отанг соғинган,
Тезроқ кириб жамолингни кўрайин.

Алқисса, буни деб Булдуриқ қассоб әшикнинг оғзида
турди. Аваҳон отасига қараб биро сўз деб тургани:

Сенинг, ота, мен ниманги тилайман,
Сенинг нарсанг олиб нима қилайин.
Қандай савдо солса букун бошимга,
Мард бўлсам, ота, энди чидайман.

Мен қўйганман бошқа орзу — ҳавасди,
Бул юришинг, ота, сенинг абасди,
Бир от билан менга бўлар яроғим,
Бошқа нарса менга даркор әмасди.

Мен келганман мақсадимдир топишмоқ,
Душман билан талашиб энди ёришмоқ.
Кўнглимда йўқ энди бошқа мақсадим,
Мақсадим шул, душман билан олишмоқ.

Етти ёшда тушдим султон қўлига,
Қарамас эр йигит ўнги-сўлига,
Кўзим юмиб от қўярман душманга,
Мен тушганман Гўрўғлиниг йўлига.

Устимга, ота, қандай кирарсиз,
Хунхорош йўлида ҳозир юрарсиз.
Гўрўғли йўлига токи кирмасанг,
Қандай қилиб Аваҳонни кўрарсиз?

Айтганинга менинг, ота, юрсангиз,
Гўрўғлиниг йўлларига кирсангиз,

Елғиз болам эди десанг, болангни,
Сўнгра мендай болангизни кўрсангиз.

Гўрўғли бергани қалқон бошимда,
Сендан мен кетганман етти ёшимда.
Гўрўғлиниг йўлларига кирсангиз,
Сўнгра келинг, ота, менинг қошимга.

Қулоқ солинг, ота, менинг сўзимга,
Мақсадимни энди айтдим ўзингга.
Гўрўғли йўлига агар кирмасанг,
Кета бер, ота, кўринмай кўзимга.

Аваҳонни қилмагин энди гумон,
Душманга соларман қоронғи туман,
Сиздай ота менга керак әмасди(р).
Менинг отам экан Гўрўғли султон.

Бу сўзидан энди Аваҳ адашмас,
Таваккал қиласанг, тангри қарашмас,
Гўрўғлидан қайтиб сизни отам деб,
Аваҳон отимга бу иш ярамас.

Алқисса, бу сўзни Аваҳондан әшитиб, Булдуриқ
қассоб:

— Мен Чамбидан болам келди десам, бошимга бир
бало келган экан, сендай болани борингдан йўғинг, очинг-
дан тўқинг, манга керак әмас,— деди. Отига миниб, дар-
возадан чиқиб, қайтариб йўлга солди. Тўппа-тўғри Хун-
хорошоҳнинг олдига борди. Хунхорошоҳга салом берди.
Хунхорош Булдуриқ қассобга қараб:

— Эй Булдуриқ қассоб, сенинг Аваҳ боланг келди,
деб әшитдик. Аваҳоннинг келгани ёлғонми?— деди.
Булдуриқ қассоб:

— Рост,— деди.

— Рост бўлса, етти йилдан бери кетган боланг кел-
ган бўлса, сен бу ёқларда нимага юрибсан?— деди. Шун-
да Булдуриқ қассоб Хунхорошоҳга қараб бир сўз деб
тургани:

Бориб эдим Аваҳонни кўргани,
Менга ботди Гўрўғлига кўнгани.
Ёмон фарзанд юзи қурсин, султоним,
Бу кунлардан яхши эди ўлганим.

Душманга бостириди менинг изимни,
Еганларим душман бўлар тузимни.
Қандай қилиб ҳалқ юзига қаарман,
Ўз элимга қора қилди юзимни.

Бу ердан Гўрўғли олиб борибди,
Жувонмаргни ўз йўлига солибди,
Эшитиб сўзини, англаб кўнглини.
Шул сабабдан менинг кўнглим қолибди.

Мени билан энди бирга юр, дейди.
Гўрўғли йўлига сен ҳам кир, дейди.
Инномасанг менинг билан бориб сан,
Чамбилбелни кўзинг билан кўр, дейди.

Гуржистон баҳридан қандай ўтарман,
Чамбил бориб не мақсадга етарман.
Бунда қолса әли хеши оғайни,
Бир бола деб қандай Чамбил кетарман?

Аламим келаман ичга сиғолмай,
Келган билан ўтири¹ Чамбилни қиёлмай,
Гўрўғлининг йўлларига кир, дейди,
Бу сўзни айтади сира уялмай.

Бир савдони солар дедим бошимга,
Кетиб эди бундан етти ёшинда.
Англаб хаёlinи, әшитиб сўзини,
Ҳозир қочиб келдим сенинг ёнингга.

Бориб кўрдим, ҳеч нарсани билмайди,
Одамзодни дим назарга илмайди.
Ҳазар қилмай шу сўзларни айтади,
«Ўламан» деб парвойига келмайди.

Ёмон бузуқ кўринади сўзлари,
Билмайман кўпчиликми ўвлари?..
Англамайн кўриб қолдим боргандан,
Юрагимдан ўтиб кетди сўзлари.

¹ Утирибди.

Алқисса, буни әшитиб Хунхоршоҳ Булдуриқ қассобдан сўради:

— Агар Авазхон шундай бўлиб келган бўлса, Гўрўғлининг Гиротини миниб келгандир.— Булдуриқ қассоб айтади:

— Билмайман, бир кўк отни миниб келибди, якка михга узун боғлаб қўйибди, лекин осмондаги булатни кўзлаб турибди,— деди. Хунхоршоҳ туриб айтади:

— Ўзи кўк от бўлса, осмондаги булатни кўзлаб турса, шул Гўрўғли отининг нақ ўзи. Биз бу ердан аскар йиғсак, абур-дуббурни әшитгандан кейин, у отига минади. Гўрўғлининг Гироти бўлса, дарвозаларни беркитиб қалъага қамаган билан кор қилмайди. Гўрўғлининг отига кўча ҳам бир, қалъа ҳам бир. Кўргоннинг дуч келган жойидан сакратиб чиқиб кетади. Майдонга чиққандан кейин, қочса қутулади. Қувса етади, қочиб-қочиб урушиб ҳаммани қириб кетади,— деб Хунхоршоҳ ўзининг ёронларига қараб бир сўз деб тургани:

Бориб Аваз Гўрўғлиман танишди,
Етти ёшда ўзимизман олишди.
Ўзимиздан чиққан бало Авазхон,
Қайтадан боз ўзимизга ёпишди.

Мана, ўз отаси хабар берибди,
Кўзи билан уни бориб кўрибди,
Келиб ўтирибди дейди уйинда,
Бундан борган шунқор Аваз келибди.

Гўрўғлининг Гиротини минибди,
Гўрўғли сўзига Аваз кирибди.
Олишмоққа бугун бизман Авазхон,
Талаб тортиб шунқор Аваз келибди.
Унинг таърифин кўп баён этса бўлmas,
Зўрлаб анга кўп жавлон этса бўлmas,
Айёрлиги, Аваз бадбаҳт, зиёдди(р).
Уни амал билан боз тутса бўлmas.

Етти ёшда бундан Чамбил борганди,
Шул вақтда ҳам қанча савдо солганди,
Олишмоққа талаб қилиб биз билан,
Гўрўғлининг Гиротини олганди.

Ботирлик нисбати ўнга қўнганди,
Куч-ғайратга энди анча тўлганди,
Етти йил Гўрўғлиниг қўлинда
Аваз бадбаҳт, бизга душман бўлганди.

Олишиб уdda қилмас анча одам,
Хўнарман келтирсак Авазни қўлга.

Саркарда, вазирлар қолмай келинглар,
Бир маслаҳат қилиб энди кўринглар.
Эшитиб шошибман ҳозир ақлимдан,
Оғайнilar, бир маслаҳат беринглар.

Тўғри келмас бугун майдон бормоққа,
Аваз келган бизга оғат солмоққа.
Майдонда олишиб уdda қилмасмиз,
Бир ҳийламан они қўлга Олмоққа.

Аямайди Аваз ўзининг жонини,
Кесиб олсанг, ваҳ, демайди сонини.
Азалдан у бўри мижоз жувормарг,
Кўп одамнинг тўкиб кетар қонини.

Алқисса, бу сўзни Хунхоршоҳдан эшитиб, саркарда, вазирлар ҳар қайсиси ҳар сўзни айттаётir. Шунда Хунхоршоҳнинг олдида ўтирадиган бир вазiri бор әди. Шу туриб айтди:

— Эй, халойиқ, кўпчувламанглар. Кўп сўз керак эмас. Тўрт оғиз сўз билан Авазхон келса келгани, агар келмаса — кетгани. Мана Жоми саркарда, вазирлардан айрилинглар, йигирма-ўттиз киши бўлинглар, яроғсиз бўлиб, Авазнинг олдига элчи бўлиб боринглар. Бориб Авазга салом беринглар. Икки қўлингизни кўқракларингизга олиб, таъзим бериб туринглар. Авазхон сизлардан сўрайди. «Не мақсад билан келдингизлар?» дейди. Шунда сизлар айтинглар: «Хунхоршоҳ сизни таклиф қилди», — дengлар. Авазхон сўрайдики: «Хунхоршоҳ бурун бизга дўст бўлгани билан, ҳозир бизга душман бўлган. Гўрўғлиниг ҳар кимики душмани бўлса, бизнинг ҳам душманимиз. Хунхоршоҳ қандай, душман кишини таклиф қилади?» деб Авазхон айтади. Шунда сизлар айтингизларки, «Отангиз Хунхоршоҳга бориб бу сўзни айтди. Шунда Хунхоршоҳ отангизни кўп койиди. Болангнинг айтганини қилмассанг,

кимни айтганини қиласан, боринг, айтинглар, Авазхон бу ерга келсин. Гўрўғлиниг йўлни бизга таълим берсин. Авазхонга маъқул бўлган бўлса, бизга ҳам маъқул, — деб айтди. Гўрўғли билан икковимиз араз эдик, очди қиласин, яратирисин, икковимиз душман эдик, дўст қиласин. Гўрўғлига қиёматли фарзанд бўлган бўлса, бизга ҳам қиёматли фарзанд бўлсин. Сўнгра бу ерда юрсин, хоҳласин Чамбила юрсин, деб Хунхоршоҳ бизларни юборди, дengлар! Шу сўзга тушиб агар Авазхон келиб қолса, сўнгра жонимиз йўқми? Авазхонни боғлаб олайлик, агарда келмаса — кетгани, деди. Шу билан Хунхоршоҳ йигирма-ўттиз кишини жўнатди. Юборган одамлар Авазхоннинг олдига келди. Ҳаммаси қўл қовуштириб салом берди.

— Йўл бўлсин сизларга? — деб Авазхон сўраб әди. Уша ёқдан ўргатиб юборган сўзларини қолдирмасдан айтдилар. Авазхон отига миниб, булар билан қўшилиб кела берди. Хунхоршоҳнинг олдига бормоққа бир дарвоза қолди. Энди отдан тушиб пиёда бўлди. Ичкарида Хунхоршоҳнинг олдига қараб юрди. Жами заррин курсида ўтирганлар, заррин камар боғлаганлар ва тиллочин таққанлар ва атсанган полвонлар ва байроқ кўтарган саркардалар икки ёқда бўлниб таъзим бериб турдилар. Авазхон ўттада юриб келяпти. Эшикнинг олдида турган дарбанд кўриб:

— Авазхон келди! — деди. Шунда Хунхоршоҳ олдида вазирига қараб айтдики:

— Узимизнинг ҳали бир ишимиз хато экан. Авазхонни синаб кўрмасдан, келгандан ўлдирсак, бул қандай бўлар экан? Е бир, ё икки синовга қўйсак, бир киши агар сездириб юборса, Авазхон отнинг белига миниб, бир қайтадан чиқиб кетса, сўнгра қўлга тушириб бўлмас әди. Вазир туриб айтди:

— Ундаи бўлса, Авазхон сизнинг олдингизга келиб кўришиб ўтиргандан кейин: — Эй Авазхон, сени етти йилдан бери овозварингни, мақомларингни бизлар кўп соғинидик. Мана бу созни қўлинга олсанг, бизга бир беш-олти байт айтиб берсанг. Шунда бошқа сўзни қўйгиш. Гўрўғли билан биз икковимизнинг сифатимизни айт, деб қўлига созни беринг! Унинг сўзидан кўнглининг қандай эканлигини биламиш! Бу маслаҳатни қилиб бўлган замони Авазхон ҳам келиб эшикдан кирди. Хунхоршоҳ иргиб ўридан турди. Келиб, Хунхоршоҳ билан кўришиб, Авазхон Хунхоршоҳнинг ёнига ўтириди. Авазхонни кўриб Хунхоршоҳнинг юрагига титрама пайдо бўлди. Хунхоршоҳ айтди:

— Эй Аваҳон, аввалда етти йил бизнинг қўлими эдә юрдинг, етти йил Гўрўғлининг қўлига бориб турдинг. Ешиликдан жаҳонгашта бўлдинг. Яна қайтиб келдинг. Икки юртни бирдай кўрдинг. Бизлар сенинг овозингни ва маҳомларингни қўп соғиниб қолдик. Ҳозир бошқа сўзларни қўй. Бизга беш-олти ашула айтиб бергин, шунда бошқа сўз айтгина. Гўрўғли ва икковимизнинг сифатимизни айтгина! — деб Аваҳоннинг қўлига созни берди. Аваҳон қўлига тилла созни олиб, оғзиға сўзни олиб, Хунхоршоҳга қараб бир сўз деб тургани:

Етти ёшда бундан кетди Аваҳон,
Отам менинг бўлди Гўрўғли султон.

Юз минг армон билан, Хунхор, ўтарсан,
Ўлганча дунёга жавлон этарсан,
Ер юзини олиб бўлсанг шаҳаншоҳ,
Тожи тахтинг бир кун ташлаб кетарсан.

Бу сўзларни ўйла, Хунхор, танингга,
Мағрур бўлма, сен қўп дунё молингга.
Ажал етиб, кунинг битса, Хунхоршоҳ,
Дунёнг ори етишмас ҳаргиз жонингга.

Аваҳонман, тўғри сўзни сўйлайман,
Сендан қўрқмай тўғри сўзни куйлайман,
Бир кун бўлдим охир бир кун ўларман,
Бу фикрни лекин қаттиқ ўйлайман.

Бу дунёдан ҳеч ким кўнгли тўлмайди,
Бардош қилмай бошга давлат қўнмайди.
Ҳар кимики агар қўрқса жонидан,
Таваккалчи бўлмай ботир бўлмайди.

Етти йил бўлдим Гўрўғли қўлида,
Қарадим кўз очиб ўнгу сўлимга,
Хоҳладим мен, кирдим онинг йўлига,
Таваккалчи жойин, Чамбила кўрдим.

Дунёнинг ҳисобин доим ўйлаган,
Бу дунёдан то ўлгунча тўймаган.
Нафси учун хушомад сўз сўйлаган,
Руҳоний жойин шу элда кўрдим.

Таълим олдим Гўрўғлининг ўзидан,
Душман кўrsa, ботир қўрқар қўзидан,
Ўлмайин қайтмайди айтган сўзидан,
Чин ботирнинг жойин Чамбила кўрдим.

Ўзидан бошқани қўзга илмаган,
Қайси кун ўларин банда билмаган.
Ботирлик ҳавасин сира қилмаган,
Нокаснинг жойини шу ерда кўрдим.

Ҳавас қилмай кечган дунё — молидан,
Ғазо деса кечар танда жонидан,
Қиличин бўяган душман қонидан,
Йигитнинг султонин Чамбила кўрдим.

Кўрмадим бу элда бедов сарасин,
Яқинда деб айтса душман орасин,
Ботири қўрсатмай қочар қорасин,
Қўрқоқнинг конини шу элда кўрдим.

Ғазаб қиличини қиндан тортади,
Ғазо деса майдонда жон сотади.
Тоғ дуч келса чангалида отади,
Йигитнинг арслонин Чамбила кўрдим.

Евни кўрмай гайратига тошади,
Душманинг қорасин кўrsa шошади,
Қирқ минг бўлса, бир ўзбекдан қочади,
Одамнинг нокасин шу элда кўрдим.

Гўрўғлининг оти маълум Арслон,
Зомонида бундан ўтмас донишманд.
Кеча-кундуз душман билан олишган,
Чамбила йигитнинг полвонин кўрдим.

Талабгор дегани майдон қуролмас,
Жавоб айтиб душманига туролмас,
Минги бир ўзбекка жавоб беролмас,
Нокаснинг жойини шу элда кўрдим.

Душманинг устига қиласр юришини,
Қинидан суғурар олмас қиличини.
Тикилганда олар ҳаводан қушни,
Бедовнинг сарасин Чамбила кўрдим.

Минган одам мақсадига етолмас,
Қочса ундан халос бўлиб кетолмас,
Чу, деганда бир зовурдан ўтолмас,
Калта бўйин ёбин¹ шу элда кўрдим.

Лафзим бир, қайтмасман оллои билла,
Чамбил бориб бўлди демагил мулло,
Мискинларга беради тангаман тилло,
Сахийнинг жойини Чамбила кўрдим.

Ўлганича бирдай дунё йигади,
Ичмай-емай бир нафсидан қияди,
Елғон сўйлаб жон-имони қуяди,
Судхўринг жойини шу элда кўрдим.

Алқисса, буни эшитиб Хунхоршоҳ Авазхоннинг Гўрўғлига берилиб кетганини билди. «Жаллод!— деди шу вақтда,— бошини кес, ўзини дорга торт!»— деб ҳукм қилди. Жаллодлар келиб Авазхоннинг икки қўлини бойлади. Бўйнига гулни солди, дорнинг остига қараб олиб кета берди. Авазхоннинг онаси билан синглиси. «Уни нима қиласкан?» деб орқасидан келган эди. Дарвозанинг олдида туриб эди. Шу ҳолда Авазхонни жаллодлар дорнинг остига олиб кета берди. Икки қўли олдига бойланган, бўйнида гул, дорнинг остига қараб кета берди. Буни кўриб онаси зор-зор йиглаб, катта вазир, саркардаларга қараб, айтётган сўзи:

Тингламассиз энди айтсам сўзимни,
Етти йил куйдирган доғи ўзимни.
Авазхоннинг на бўлдийкин гуноҳи,
Ўлдирап бўлдинглар бугун қўзимни.

Иложи йўқ, энди қандай қилайин,
Бир умрга зор қақшатдинг худойим.
Қандай ҳукм күшга лозим бўлибди,
Айтиб ўлдиринглар, қўзим гуноҳин.

Изват билан бердингизлар саломни,
Оқибат солдинглар қайгу-аламни.

Мен билмайман қандай, Аваз гуноҳи,
Айтиб ўлдиринглар, жоним боламни.

Амал билан борди душман қошига,
Энди раҳми келмас қўзда ёшима,
Ота-онам дединг, келдинг Чамбилац,
Ахир отанг етар бўлди бошингга.

Интизор бўп юарар эдим йўлингдан,
Миргазаблар олиб ўнгу сўлингдан;
Нега келдинг юра бермай Чамбилац,
Ҳеч иш келмас энди менинг қўлимдан.

Етти йил йиглади, онанг тинмади,
Гуржистондан кетди деб гумон қилмади,
Келиб тушдинг золимларнинг қўлига,
Гўрўғлидай арслон отанг билмади.

Ҳеч ким аҳволингдан хабар олмайди,
Дод десам, дедим, Чамбил бормайди.
Айёрликман олди душман бандига,
Энди бул сўзимга қулоқ солмайди.

Кеча-кундуз зор йигладим тинмадим,
Бундай бўлар деб мен гумон қилмадим.
Армой билан тушдинг душман қўлига,
Душман эканини бунинг билмадинг.

Миргазабларнинг қўлида боғланиб кетиб бораётганида
онасига қараб Авазхоннинг айтган сўзи:

Ушбу дамни, жоним она, дам дема,
То ўлгунча бу давлатни кам дема.
Тақдиримда нима бўлса қўрарман,
Ҳақ ноҳақ бўлмайди, она, ғам ема.

Кўп йигламанг бетоқат бўп зор-зор,
Йиглассангиз мен бўларман беқарор.
Таваккал ўзига қиб тўхтагил,
Ҳамманинг ҳолидан ўзи хабардор.

Хунхор аҳмоқ, ҳеч нарсани билмайди,
Ўлмоқ, Аваз, парвойига келмайди,

¹ Хашаки от.

Ҳақни ноҳақ энди сира қилмайди,
Куни битмай, лекин чибин ўлмайди.

Ҳазон урмай боғда гуллар сўлмайди,
Таваккалчи эрни ўзи қўллайди.
Чин ажали етса агар одамнинг,
Қочган билан одам ҳалос бўлмайди.

Йиғлаганиман душман қулоқ соларми?
Душманлар сўзингни қабул қиласми?
Чин ажали етса агар одамнинг,
Үйида ўтирган ўлмай қоларми?

Ажал етса ўлдиради болангни,
Менинг учун чекманг дого аламни!
АЗроил эмасди Ҳунхор, онажон,
Ким ўлдириб әди ота-онангни?!

Душманларда шундайгина одат бор,
Барча жонга анинг ўзи мададкор,
Ажали етмаган бўлса Авазнинг,
Бир заррадан ўзи қиласабкор!

Ҳозир, Ҳунхор, ҳеч нарсани билмайди,
Минг йиғлаганиман назарига илмайди.
Бекорга ялинма, она, душманга,
Йиғлаганиман душман раҳми келмайди.

Букун бошлаб бу савдони кўрганим,
Англамай Ҳунхорга банди бўлганим,
Жондан қўрқиб ялинганча душманга,
Ундан яхшироқди(р) менинг ўлганим.

Алқисса, бу сўзни эшишиб онасининг душманларга ва
саркарда — вазирларга қараб бир сўз деб тургани:

Катталар тинглар айтган сўзимни,
Зор қақшатманг бунча менинг ўзимни!
Етти ёшда олиб кетди Гўрўғли,
Ҳаммангиз биласиз Аваз қўзимни.

Авазни олиб Чамбилбелга борганди,
Аваз раъйин топиб кўнглин олганди.
Яхши сўзман олиб Аваз ақлини,
Шунинг билан ўз йўлига солганди.

Хоҳламаса бу етти йил турмайди,
Етти йил қўлинда анинг турмайди.
Яхши галман олган Аваз кўнглини,
Қўрқиб Аваз у йўлига олмайди.

Аваз учун ҳеч ким жавлон этмайди,
Жондан қўрқсан ҳеч мақсадга етмайди.
Ўлдирганиман бугун сизлар Авазни,
Гўрўғлининг ҳеч нарсаси кетмайди.

Қўлинда омонди(р) Чамбил қалъаси,
Шунда ҳам қолмайди кўзин оласи,
Гўрўғли-чун ўлдирасиз Авазни,
Аваз асли ўзи кимнинг боласи?!

Англайсизми менинг айтган сўзимни,
Ўз-ўзингни сен ўярсан кўзингни.
Гўрўғлининг ҳеч нарсаси кетмайди,
Ўлдирасан бекорга ўз-ўзингни...

Чамбилбелга борми бурун борганинг,
Бундай савдоларга бошинг согланинг?
Ўлдирасанг Чамбилнинг бориб чўпонин,
Гўрўғлидан янча тенглик олганинг.

Алқисса, онаси шу сўзни айтиб, йиғлаб, зоти бошқа,
жинси бошқа-да, етти йил сақлаб Аваҳонни ўз йўлига
киргизди. Сенлар оғайни бўлиб, етти кун ҳам сақламасдан
Аваҳоннинг келгани ҳам шу бугун, сени ўлдирайин дея-
ётганинг ҳам шу бугун. Бир беш-олти кун зиндонга солиб
панди насиҳат қилиб кўрсанглар, шояд йўлдан қайтса, на-
сиҳатларингни қулоқка олса, шу билан Аваҳон ўлмай қол-
са, шунда ҳам йўлидан қайтмаса, сўнгра чиқариб оссангиз-
лар ҳам майли эди. Лекин Аваҳоний ўлдирган билан
Гўрўғлининг ҳеч нарсаси кетмайди. Аваҳон Булдуриқ қас-
собдан бўлган, мендан туғилган. Гўрўғлига элакишиб, ўз
элингдан чиқкан бир ботирингни ўлдириб қўйганча, бунинг
раъйини топиб, қўлингга олганинг яхшироқ эмасми?—
деди. Душманлар Аваҳоннинг онасидан бу сўзни эшишиб,
бир-бирига қараб айтди:

— Ҳунхоршоҳ Аваҳоннинг онасиҷалик ақли йўқ
екан,— деди. Тўхтаб маслаҳат қилдилар. Шу Аваҳни Ҳун-

хорнинг сиртидан қирқ кунга муҳлат қилиб, зинданга ташгайлик. Қирқ кунгача зинданда ётсин, зинданнинг азобини тортсин. Қайтса қирқ кунгача қайтсан, қайтмаса қайтмаганлигини айтсан! Қайтмаса сўнгра чиқариб дорга осмоқ керак. «Шу ишни ким қилди?» деб Хунхороҳ сўраса, ҳаммамиз қилдик, деб айтайлик,— деди. Шу маслаҳат билан Авазхонни қирқ кун зинданга солди. Қайтиб Хунхороҳнинг олдига борди.

— Не қилдинглар?— деб Хунхороҳ сўради.

— Қирқ кун муҳлат қилиб Авазхонни зинданга солдик,— деди. Бу сўзни эшишиб, Хунхороҳ:

— Ажаб қилибсизлар, мен ҳам ўзим айтиб, ўзим қайтаромлай турувдим. Шу ишга кўп хафа бўлиб ўтирган эдим,— деди. Шунда Авазхонни зинданда ётиб айтатганд сўзи:

Оҳ уриб тўкарман кўздан ёшимни,
Қора зинданларга солдим бошимни.
Ўлсам мендан рози бўлмас Гўрўғли,
Ҳақлаёлмай кетдим берган ошигнни.

Етти йил юрдим Чамбила бек бўлиб,
Дарду алам юрагимда кўп бўлиб,
Ўз элим келиб Чамбилбелиндан.
Зинданда ётарман кўзим тўрт бўлиб.

Тушдим букун Гуржистоннинг йўлига,
Душманлар айланди ўнгу сўлимга.
Ўларман деб парвойимга келмайди,
Отин ўлжа қилдим душман қўлига.

Бир сўз билан Чамбил баҳридан кечдим,
Қанот бойлаб Гуржистон қараб учдим.
Ўз элимга келиб шудир кўрганим,
Армон билан қора зинданга тушдим.

Гўрўғлига нега хизмат этмадим?
Гуржистон баҳридан нега ўтмадим?
Ўйлаган мақсадим менинг бўлмади,
Кўнглимдаги мақсадимга етмадим.

Чамбилбелда юрмай бунда келарман,
Хомтамали хаёлига эарман,

Бунда келиб тушиб зиндан остига,
Гўрўғлига қандай хабар берарман?

Ажал етса бу зинданда ўларман,
Ўлим деган тақдирли иш, кўнарман.
Етти йилдан бери еган тузимни,
Отамии уялмай, қандай кўрарман.

Буни деб Авазхон зинданда ётди. Хунхороҳ Авазхонни зинданга согандан сўнг:— Бир тилладан дор ясанглар, агар Авазхон Гўрўғлидан қайтса, қайтиб ўз йўлимга кирса, иқлими вилоят бераман, еб ётадиган мамлакат бераман, айтганини қурол қиласман, суйганини ҳадол қиласман. Яна ёрти подшолик амал бераман, шу тилла дорни ҳам Авазга бераман. Агар қирқ кунгача қайтмаса, Авазхонни ўзини шу тилла дорга чиқариб осаман,— деди. Шундай деб, Хунхороҳ сўзини тамом этди.

Эндиғи сўз Чамбилағи Гўрўғлига кетди. У куни Гўрўғли қирқ йигит билан шароб ичиб маст бўлиб ётди. Эртасига шароб ичган вақти бўлди. Гўрўғли ҳушёр бўлиб жойидан турди. Ўзидан хабардор бўлиб, Гўрўғли кўзини очиб қараса, ҳам хотинидан айрилибди, ҳамда Авазхон боласидан айрилибди. Чиқиб буни излайлик деса, Авазхоннинг ва хотинининг қаёққа кетганини билмайди. Гўрўғлиниг бир чиллахонаси бор эди: ҳар доим бошига шундай иш тушган вақтида шу чиллахонага кириб ётар эди. Чиллахонада қандай сир кўрса, шунга қараб иш кўрар эди. У кун Гўрўғли чиллахонага кириб ётиб қолди. Чамбилбели гўёки әгасиздай бўлди. Қирқ кун чиллахонада ётди. Қирқ кундан сўнг Гўрўғли султон чиллахонадан чиқиб, қирқ йигитга қараб бир сўз деб тургани:

Неча гавғоларга бошимни солдим,
Қасд қилган жойимни қўймайин олдим.
Армон билан Авазхондан айрилиб,
Кўзларим тўрт бўлиб Чамбила қолдим.

Айрилибман бисотимда боримдан,
Авазхондай яна аждахоримдан.
Сарсон бўлиб бугун қолдим йўлларда,
Ҳам айрилиб икки бирдай ёримдан.

Йиғлаб келди, от белига минмадим,
Кўнглидаги муддаосин қилмадим,

Оқибатда қолдим бундай айрилиб,
Аваэхондай әрнинг қадрин билмадим.

Бир бошим чиқмади қайғу-аламдан,
Билсам жон чиққунча излай ташамдан,
Аваэхоннинг бугун қадрин билмайиц,
Армон билан айрилдим жоним боламдан.

Аваз экан бошда тожу давлатим,
Ҳам сиёсат, ҳам ул шаъну шавкатим.
Юрагимда қолмас эди армоним,
Бир кўриб ўлсам Аваз қоматин.

Қўйдим йигиб, барча орзу-ҳавасни,
Тирикман деганим энди абасди,
Агар, то кўрмасам қайтиб Авазни,
Бу тожу таҳт менга даркор әмасди(р).

Қариганда худойим қилди сарсон,
Бўлгаймикан яна мушкулим осон?
Онасидан туғиб келмас дунёга,
Аваэхон сифатли энди бу арслон,

Аваз экан бу Чамбилда ободим,
Турмоққа йўқ энди менда тоқатим.
Аваэхон борида қадрин билмайин,
Армон билан бугун синди қанотим.

На бўларкан энди ҳолим, билмадим.
Кетар деб, Авазни гумон қилмадим.
Ул кун олиб бориб сардор қизини
Армонсиз бўп мен олдида ўлмадим.

Билсам сўроғинда отлар чопарман,
Ўз жонимга ўзим ўтлар ёқарман.
Айрилиб армонман Аваз қўзимдан,
Энди ман сўроғин қайдан топарман?

Эшитинглар, бу сўзимни ҳалойиқ,
Ушбу савдо бизга бўлди илойиқ.
Хафа бўлдик ётиб Чамбилбелинда,
Ҳовдак кўлдан бориб шикор қилайик.

У кун олиб бермай сардор қизини,
Бир кўрмоққа зор бўлдим-ку юзини.
Ҳовдак кўлни бориб овлаб келайик,
Топармизми Аваз босган изини?

Добилларни әгарларга чолинглар,
Лочин қушлар яна қўлга олинглар!
Ҳовдак кўлни бориб овлаб келайик,
Бизнинг билан Ҳовдак кўлга боринглар!

Билмам қайда бўлди Аваз сафари,
Киши билмас йўлда хавфи хатарин,
Ҳовдак кўлни бориб овлаб келайик,
Билармизми Авазхонни хабарин.

Подачи, чўпонни, даштни кўрармиз,
Кимни кўрсанк Авазхонни сўрармиз.
Бу ишларни худо солди бошимга,
Мол йўқотган биз йўқидай бўлармиз.

Қийин савдо бугун тушди бошимга,
Етган вақти ўзим ўрта ёшимга.
Бизлар чиқиб сўрамасак Авазни,
Ким келиб айтади менинг қошимга?

Сарғайиб ётганча бунда ғамига,
Ўзим жабр қилдим ўзим жонимга.
Аваэхонни бугун излаб топмасам,
Муносиб әмасди менинг шаънимга.

Алқисса, Гўрўғли султон бу сўзларни айтгандан кейин
қирқ йигит эшитиб отларга әгар солди, отларни таҳтлаб,
добилларни әгарнинг қошига солди. Лочин қушларни
қўлларига олди ва Гўрўғли, Ҳасанхон, қирқ йигит би-
лан шикор қилмоққа Ҳовдакнинг кўлига борди. Гўрўғли
султон Ҳовдак кўлини бошига бориб, бир фикр
кўнглига тушиб, Ҳовдак кўлига қараб бир сўз деб тур-
гани:

Ботирларни ботир қилган чор анжом,
Йигирма ўнда бўлдим Чамбила хон,
Бундай хафа бўлганим йўқ умримда,
Бу ерлардан ўтдимикан Авазхон?

Синди бугун қанотларим қайрилиб,
Қия юриб, қиё йўлдан тойрилиб.
Энди бул юришлар менга ярашмас,
Ҳам боламдан, ҳам ёримдан айрилиб.

Учади ҳавога Ҳовдакнинг қуши,
Майдонда сарф бўлар ботирнинг кучи,
Аваэ экан маним шикор қилмоғим,
Бу ишлар бир бегам одамнинг иши.

Икки болам бирори йўқ қошимда,
Аваэни келтиридим етти ёшинда,
Шошганимман менинг шикор қилганим,
Дунёнинг кулфати туриб бошимда.

Кўзинг очиб, ўзинг ҳарёна боққил,
Аваэ сўроғинда отингни чопқил!
Аввал кетган Аваэ қўзингни топқил,
Сўнгра келиб, Ҳовдакда довулни қоққил!

Алқисса, буни деб Гўрўғли султон отдан тушиб, Ғиротни ҳайдаб юборди. Қўлидаги қушни ҳам қўйиб юборди. Бир жарнинг соясига, пешанасини ерга қўйиб ётиб қолди. Ҳасанхон ҳам бўлса отни ҳайдаб юбориб, қушни ҳам қўйиб юбориб, у ҳам бир жойда ётиб қолди. Гўрўғли билан Ҳасанхон бундай бўлгандан кейин, қирқ йигитлар ҳам отларини ҳайдаб юбориб, ҳар қайсиси ҳар ерда ётиб қолди. Гўрўғли билан Ҳасанхоннинг ғамгин бўлганлигига «бекор қилган әканмиз» деб, қирқ йигит ўзларининг қилган ишларига пушаймон қилиб, булар хафа бўлиб, дараҳтнинг соясида, ҳар ерда ётди. Лекин Тўлаб ботир бир соянинг қуюқ жойини топиб бепарво ухлаб ётди. Шу ҳолатда кун кеч бўлди. Қирқ йигит отларини ушлаб-ушлаб Гўрўғлининг олдига келди.

— Энди султон, марҳамат қилсангиз, кун кеч бўлди, энди шаҳарга қайтсак,— деди. Ғиротни келтириди. Гўрўғли султон жойидан турди. Ҳасанхон ҳам келди. Ғиротни келтириб, Ҳасанхон қўлтиғидан суяб Гўрўғлини отга миндирди. Ҳасанхон Жийронқуш отига минмай, отнинг тизгинини Гўрўғлига қараб узатиб, бир сўз деб тургани:

Эшитинг бу дамда арзи-додимни,
Келиб кўрдим Чамбил мамлакатингни.

Шунча тўра бўлганингиз бўлади,
Ол қўлингга Жийронқушдай отингни.

Ман англадим, Ёвмид элинг қарашмас,
Агар билса сизман мунча талашмас,
Аваэхон кетибди бугун Чамбилдан,
Бизга энди бунда юрмоқ ярашмас.

Аваэхон йўқ, тожу тахтин нетарман?
Бу шаъну шавкат баҳридан ўтарман.
Олинг энди биздан отман ярогинг,
Жавоб беринг, энди мен ҳам кетарман!

Ботирлар майдонда жснидан кечар,
Зиёт эмас бугун Аваэ Ҳасандан,
Бу савдо менинг ҳам бошимга тушар.

У кун Аваэ йиглаб борди қошингга,
Раҳм қилмадингиз кўзда оққан ёшига.
Қул деб камситдилар, кетди Аваэхон,
Менинг ҳам тушар шу савдо бошимга.

Учди бундан, Аваэ қайтиб қўнимади,
Бу тўраликлардан кўнглим тўлмади,
Қиёматли фарзанд бўлиб Аваэхон,
Ёртибойга охир қурби етмади.

Аввалини энди кўрди бугун кўз,
Қолиб бўлсин энди ҳаммаси ўз-ўз.
Ман ҳам кетай бугун, ота, Чамбилдан,
Юра берсам эшитарман совуқ сўз.

Алқисса, Гўрўғли султон Ҳасанхондан бу сўзни эшитиб, «Энди бизнинг давлатимиз, кел-кељдан ўтиб, кет-кетига кетган әкан»,— деб Ҳасанхоннинг сўзига Гўрўғли султон ҳеч бир жавоб қайтармай қирқ йигитга қараб бир сўз деб тургани:

Қул дединлар Аваэхоннинг ўзини,
Ёш оқизиб Гўрўғлининг қўзини,
Қирқ йигит барингиз бунда турарсиз,
Эшитдингми Ҳасан айтган сўзини?!

Ғанимга бостирар бўлдинг изимни,
Қора қилдингиэлар менинг юзимни.
Рози бўлдим энди сиздан қирқ йигит,
Яхши ҳақладинглар берган тузимни.

Қийнадинглар мунча менинг жонимни,
Тешмайин сўрдинглар менинг қонимни.
Ҳаммангиздан рози бўлдим қирқ йигит,
Яхши оқладинглар берган ионимни.

Кариганда юрар йўлдан адашдим,
Қирқ йигитлар, яхши менга қарашибинг.
Сардор қизин Аваҳонга тенг кўрмай,
Орията ўзим билан талашдинг.

Аваҳдан айрилиб, рангим сўлибман,
Юрак-бағрим бугун дардан тўлибман,
Бек билан, қул яхши танир экансиз,
Синчилликларингга қойил бўлибман.

Гўрўғлини бугун тўрга туширодинг,
Аваҳонни кўрамиз деб ич урдинг,
Мақсадингни билдим, бердим Аваҳни,
Қарчигайим бугун қўлдан учирдинг.

Қайтардинглар бугун бошдан баҳтимни,
Аввалдан олдинглар менинг ақлимни!
Мен бормасман, энди сизлар боринглар,
Бердим мен сизларга тоҷу тахтимни.

Бориб Чамбилбелга мажлис қуринглар,
Ўзба-ўзлик бўлиб энди юринглар,
Сизларга мен бердим Чамбил таҳтини,
Ўз ихтиёрингча даврон суринглар.

Қирқ йигитлар баланд экан ҳимматинг,
Хўб қилдинглар берган тузим иззатин.
Аҳмад сардорни миндириб таҳтимга,
Қилинг энди Аҳмад сардор хизматин.

Мулойим кўринди Аваҳ тишингга¹,
Қойил бўлдим қирқ йигитлар, ишингга,

Ўзим билан охиринда талашдим,
Келган экансизлар яхши кучингга.

Тожи-таҳт баҳридан энди ўтарман,
Билмам қачон мақсадимга етарман.
Боринглар, сизларга бердим Чамбилни,
Мен Аваҳнинг сўроғинда кетарман.

Нима десангизлар ҳозир кўнарман,
Ажал етса шу ҳасратда ўларман,
Ўлмай тирик етсан охири мақсадга,
Қирқ йигитлар, охирингни кўрарман.

Алқисса, Гўрўғли султон бу сўзини айтгандан кейин қирқ йигит Гўрўғлининг сўзини эшишиб ҳаммаси жонидан умид узди. Бу сира ҳам тож-таҳтни ташлаб кетмайди, тож-таҳтнинг баҳридан тириклай ўтмайди. Энди бунинг одамга айлангиси келди. Ҳаммамизни қиличининг дамидан ўткариб, сўнгра кетади,— деди. Шу фикрни ўйлаб:

— Тўрам, энди тавба қиадик, бизлардан бир гуноҳ ўтди, тўксангиз мана қонимиз, олсангиз жонимиз, сиздан айрилиб биз Чамбилга бормаймиз, тирик сиздан қолмаймиз ҳам,— деб қирқ йигит ҳаммаси бўйин солиб турди. Шунда Гўрўғли султон:

— Эй Ҳасанжон, энди отингта мингин, энкайган бўйинни қилич кесмайди, ўз гуноҳини ўзи бўйнига олгандан кейин, «тавба қилдим», деб яна бўйин солгандан сўнг, буни энди қандай қилиб чопиб ташлай берамиз?! Ҳар гап бўлса, отингга мингил, қани нима бўлар экан, охирини кўрайлик,— деди. Отга миниб Чамбилга қараб қўшилишиб кела берди. Йўлда келаётисиб Гўрўғли султон дурбинни олиб қўзига тутди. Қараса, йўлда узоқдан тўрт-беш от кўринди. Отлар ингичка бўлиб қотиб қолган, олис йўлдан келганга ўхшайди. Ўзлари ухлаб ётибди. Буни кўриб Гўрўғли султон қирқ йигитига бир сўз деб тургани:

Қирқ йигит келарсиз ўнги сўлимда,
Лочин қушлар ярашади қўлингда,
Дурбин билан ман узоққа қарасам,
Тўрт-беш от ёйилиб туради ўйлимда.

Нодон одам сўзини сўзга қўшмайди,
Куйган банда бирдай йиғлаб қақшайди,

¹ Тишинда, ташқарида.

Тўрт-беш от ёйилиб турар йўлимда,
Узоқ йўлдан улар келган ўхшайди.

Одамлари бари ухлаб ётибди,
Билмайман ул қаердан йўл тортибди?
Шонли, олис йўлдан келган ўхшайди,
Йўл азоби билан отлар қотибди.

Анинг усти билан бориб ўтармиз,
Кеч қолибмиз, кечроқ Чамбил етармиз.
Улар ётар экан йўлнинг устида,
Авазхонни бир сўроқлаб кетармиз.

Билмайман бу қаерлардан келади?
Бирор билмаганинни бирор билади.
Сезган бўлса Авазхоннинг дарагин,
Албатта сўрасак дарак беради.

Борганимиз ул узоқдан кўролмас,
Бориб биз уйғотсак, жойдан туролмас.
Үйқу билан шошиб қолар борган сўнг,
Кўзин очиб тўлиқ жавоб беролмас.

Бироринг илгари йўлга кирсангиз.
Чаққонроқ отни қичаб юрсангиз...
Уйқудан уйғотиб, айтиб неча сўз,
Биз борганча тушунтириб турсангиз.

Гўрўғлининг эшигандан сўзини,
Аланг-жалаңг қилиб икки кўзини,
Тўлаб ботир «биз борамиз», деб айтди,
Тўхтамайин энди дарров ўзини.

Сиз рухсат берсангиз йўлга кираман,
Сиздан бурун чаққон-чаққон юраман,
Одам уйғотмоққа бежои устаман,
Сиздан бурун хабар бериб тураман.

Султон айтди:— Тўлаб йўлга сол,— деди.
Кичамайин аста-аста бор, деди.
Ҷўчитмай уйғотиб аввал жойидан
Қандай одам экан англаб ол,— деди.

Алқисса, Тўлаб ботир йўлга кирди. Отига қамчини урди. Ҳа деганда отни бўшатиб қўя берди. Ана-мана дегунча келиб қолди. Яқинлаб келганданоқ: «Ҳа турча-тур! Гўрўғли келиб қолди. Ҳамманғ отнинг остида қолдинг»,— деб бирдан шовқун солди. Қўрқишиб ҳаммаси жойидан турди, турив қараса, бир саман отлиқ башараси келишмаган бир ёмон одамни кўрди. Ундан бошқа ҳеч ким йўқ. Тўлаб ботир отини қайтариб карvonларнинг олдига келди. Келиб карvonларга қараб:

— Эй йўловчилар! Бу ердан Гўрўғли султон келаётир, Гўрўғли келиб сизлардан бир сўз сўрайди, тўғри жавоб берсанглар бера оласизлар, агарда жавоб беролмасанглар, ҳаммангиз ўласизлар,— деди. Шундай деб турган вақтида қирқ йигити билан Гўрўғли ҳам келиб қолди.

Карvonлар салом бериб Гўрўғли билан кўришдилар.

— Сизлар ким бўласизлар?— деб Гўрўғли султон сўради. Шунда туриб бир киши:

— Бизлар карvon бўламиз. Улуг карvonбоши деган киши мен бўламан,— деди. Бу сўзни эшигид Гўрўғли султоннинг карvonларга қараб бир сўз деб тургани:

Бедовга йўл бермас тогларнинг тоши,
Фами кўп банданинг кўзида ёши,
Бу сўзимга жавоб бер карvonбоши,
Авазхондан кўрган, билган бормикан?

Ҳар банданинг қабул бўлсин кўз ёши,
Ҳизр бўлсин эр йигитнинг йўлдоши,
Турмоққа йўқ Гўрўғлининг бардоши,
Авазхондан кўрган, билган бормикан?

Эрта, шом зор йиглайман тинмайин,
Авазхондан бошқа войим қилмайман,
Қаён кетганини они билмайман,
Авазхондан кўрган, билган бормикан?

Бир бошим чиқмади қайғу-alamdan,
Жон чиққанча ман изларман, танамдан
Армонман айрилдим Аваз боламдан,
Авазхондан кўрган, билган бормикан?

Етти ёшда они қўлимга олдим,
Болам деб қиёмат орага солдим.

Сарсон бўлиб охири айрилиб қолдим,
Авазхондан кўрган, билган бормикан?

Қарчигайим бу кун қўлимдан учди,
Аваз дарди бўлди кундан-кун кучли,
Билмам қандай сайд тўрига тушди.
Авазхондан кўрган, билган бормикан?

Бу йўлларга бўлди карвон сафаринг,
Йўла юрган кўрар йўлнинг хатарин,
Билсанг бергин Авазхоннинг хабарин.
Авазхондан кўрган, билган бормикан?

Яқин келдим жоним чиқиб ўлмоққа,
Бир хуморман болам юзин кўрмоққа.
Агар мен эшитсан, Аваз хабарин,
Мақсадим, йўлинда жоним бермоққа.

Бўтаси ўлган туюдай бўзлайман,
Мен борсам деб ҳар бир жойни кўзлайман,
То ўлгунча Авазхонни излайман,
Авазхондан кўрган, билган бормикан?

Алқисса, буни айтиб, Гўрўғли карвонлардан сўраб турди. Гўрўғлидан бу сўзни эшитиб, Улуғ карвонбоши Гўрўғли султонга қараб, бир сўз деб тургани:

Эшитинг арзимни бул дамда султон,
Алҳамдилло бизам сиздай мусулмон,
Кечакундуз бирдай тинмай юарман,
Хизматингга қилиб жонимни қурбон.

Бизни сўрсанг, Гуржистондан келамиз,
Албатта Авазни бизлар биламиз.
Сўрасангиз Авазхоннинг дарагин,
Албатта Аваздан дарак берамиз.

Юк бойладим бошқа юртга юрмоққа,
Кўнглим йўқ эди Чамбилга келмоққа,
Аваз бориб тушди Хунхор қўлига,
Чамбил келдим, сизга хабар бермоққа.

Авазхон ул куни Гуржистон борди,
Орага Хунхоршоҳ элчисин солди.

Мусулмонча бериб яна саломни,
Амалман Авазни олдига олди.

Англамоққа Авазхоннинг кўнглини,
Соз бериб қўлига хўп гапга солди,
Сизни мақтаб, Хунхоршоҳни паст уриб,
Шу сабабдан Аваз зинданда қолди.

Бандда ётар Аваздай норинг,
Бермоқ учун келдик Аваз хабарин,
Авазхонни осдирмоққа Хунхоршоҳ
Ясатиб ётиди тилладан дорин.

Оting тулпор, қасд қиласангиз етади,
Аваз сиздан беҳад умид этади.
Саккиз кун ичинда етиб бормасанг,
Армон билан Аваз қўлдан кетади.

Аваздай полвонни амалман олди,
Қирқ кун муҳлат қилиб зинданга солди,
Ҳозир бугун ўттиз икки кун бўлди,
Саккиз кун, султоним, муҳлати қолди.

Ҳеч лофи йўқ менинг айтган сўзимни(нг).
Доим ёши онасининг кўзинда,
Жонни сотиб хабарини етказдим,
Энди ихтиёринг, султон, ўзингда.

Алқисса, буни эшитиб Гўрўғли султон Авазхонни кўргандай бўлди. Чамбил билан Гуржистоннинг ораси уч йиллик йўл эди. Карвонларни отларига мингазиб, бирга олиб Чамбилга қараб жўнаб кета берди. Номозгар билан намозн шом орасида Гўрўғли қирқ йигити ва карвонлар билан Чамбилга кирди. Киргандан сўнг султон... «Тахт бўлинг!» деб қирқ йигитига буюрди. Қушларни ташлаб, добилларни ташлаб ит эгасига қарамайди. Ҳар ким ўзбошига ёв-ярогини дастлаб етиби. Шу пайт Гўрўғли султон:

— Эй, Ертибой оқсоқол, бориб Ҳасан кўлбарга хабар бер! — эшагини тўқимлаб тахт бўлсин. Ҳозир Гуржистонга жўнаймиз, — деди. Ертибой оқсоқол борди:

— Ҳасан кўлбар, Ҳасан кўлбар.

— Ҳа.

— Ўлдинг-да.

— Мани ўладиганимни сен қаёқдан билдинг, ёки тушмуш кўрдингми? — Унга Ётибой:

— Сени дунёдан нима хабаринг бор? Бугун Аваҳон Ҳунхороҳоннинг қўлида бандда қолибди, шўнга Гўрӯғли султон бормоқчи бўлиб ётибди. Сени ҳам тахт бўлсин, Ҳунхороҳоннинг сен каби зангидан неча минг зангиси бор, сени олиб бориб шу зангиларнинг урушига солади, калланг ҳам қайси ҳандақда қолади, оёғинг қайси ҳандақда қолади, энди ўлмаган ниманг қолади. Ҳасан кўлбар буни эшитиб:

— Ўзим очдан ўрай деб ётибман, шу туришда яна мени гўрга юр дейдими? Укасининг... Гўрӯғлининг, ўзи кета берсин, мен бормайман,— деб ёта кетди. Ётибой оқсоқол қайтиб Гўрӯғлининг олдига борди. Гўрӯғли Ётибойдан сўради:

— Ҳасан кўлбарга айтдингми?

— Ҳа, айтдим,— деди Ётибой.— Қорним оч, дейдими? Шутиб ҳушёқмаслик қилиб ётиби.— Гўрӯғли шунда Чамбилда қоладиган кишиларга тайинлаб айтаётган сўзи:

Бу сўзимни менинг англаб билинглар,
Меҳмонлар димогин чоқлаб юринглар.
Айтганини ҳозир қилиб меҳмоннинг,
Куни тун ёнида бирга бўлинглар!

Бу кәрвонлар яхшилигин биларман,
Ўлмасам мен яна қайтиб келарман,
То мен келмай қайтиб кетмас карвонлар
Келмас сўнгра сулукатн¹ қиларман.

Бориб Ҳасан кўлбар ҳолин кўринглар,
Не мақсади бўлса айтиб келинглар,
Хафаликман берилмасин овқати,
Дарров элтиб овқатини беринглар.

Икков-учов ошхонага борди,
Тўрт ботмон талқонни бир тортиб олди.
Кўтариб Кўлбарнинг қошига борди.
Этагини очди у дамда Кўлбар.
Тўрт ботмон талқонни этаклаб олди.

Кўпдан бери оч эди Ҳасан кўлбар,
Чанглаб талқонни оғзига солди.

¹ Эътибор, илтифот; уларга лойиқ муомила қиларман демоқчи.

Томогига ҳам бурнига тиқилиб,
Нафаси чиқмайин бўғилиб қолди.

Сувга қорий деса идиш топмайди,
Этаклаб ҳовузнинг олдига борди,
Шундан бошқа идиш бўлмас деб,
Бир ҳовуз сувга у толқонни солди.

Нима бўлсин унга тўрт ботмон талқон,
Талқондан айрилиб топмайин қолди.
Алқисса ётиб ҳовузга бошини солди,
Ҳовузнинг ярим сувини ичиб ҳам олди.

Талқонлар чўкиб бари тагида қолди,
Ичган томогим бўйимга ҳазм бўлсин, деб,
Кетидан бораман, деб ётиб, ухлаб ҳам қолди.

Гўрӯғли султон қирқ йигит билан анжомларини таҳлаб,
намозшомда бирдан отланиб жўнадилар:

Чақмоғига қув олди,
Мехтара сув олди,
Гўрӯғли билан қирқ йигит
Халойиқдан дуо олди.

Аваҳонни эшитиб,
Кўргандай бўб қувонди,
Ўзини билган донади,
Юраги ўтдек ёнади,
Гўрӯғлидай арслонди,

Анинг туққан онади,
Онадан ягонади,
Кўзлари пиёлади,
Кирқ йигит билан Гўрӯғли
Йўлга тушиб жўнади.

Азалда берган ҳимматни,
Отларга қилди шиддатни,
Кўринг энди Гўрӯғлидай
Ортиқ тўққан бегзотни.
Бедовга қамчи тортди,
Уткир қамчи зўр ўзбек,

Қамчилар симдай ботди.
Қўринглар ул валламатди,
Чув деди, бедов отди
Отлари қилди гайратди,
Қўшин эмас ҳимматди,
Дол бўйини узатди,
Кўринг жами бегзотди,
Бирдай тинмай йўл тортди,
Хом эмас әрлар оти,
Йўлнинг танобин тортди,
Юрган йўли бедовлар
Тўзон бўб чангид ётди.
Бирдай тинмай йўл тортди,
Билмас пасти баландди,
Баландди ҳоварлатди.
Тоғ келса тасирлатди,
Ўр келса ўмганлатди,
Жилгада жилпиллатди,
Кўринг жами бегзотди
Бирдай тинмай йўл тортди,
Аваз деб жонни сотди,
Кўзларда уйқу қотди,
Узанги тобонга ботди
Кечакундуз баробар,
Бирдай тинмай йўл тортди,
Аваз деб жонин сотди,
Кўринг ноз бедов отди.
Мисоли қарсоқдай қотди.

Карвонларга уч ойлик йўл ораси,
Минганлари ноз бедовнинг сараси,
Саккиз кун деганда Гўрўғли султон,
Бориб кўрди Бадбахт тогнинг қорасин.

Қирқ йигитин элтиб султон қошига,
Кўкси ҳўлда кўздан оққан ёшига,
Офтобман аралаш Гўрўғли султон,
Бориб чиқди Бадбахт тогнинг бошига.

Қулоқ солинг Гўрўғлининг сўзиага,
Неча фикрларни ўйлаб ўзига,

¹ Бадбахт тог — афсонавий тог.

Бадбахт тог бошида туриб қарайди,
Хунхор дори кўринади кўзига.

Алқисса, Гўрўғли султон Гуржистоннинг шаҳрини,
Хунхорнинг дорини кўриб, юрагида борини йигитларига
айтиб бир сўз дегани:

Бел бойларман энди бугун ўлимга,
Кўзларим тўрт бўлди аввал йўлингда,
Кирқ кун банди бўлиб тушиб зинданга,
Не бўлди Авазим душман қўлинда?

Бир сабабман Аваз қўлдан кетибди,
Кирқ кун муҳдати Хунхор битибди.
Келарми деб бундай куйган отасин,
Аваз қўзим, доим йўлни кутибди.

Келган экан асли Хунхор қасдига,
Ботирлик қиб боқмай баланд-пастига,
Бурун-кейин иш кўрмаган Авазхон,
Тушибди армонман зиндан остига,

Эсдан чиқмас Авазхоннинг сўзлари,
Авазхон бўлмаса найлай ўзгани?
Банди бўлиб ётар зиндан остида
Ҳавога тўрт бўлиб икки кўзлари.

Душманлар устига доим дўнарман,
Душманман олишиб охир ўларман,
Кўзимнинг равшани кетди Авазхон,
Аваз қўзим, энди қачон кўрарман?

Эшитинг қирқ йигит оҳи зоримни,
Банда кўрар тақдирдаги борини.
Қирқ йигитлар назар солиб қаранглар,
Кўрдингми, Хунхорнинг тилла дорини?

Қиши ўтиб, келар кун бўлди баҳори.
Тўкилмасин эр йигитнинг аҳори.
Қирқ йигитлар назар солиб қаранглар,
Манав ётган Гуржистоннинг шаҳари.

Улар одам паймонаси тўлгани,
Одамнинг ўлгани — хазон бўлгани,

Қирқ йигитлар назар солиб қаранглар,
Манав ёқда Ҳунхоршоҳнинг қўргони.

Душманлар босмасин, эрлар, изингни,
Худо ойдин қиссин, ҳамманг юзингни,
Доим қилар эдим сизни тарбият,
Ҳақлар кунинг энди бугун тузимни.

Ўзи берган, ўзи олар жонини,
Ман билмасман, қанча душман сонини,
Қирқ йигитлар, назар солиб қаранглар,
Қўрдингми, чангиган душман чангини.

Қўрқан киши бу майдонга боролмас,
Душманнинг қавмига оғат сололмас.
То кечмаса ботир танда жонидан,
Душманлардан ориятни ололмас.

Таърифи бедов майдонда чопилиб,
Эр йигитни мақсадлари топилиб'
Селдай бўлиб қизил қонлар оқилиб,
Ғайрат қилиб қонлар сочар кун бўлди.

Қўрмаган иш бўлар умрим ичинда,
Номардлар қўрқади кўрса тушинда,
Каллалар санчилиб найза учинда,
Ғайрат билан найза санчар кун бўлди.

Ариллаб шердайин майдонга тушиб,
Калла япроқдай танадан учиб,
От тизидан душман қонини кечиб,
Сув ўринда қонни ичар кун бўлди.

Ҳайбат билан ўнгу сўлингга боқиб,
Душманлар жонига ўтларни ёқиб,
Одам қони мисли селдайин оқиб,
Одам қони сувдай оқар кун бўлди.

Алқисса, буни Гўрўғли султон қирқ йигитга айтиб бўлгандан сўнг, қирқ йигитнинг ҳар бираIDA қирқ йигитнинг қуввати пайдо бўлди ва ғайрати танига сифмай, шундай чангигиб ётган душманни ҳеч назарига илмай, кўп қўйни

кўрган оч бўридай бўлиб турибди. Авазхонни шу бугун осадиган куни деб, Ҳунхоршоҳнинг мамлакатида келмаган одам ҳам кам қолган. Шундай Гуржистоннинг катта шаҳри ва уч юз олтмиш минораси, одамнинг чангидан қўринмайди, Шаҳардан ташқарига, майдонга тилла дорни қурилган эди. Чангнинг орасида ярқилаб бир тилла дор кўринади. Буни кўриб, қирқ йигитнинг ғайратлари тошиб турибди. Лекин Тўлаб ботирнинг ранги ўчиб, қони қочиб, ақлидан шошиб, фалокат босиб, отидан тушиб, пиёда бўлиб, алами зиёда бўлиб, саман отнинг жиловидан ушлаб, «Энди ўлмаган ниманг қолди?»— деб ва пешонасига муштлаб. «Тез бўй, отингни олғил ўзимга жавоб бергил»,— деб Гўрўғлига қислов бериб, бир сўз дегани:

Арэ айтай ҳолим сўрсангиз,
Мани аҳволим кўрсангиз,
Бир одамман, кўп-оз бўлмас,
Қайтади¹ жавоб берсангиз?!

Берган отингни минмайман,
Берган тўнингни киймайман,
Таваккалига ўлмайман,
Бо худо, навкар бўлмайман.

Арэ айтарман, султон сенга,
Қулоқ солинг бул дам менга,
Ҳар ойина моёна деб,
Берганингиз ўттиз танга,
Берган инъомингиз олмайман.
Бо худо, навкар бўлмайман.

Умрим ўтди йиглай-йиглай,
Сира энди хизмат қилмай,
Расход деб берганинг бизга,
Йилда саккиз ботмон бугдой,
Берган буғдоинг олмайман.
Бо худо, навкар бўлмайман.

От берисиз саман сариқ,
Берганинг беш ботмон тариқ.
Минай десам миндирамайди,

¹ Нима қиласи.

Узи асов, эти ориқ.
Берган инъоминг олмайман,
Бо худо, навкар бўлмайман.

Кўп йигилган ўтия қолди,
Бева бўлиб хотин қолди.
Хизматингга келаман деб,
Ўғил-қизим етим қолди.
Берган инъоминг олмайман,
Бо худо, навкар бўлмайман.

Боғда очилган гулим қолди,
Қафасда булбулим қолди.
Тўйга лойиқ бўлиб эди,
Тўй бўлмаган ўғлим қолди.
Берган инъоминг олмайман,
Бо худо, навкар бўлмайман.

Сизга маълум менинг жойим,
Ғазога йўқ сира ройим,
Йигирма беш беданаман,
Қолди ўттиз ғазал ойим,
Берган инъоминг олмайман,
Бо худо, навкар бўлмайман.

Сават тўла найчам қолди,
Қафас тўла заҳчам қолди,
Бир кийимлик тўқир эдим,
Дўконда олачам қолди.
Берган инъоминг олмайман
Бо худо, навкар бўлмайман.

Қатордаги норчам қолди
Таблада тойчам қолди,
Умид билан боқиб юрган,
Оқ куррали мочам қолди.
Берган инъоминг олмайман,
Бо худо, навкар бўлмайман.

Икки бирдай борди тозим,
Яна ўн бир ола гозим,
Умид билан асраб юрган султоним,
Сабил қолди менинг ўн тўрт хўроғим.

Алқисса буни эшишиб Гўрўғли султон Тўлаб ботирни урушарини ҳам билмайди ёки қуларини ҳам билмайди. Гўрўғлининг фикрига келди. «Шу борган билан ё бир душмани чополмайди, ё бир душманинг ёнголмайди. Майдонга боргандан кейин, бунинг қўлидан ўлмоқдан бошқа келмайди. Бекорга олиб бориб ўлдирганча, қўй, кетсин, жавоб берайин»,— деб тўхтатди. Лекин Ҳасан Гўрўғлиният авзойини англаб, дарров бориб Тўлаб ботир билан Гўрўғлининг орасига от солди. Қиличини қинидан сугуриб олди. Тўлаб ботирга қараб, Ҳасанхоннинг бир сўз дегани:

Тўлаб ботир, билиб сўйла сўзингни,
Марди — майдон тутар эдинг ўзингни...
Бу ерлар қаерди(р) ўйлагин, Тўлаб,
Тузук очиб қара, энди кўзингни!

Нега ҳавас қилдинг Чамбилибелини?
Тек ётар дебмидинг Ёвмид әлини?
Жондан умид қиласанг, мингин отингни,
Бўшатмагин қирқ йигитнинг белини.

Ҳамма ташлаб келган дунё молини,
Ким ёмон кўради, Тўлаб, жонини?
Тиздан мойи бўлса белдан қони бор,
Текин деб едингми султон нонини?

Султон нонин еган жондан кечади,
Кафан тўнин бўйининга бичади,
Текин эмас сенга султоннинг нони,
Бел бойлаб бу кун майдон тушади.

Ҳар бир ишга қиласар эдинг ҳавасни,
Жондан қўрқиб, энди қайтмоқ абасти,
Тиздан мойи бўлса белдан қони бор,
Жувонбозлик Тўлаб, осон эмасди.

Қачон сенинг кафан тўнинг бичилди,
Сувга айтгил, Тўлаб, кўрган тушингди!
Жондан умид қиласанг мингил отингни,
Биласанми, Тўлаб, қилган ишингди?!

Ким билган йўқ эди Аваҳ борганин,
Эсингдан чиқдими Аваҳни олганинг?

Не сабабдан кетди Аваз Чамбидан,
Қирқ йигитни даврасига согланинг?

Аввал бошда ким бошлади бу ишни?
Бунда келиб бузуб турсанг сир ишни,
Кўзинг очиб юқорига қарагил,
Кўрмайсанми қўлимдаги қилични?!

Тўлаб ботир шундай қараса, Ҳасанхоннинг қўлида
яланроҳ қилични кўрди. Буни кўриб, Тўлаб ботирнинг жо-
ни чиқиб кетди.

— Эй, тўрам, ўйнаб айтган сўзга аччиғингиз келдими,
минаман отга — деб, чақон бўлиб отнинг устига ўзини ол-
ди. Тоғдан эниб Гуржистон томон қирқ йигит тўрттадан
саф бўлиб келяпти. Энг олдинда Гўрўғли султон билан Ҳа-
санхон иккovi баробар боряпти. Тўлаб ботир энг кейинги
сафда у кишининг қаторига юрмай, ёлғиз ўзи келяпти. Ҳа-
санхон кела туриб орқасига бир қайрилиб қаради. Шундай
қараса, Тўлаб ботир кейинги сафни бузуб келаётir. Йўл-
дан четга чиқиб, Ҳасанхон отнинг жиловини тортиб турди.
Тўлаб ботир Ҳасанхоннинг ёнбошига келди. Ҳасан:

— Эй Тўлаб, нимага қаторда юрмайсан? — деди.

— Тўрам, менинг отим чарчаб қолган, қаторда юролма-
сам нима қилай? — Ҳасанхон орқасига ўтиб қамчи билан
отни тортиб юборди. От бирдан кўтарилиб ўзини отди.
Тўлаб ботирнинг бошидан телпаги тушиб қолди. От сув-
ликни тишлаб олди. Эни от тортган билан турмайди.
Қирқ йигит Гўрўғли султон ва Ҳасанхон ҳаммаси ҳам ор-
қада қолди. Чангиб ётган душманга қараб боши жувозчи-
нинг тўқомогидай бўлиб, Тўлаб ботир ёлғиз ўзи солди. Ев-
яроғининг барисини йўлга ташлади. Йикки қўллаб отнинг
юганини ушлади. Тўлаб ботир эни йигитлаш бошлади, отга
қараб бир сўз деб тургани:

Золим, бадбахт, ёмон қамчи тоортдими?
Урган қамчилари сенга ботдими?
Ё бўлмаса менга гуноҳ ўтдими?
Ҳай-ҳай, так-так, тентак, ўзбекнинг оти.

Мен ҳам билдим ёмон урди сонингга,
Золим, бадбахт, жабр қилди жонингга,
Бир раҳм қил, Тўлаб ботир ҳолига.
Ҳай-ҳай, так-так, тентак, ўзбекнинг оти.

Бир тўхтагил яхшилигинг билайин,
Чамбил борсам кўп тарбият қилайин,
Тўрванг банот, емине кишимиш қилайин,
Ҳай-ҳай, так-так, тентак ўзбекнинг оти.

Энди Чамбил борсам сени бокайин,
Табилингга, қўша¹ шамлар ёқайин,
Кейин қолди бизман келган оғайин,
Ҳай-ҳай, так-так, тентак ўзбекнинг оти.

Қирқ йигитлар кейин қолди йўлдошинг,
Армон билан, Тўлаб, банди бўлмасин.
Қандай кейин қолиб эди шўр бошим,
Ҳай-ҳай, так-так тентак ўзбекнинг оти.

Қирқ йигитлар келганча тур қосима,
Раҳм қилгил ҳайвон, қўзда ёshima!
Уз шумлигим етар бўлди бошима,
Ҳай-ҳай, так-так тентак ўзбекнинг оти.

Ўйта берсанг² энди душман кўрмайми?
Йиғилишиб кўп душманлар келмайми?
Аввал бошлаб энди Тўлаб ўлмайми?
Ҳай-ҳай, так-так тентак ўзбекнинг оти.

Алқисса, Тўлаб ботир отни тўхтатди. Гўрўғли, қирқ
йигитлар кейинда буни ташлаб кетган яроғларини ҳар жой-
дан олиб келаётir. Олиб келиб Тўлаб ботирга етган сўнг,
яроғларини ўзининг қўлига берди. Яроғларини тақишиб,
энди сафга қўшилиб, қирқ йигит билан баробар кела берди.
Гўрўғли султон қўлинда дурбин, дамба-дам дурбин билан
қараб дорнинг остини кўриб келаётir. Шаҳарга яқинлаб
йигитга қараб, тўхтатинглар, деб бир сўз айтиб тургани:

Дор остида не борини биламан,
Душманлар устига бугун келаман,
Дурбин билан дор остини кўрибман,
Қўрганимни энди баён қиламан.

¹ Қўшалоқ.

² Ундан қила берсанг.

Душманлар қиласи тўполон-туман,
Шунча тўполонлар бунда бўлса ҳам,
Мудом қўзим билан кўриб келаман,
Дор остида ҳали йўқди Аваҳон.

Қайтармасин ҳеч банданинг бахтини,
Ҳозир топиб турар Ҳунхор вақтини.
Ўзи остирмоқча кўриб Аваҳни,
Дор олдига келтирибди тахтини.

Аввал келиб Ҳунхор тахтга минади,
Кейин Аваҳонни олиб келади.
Ҳозир борсак тўпимиэман майдонга,
Боргандан душманлар бизни билади.

Душманлар кўргандан англаб олади,
Тўш-тўшимиздан келиб от солади.
Барров вақти дарров уруш қўзгалса,
Мард-номард айрит¹ бўлмай қолади.

Икков-икков бўлиб отни ҳайданглар,
Яроғларни энди таҳдан боғланглар,
Савдогар сифатда бўлиб киринглар,
Ўзларингни савдогардай сайланглар!

Ҳар кўчадан икков-икков киринглар,
Яроғларни кўрсатмайин юринглар,
Жилов ипман белни бойланг сиртидан,
Савдогар сифатда бўлиб келинглар!

Менинг ўзим бориб ёлгиз киравман,
Дорнинг ўнг ёғинда бориб туарман.
Не сир бор эканин бу ерда англаб,
То, сизлар келганча, кўриб туарман.

Туш-тушдан биз йиғилишиб келайик,
Танимасин, бизни душман ҳалойик,
Келтирса Аваҳни дорнинг остига,
Аваҳонни қўнглим бизлар билайик.

Ким келади Аваҳоннинг ёнидан,
Не гап бўлар Гуржистоннинг хонидан?

Дор остига келган вақти Аваҳон,
Қайтиб кетармикан қўрқиб жонидан?

Сиёсат қиб яна сўкиб урафми,
Е яхши сўз билан алдаб кўрарми?
Жондан қўрқиб қайтармикан Аваҳон,
Е бўлмаса, бир сўзинда туарфми?

Аваҳоннинг мард, номардин билайик,
Қани қайси ишга бўлар илойик.
Жондан қўрқиб айнимаса Аваҳон,
Сўнгра Аваҳ учун жавлон қилайик.

Хабар олмоқча биз келдик ҳолидан,
Не иш бўлар экан душман хонидан?
Аввал Аваҳоннинг бошин олармиз,
Агар қўрқиб, Аваҳ қайтса жонидан.

Бир лафзида турса Аваҳ кирайик,
Биримиз қолганча жавлон урайик.
Агар Аваҳ айнимаса сўзидан,
Аваҳ учун танда жонни берайик.

Алқисса, Гўрўғли султон бу сўзни айтиб бўлгандан
кейин, Ҳасан йигитлари икков-икков қилиб ҳар йўлга
юборди. Яроғларни ичдан тақиб, отнинг жилов или билан
белларини сиртидан боғлаб, яроғларни кўрсатмай, ҳар
ёққа қараб кетди. Ҳасанхон билан Тўлаб ботир иккови бир
кетди. Гўрўғли султон ёлғиз ўзи кетди, бориб душман-
ларнинг ичига кириб, дорнинг ўнг тарафини олиб, қараб
турди. Булардан бир кечаю бир кундуз кейин қолган,
яна бир кечаю бир кундуз бурун борган, бир тоғнинг бе-
тида оқ әшагини қўйвориб, олтмиш газ калтагини ёнбо-
шига қўйиб, «Қани Гўрўғли, не тартибда келиб шаҳарга
кирар экан?» деб, бир ўзи узоқдан қараб Ҳасан кўлбар
ётиб эди. Гўрўғлининг икков-икков ҳар ёнга бўлиниб кет-
ганини кўрди. Бу ҳам әшагини ушлаб олиб, унинг устига
миниб олиб, узангисини оёғига солиб, калтагини олдига
олиб, ёлғиз ўзи бир дарвозадан борди. Әшагини дарвоза-
дан ичкарига ҳайдади, әшагининг ярми кирган вақтида
калтаги қўргоннинг деворига тегиб қолди. У ёқ-бу ёғига
қарайман деганча, дарвозанинг юқориси бошидан илди,
вшак ичкарига кетиб, Ҳасан кўлбарнинг ўзини кейинда

¹ Айрим.

слиб қолди. Аччиғи келиб жойидан тура келди. «Уйнинг кўйгур душманлар дарвозани бунча тор қилиб Гўрўғлини билмаган эканми, Ҳасан кўлбар келар деб, сира гумон қиласмаган эканми?— леб қалтак билан дарвозанинг пешанасидан урди. Бир урганда дарвозани хафтбовар¹ қилиди. Кириб яна эшагини ушлаб олди. Яна қалтагини олдига кўндаланг ташлади. Бу қалтак энди қўчага сизгамиди. Кўчанинг девори пастроқ бўлса, усти билан кетади, баландроқ девор келса, қалтакни илади, эшагини тўхтатиб, қалтак илган ери хоҳи қуруқ девор бўлсин, хоҳи чордара бўлсин, уриб йиқитади. Кўчани қалтаги сизгадиган қилиб келаётир. Шаҳар одамининг ҳаммаси Ҳунхорнинг тилла дорини кўрамиз деб, ташқарига чиқиб кетган. Шаҳар бўш қолган.

Ҳасан кўлбар бу ерда турсин! Сўзни Гўрўғлидан эшигинг: Дорнинг ўнг томонини олиб турди. Қирқ йигит у ёқдан-бу ёқдан келиб, томошага келган кишидай бўлиб, бир жойга бариси йигилди. Ҳунхоршоҳ келиб тахтига ўтириди. Шул вақтда Авазхонни зиндандан чиқариб, дорнинг остига қараб олиб кела берди. Зиндандан чиққандан бошлаб Авазнинг икки кўзини бойлабди, икки қўлини олдига бойлабди, бўйнида занжир, сёғида кишани, онаси билан синглиси икки ёнида, «дод!» деб йиглаб келяпди. Шунда Авазхон онасининг сўзи:

Ҳазон урмай боғда гуллар сўламади,
Бу дунёдан менинг кўнглим тўлмади,
Айрилдим армонман ёлгиз боламдан,
Ҳолинг сўрар жонкуяринг бўлмади.

Ўлмайин бошимдан кулфат кетмади,
Ҳеч бир banda мақсадига етмади,
Қирқ кун ётдинг қора зиндан остида,
Бирор одам хабарингни этмади.

Қилар энди, қачон сенинг сўрогинг,
Талаб қилдинг, болам, йўлнинг йироғин,
Гўрўғлидай арслон отанг билмади,
Армон билан кетар бўлдинг, чирогим.

Кўз ёшимга ҳеч ким раҳми келмади,
«Гуржистон кетди» деб гумон қилмади,
Қачон келар эди арслон Гўрўғли,
Хабарингни, жоним болам, билмади.

Оҳ урганда кўзим ёшим сочилиди,
Душманлар юраги энди босилди.
Бугун осар бўлди душман дорига,
Душманларнинг энди баҳти очилди.

Душманларнинг ҳозирда кўнгли тўқди,
Дўстингдан душманинг бу ерда кўпди.
Сўзимга ҳеч киши қулоқ солмайди,
Англадим мен, сенга жонкуяр йўқди.

Бир умр куйдирди доғинг ўзимни,
Тингламайди, энди душман сўзимни,
Ҳабарингни билмай Гўрўғли султон,
Душманлар ўлдирап бўлди қўзимни.

Авазхоннинг онасига қараб бир сўз дегани:

Биздан бошқаларга бу кун солмасин,
Армон билан йигит жонин олмасин,
Шу йўлда берайин энди жонимни,
Душманлар, кимлигимни англасин!

Ишнинг бундай бўларини билмадим,
Мажнункўк белига бир йўл минмадим,
Энди ўтдим, армон билан жаҳондан,
Душманга ўлгунча ҳужум қилмадим.

Бир олишиб, Ҳунхор билан кўрмадим,
Чамбилбелда бир камликка кўнимадим.
Ўтар бўлдим армон билан жаҳондан,
Майдон кириб, бир олишиб ўлмадим.

Бир бошимни кўп гавғога солмадим,
Ҳеч бўлмаса ястиғимни олмадим,
Пушаймон қилганман, энди фойда йўқ.
Юрагимда кетди сонсиз армоним.

Бугун, она, менинг баҳтим қораман,
Армон билан жаҳондан ўтиб бораман,

¹ Теп-текис, пачақлади.

Ман ўтарман, она, энди жаҳондан,
Мандан кейин бу дунёда қоласан.

Ажал етса бир кун сиз ҳам ўларсиз,
Тақдирда шу экан, она, кўнарсиз.
Отам келса, мен кетган сўнг сўроқлаб,
Мендан салом айтинг, отам кўрарсиз.

Ҳеч илож бўлмади Чамбил бормоққа,
Келса душманларга офат солмоққа,
Мендан салом айтарсиз-да отамга,
Келса Хунхоршоҳдан хуним олмоққа.

Алқисса, бу сўзни айтиб Авазхон кела берди. Яқин-
лаб келгандан кейин, Хунхоршоҳ айтди:
— Шу вақтда Авазхонни олиб келинглар! Энди-ку,
ўларини ҳақиқат билди. Шу вақтда бир сўраб кўрайик,
ҳали ҳам Гўрўғлидан қайтса Авазхонни банддан озод қи-
лайик, қайтмаса сўнг элтиб дорга осайик,— деди.

Бу сўз билан Авазни Хунхоршоҳ олиб келди-
лар. Хунхоршоҳ айтди:

— Эй Авазхон, сендай ўғлон отадан бўлиб, онадан ту-
рилмайди, одамзод бир ўлгандан кейин қайтиб иккинчи
марта дунёга келмайди. Сен Гўрўғлидан нима оласан, ўз
йигит жонингга шунча жабр қилиб, бекор Гўрўғлининг
алдаганига кўниб, ўзингни-ўзинг нобуд қилмагин! Ҳали
жонинг менинг чангалинда, ўлдираман десам ўлдираман,
нисбати ундан кетмаган, деб Хунхоршоҳ наси-
озод қиласан десам озод қиласан,— деб Хунхоршоҳ қараб бир
сўз дегани:

Номард киши бир лафзинда турмайди,
Насиҳатинг қулоғимга кирмайди.
Жоним чангалинга бўлса ол, энди,
Сенга хушомад қиб Аваз юрмайди.

Мен қайтмасман англа, Хунхор, йўлимдан,
Жаллодларинг ҳамаб ўнгу сўлимдан,
Ўлимидан қўрқса, Авазхон бўлмас,
Нима келса қилғил, энди қўлингдан!

Икки дараҳт бир-бирига соями,
Жондан қўрқиб эр лафзидан тоями?
Жондан қўрқиб, энди Аваз қайтмайди,
Кўлингдан келганин қилгин аяма!

Тарк урганман барча дунё молимни,
Узи берган, ўзи олар жонимни,
От белига миниб майдон киргандা,
Кўрар әдим, Хунхор, сенинг ҳолингни.

Илож йўқди, тақдиримга кўнарман,
Бир кун бўлдим, ахир бир кун ўларман.
Мард худодан кўрар, номард йўлдошдан,
Бу ишларни тақдиримдан кўрарман.

Бедовни ўйнатиб майдон кирмадим,
Бўлаклаб душманни ҳарён сурмадим.
Азалда тақдирда борим шу экан,
Душманларни майдон солиб қирмадим.

Мен йигласам, Хунхор, бу кун куларсан,
Ҳаддинг қанча, кимга раҳм қиласан?
Сен ҳам ўтдинг, шоҳ бўлдим, деб жаҳондан,
Гўрўғли қадрини нима биларсан?!

Гўрўғлидай ҳеч бир ботир ўтмаган,
Тавсифини айтиб одам етмаган.
Бир умрга душман билан олишиб,
Ботирлик нисбати ундан кетмаган.

Шумлик бари шаъни-шавкат савлатинг,
Шоҳ бўп ўтган сенинг бутун авлодинг.
Фиротнинг бир асбобига етмайди,
Мамлакат юртингман ҳамма давлатинг.

Боҳабар бўл ҳали, Хунхор, шошмагил,
Авазхонни ўлдиридим деб тошмагил!
Авазнинг ўлиги сени қуритади,
Иккинчидан «қайт!» деб оғиз очмагил!

Алқисса, буни Авазхондан әшитиб, Хунхоршоҳ:
Эй, олиб бориб осиб юборгил!— деди. Шу билан дор
остига қараб жўнади. Авазнинг онасига қараб, бир сўз
айтиб тургани:

Энди беҳроқ мен мардона бўлганим,
Шу соатда боланг энди кўрганинг.
Энди, она, бул жаҳондан кетарман,
Энди йўқдир Аваҳонни кўрганинг.

Ўтар энди бу жаҳондан Аваҳон,
Яратгандан бошқа йўқди(р) меҳрибон,
Армон билан ўтар бўлдим жаҳондан,
Оқ сутингга рози бўлгин, онажон!

Мен солдим бошингга қайғу-аламни,
Бошини кесиб дорга тортар танамни,
Бир кун отам сўраб келса қонимни,
Душманлар ўлдири, дегин, болангни!

Давлат учди бошдан, қайтиб қўнмади,
Бу дунёдан менинг кўнглим тўлмади,
Турганимда тилла дорнинг остида,
Гўрўғлидай арслон отам бўлмади.

Чиқарарди душманларнинг чангини,
Сувдайн оқизса душман қонини,
Гўрўғлидай арслон отам бўлганда,
Хирмон қиласи эди душман танини.

Қиласа бу майдонда жонини қурбон,
Кўрса душман қиласи доди-фифон,
Бу дам келиб кўрса ҳол-аҳволимни,
Қани, жонкуярим, Гўрўғли султон.

Душманларга солса қоронги туман,
Дор остида сувдай оқса қизил қон,
Иним, деб бу дамда келиб от қўйса,
Қани, жонкуярим, оғам, Ҳасанжон.

Қирқ йигитим азаматим, эрларим.
Кўрар кун бўлмади Чамбилбелларим,
Олло, деб бу дамда келиб от қўйса,
Қани, жонкуярим, Ёвмид элларим.

Ошган экан ман билмайман гунойим,
Бу савдолар солди бизга худойим,

Бўлмади жонимга ҳеч бир сабабкор,
Ўзингдан бошқа йўқ менда панойим.

Илож йўқди, энди қандай қиларман?
Мақсадимни мен ўзингдан тиларман,
Ўларман деб парвойимга келмайди,
Армон билан кетганимга йигларман.

Алқисса, Аваҳондан бу сўзни эшишиб онаси Аваҳон-
га қараб бир сўз айтиб тургани:

Менинг додим, Чамбилбелга бормади,
Сендан бурун менинг жоним олмади,
Энди қандай тоқат қиласи, жон болам,
Онангнинг танида тоқат қолмади.

Етти йилдан бери сени кўрмадим,
Тирикликда зор йигладим кўнмадим,
Энди қандай тоқат қиласи, жон қўзим,
Сендан бурун ажал етиб ўлмадим.

Қолганда на бўлди, энди ўлмайин?
Ўлар бўлдим душманларга кўнмайин,
Мирғазаблар менинг бошим олинглар,
Ёлғизимни энди доғин кўрмайин.

Зор қақшаб кетмайин дорнинг қошидан,
Ўлмайин, кетмади ғурбат бошимдан.
Мен ўзим розиман энди, жаллодлар,
Бошим кесиб, дорга тортинг сочимдан.

Сөлдинглар бошимга сонсиз аламни,
Аввал дорга тортинг менинг танамни!
Ёлғиз болам энди доғин кўрмайин,
Мендан сўнг ўлдиринг ёлғиз боламни!

Ўтган иш жойига қайтиб келмади,
Кўз ёшимга ҳеч бир раҳм қилмади.
Армон билан бугун ўтдинг жаҳондан,
Жонкуярлар хабарингни билмади.

Алқисса, бу сўзни айтиб онаси йиглаб, жаллодларга
ялиниб:

— Энди-ку, ўлдирасизлар, ўлдирсанглар ҳам боламни
қийнамай ўлдиринглар,— деб турибди. Авазхон шу вақт-
да синглиси Гулжамолга қараб бир сўз деб тургани:

Гулжамолжон, кўп йигладинг зор-зор,
Товшингни эшитиб бўлдим беқарор,
Азалда тақдирда борим шу экан,
Тақдирга тан бергин энди, муштипар!

Кўрибсан, йиглайсан, менинг ҳолимни,
Шу замон душманлар тўкар қонимни,
Йиглама, беларво бўлгил, Гулжамол,
Жонсарак бўлмайин берай жонимни.

Йиглай-йиглай юрак-бағринг қон бўлди,
Гулжамолжон, оқ юзларинг чанг бўлди,
Сен йиглама, эшитмайин товшингни,
Товшингни эшитсан, ҳолим танг бўлди,

Йигламагил, бардош қилгил чироғим,
Сендан бошқа йўқдир яқин-йироғим.
Фойда йўқдир турган билан бу ерда,
Эшитмасин, овозингни қулогим!

Душман турар ўлдирмоққа ғуруллаб,
Майдон кирсам қочар эди зириллаб.
Тулкилар шер бўлган вақти шу вақти,
Гулжамолжон, кўп йиглама, чириллаб!

Гулжамолжон, қулоқ солгин сўзимга,
Ўлим қасд қиб чангаль солди ўзимга,
Қўзинг очиб тўрт ёғингга қарагин,
Бегонадан кўринарми қўзингга?!

Алқисса, Гулжамол акасидан бу сўзни эшитиб, кўз
ёшларини артиб, ҳар ёққа қаради. Дорнинг ўнг тарафига
келиб турган Гўрўғли сulton ва Ҳасанхон, яна қирқ
йигитни кўриб Авазхонга қараб, бир сўз деб тургани:

Улар деб аввалда сизни куйиндим,
Зор йиглаб мен ўзига сифидим.
Қарап әдим, теваракка қарадим,
Бир сир кўриб, оға, яхши суюндим.

Қулоқ солсам ҳатоси йўқ сўзингда,
Бир сир аён бўлибти-да ўзингга.
Қара, дединг, теваракка қарадим,
Кирқ икки отли кўринади кўзимга.

Сизни деб Гулжамол йиглаб-қақшади,
Бу элнинг одамимас, бошқади,
Дутор бўйин бари мингтан ноз бедов,
Бегона юрт одамига ўхшайди!

Мен билишдан олис йўлдан тортиби,
Совутлари қора чангга ботиби,
От ҷарчатиб келган ўхшар олисдан,
Бедовлари кийикдайин қотиби.

Бариси қарасам, совур телпакли,
Қўлларида наизалари сочоқли.
Ҳар бирори келар мингта баробар,
Иш кўрган ўхшайди, бари нечогли.

Келиб олиб турар дорнинг ўнгинда,
Улар юрган ўхшар душман йўлинда,
Ҳамма кулар, улар йиглаб туриби,
Дастрўмоли ҳаммасининг қўлида.

Бир мўйсафи турар ҳарёна боқиб,
Тилла балдоқ қилич белига тақиб.
Дам-бадам бетоқат бўлиб йиглайди,
Кўзининг ёшлари соқолдан оқиб.

Кўрганда титратар анинг ҳайбати,
Замонида мисли Рустам ҳайбати.
Кўзлар ҳаводаги учган булутни,
Остидаги мингтан қизил кўк оти.

Бир ёш ўғлон йиглаб турар қошида,
Тилла жига у ҳам кийган бошига,
Қарасам, ҳеч әрлигига талаб йўқ,
Е ўн етти, ё ўн саккиз ёшинда.

Бу одамлардин унинг тарзи бошқади,
Бўтен юртнинг одамига ўхшайди,

Үнг юзинда авғон яра дөғи бор,
Минган оти онинг жийрон қашқади.

Алқисса, бу сўзни Гулжамол Авазхонга баён қилди.
Гулжамолдан бу сўзни эшитиб, Авазхон ўйланиб фикрға
кетди. Гулжамолнинг айтган сўзи Гўрўғлидан сира узоқ
кетмади. Буни ўйлаб туриб Авазхон жаллодларга қараб
айтди:

— Эй жаллодар, мен Авазхон бўлган билан қўлим бўш
бўлса, оёғим ҳам бўш бўлса, шунда мен Авазхонман. Қўл-
оёғим бойлоги турган вақтда кўзим билан ҳеч кимга за-
рар еткиза олмайман. Мен энди дунёдан кетиб бора ётиб-
ман. Кўзимни бир очсангизлар, ёруғ жаҳонни бир кўрсам,
сўнгра майли әди, ўлсам,— деди. Бу сўзни Авазхондан эши-
тиб Хунхоршоҳга бориб жаллод арз қилди:

— Авазхон кўзимни очинглар!— дейди. Сиз оч десан-
гиз очамиз, ёки очмайин дорга осамиз,— деди. Сўнгра
Хунхоршоҳ:

— Оч деган бўлса, кўзини очинглар! Кўз кўзга тушса,
меҳр юзга тушади, деганлар. Онаси билан синглисининг
йиғлаб турганини кўрса, шуларни кўзи қиймай, Гўрўғли-
дан қайтармикан?— деди. Жаллодлар қайтиб келиб Аваз-
хоннинг кўзини очиб юборди. Кўзини очгандан кейин, қа-
раб Авазхон, Гўрўғли султон ва Ҳасанхон яна ҳам қирқ
йигит ва Тўлаб ботиргача қолмай, келиб турганини кўрди.
Шуларни кўрган вақтда қўл-оёғининг боғли экани эсидан
чиқиб кетди.

Хунхоршоҳга қараб бир сўз деб тургани:

Бу шаҳрингга бўлдим меҳмон,
Кимга тушар қайгу-туман.
Сен қасд қилгансан жонима,
Худойим бўлди меҳрибон.

Бошингдан қайтганди баҳтинг,
Армон билан синди раҳтинг,
Остингдаги тилла таҳтинг
Ё сеники, ё меники.

Айтмасам йўқдир тоқатим,
Қайрилиб синди қанотинг.
Ўлжа қилган бедов отинг
Ё сеники, ё меники.

Етди менинг оҳи-эорим,
Узи бўлди мададкорим,
Манов турган тилла доринг
Ё сеники, ё меники.

Тўкилди, Хунхор, оҳаринг,
Келди жами аждаҳорим,
Билиб қўй, катта шаҳаринг
Ё сеники, ё меники.

Билмайсан, Хунхор, ўлганинг,
Умрингни ҳазон бўлганинг,
Эгаллаб турган қўрғонинг
Ё сеники, ё меники.

Узи сўрди менинг ҳолим,
Тўколмадинг, Хунхор, қоним,
Шунча йиққан дунё молинг
Ё сеники, ё меники.

Сарғайди менинг дийдорим,
Осмонга чиқар губорим.
Уч юз олтмиш миноринг
Ё сеники, ё меники.

Қоч, раҳминг келса жонингга!
Бўялдинг Хунхор, қонингга,
Кетдинг, аждаҳор дамига,
Бу даври даврон маҳалинг,
Ё сеники, ё меники.

Олардинг мамлакат божин,
Қутулмоққа йўқ иложинг,
Бошингдаги тилла тожинг
Ё сеники, ё меники.

Қочмоққа йўқдир мажолинг,
Етди Хунхоршоҳ ажалинг,
Ҳали сен билмайсан гумроҳ,
Келди устингга дажджолинг.

Шундай деган вақтда Авазхон, Ҳасанхон Гўрўлига
айтиб турган сўзи:

То келганча энди кўрай чўқотим
Синмасин-да, ота, сенинг қанотинг.
Жавоб беринг, энди бу дам Ҳасанга,
Турмоққа қолмади танда тоқатим.

Бугун энди танда жондан кечайин,
Кафаним бўйимга энди бичайин,
Жавоб беринг энди бизга, отажон,
Аваз учун танда жондин кечайин.

Отлар чопди Гуржистоннинг йўлинда,
Миргазаблар турар ўнгу сўлинида,
Жавоб беринг энди бизга отажон.
Ҳали Аваз душманларнинг қўлинда.

Келганимиша сира душман билмайми?
Авазхонга душман ҳужум қилмайми?
Қўл-оёғи боғли, душман қўлинда,
Бундай қилсак, Аваз боланг ўлмайми?

Шунча йўлдан отлар чопиб келдингиш,
Аваз учун шунча жавлон урдингиш,
Бир синамоқ эди Аваз мақсадин,
Синаб, Аваз эрлигини билдингиш.

Энди бас ота, қараб турмоғинг,
Энди беҳроқ бу майдонга кирмоғинг,
Кимга зафар, кимга хатар майдонда,
Энди керак бир олишиб кўрмогинг!

Алқисса, Ҳасанхондан бу сўзни эшитиб, Гўрўғли сulton Гиротнинг жиловини қайтариб, қирқ йигитнинг ўнг тарафига чиқди. Гўрўғли сultonнинг қирқ йигит ва Ҳасанхонга қараб: «Сизлар ҳаммангиз Авазхоннинг устига от қўйинглар, Хунхоршоҳнинг устига бир ўзим бораман,— деб туркmani тил билан «Дўндири!» деб айтиб турган сўзи:

Қараманг баланд-пастига,
Келибсиз душман қастига,
Олмос қиличлар дастинга¹,
Беш бир ёндан, ўн бир ёндан!

Дўндири, Авазхон устига,
Мен ўзим Хунхор устига.
Барингиз тилла² пичоқли,
Қўлингда найза сачоқли,

Уруш қилинглар нечоқли,
Беш бир ёндан, ўн бир ёндан,
Дўндири, Авазхон устига,
Мен ўзим Хунхор устига.

Иш битмайди жондан кечмай,
Сув ўрнига қонни ичмай.

Қирқ кунгача қилинг газо,
Бедовнинг белидан тушмай,
Беш бир ёндан, ўн бир ёндан,
Дўндири, Авазхон устига,
Мен ўзим Хунхор устига.

Ғаним босмасин изингни,
Ҳақланглар берган тузимни!
То танингдан жон чиқмайин,
Кейин қайтармай юзингни,
Беш бир ёндан, ўн бир ёндан,
Дўндири, Авазхон устига,
Мен ўзим Хунхор устига.

Биларсиз уруш бобини,
Ушланг ханжарнинг солини,
Киринг бу душман ёбини¹,
Беш бир ёндан, ўн бир ёндан,
Дўндири, Авазхон устига!
Мен ўзим Хунхор устига.

Килични қиндан тортинглар,
Майдонда жонни сотинглар,
Душман қонига ботинглар,
Беш бир ёндан, ўн бир ёндан,
Дўндири, Авазхон устига,
Мен ўзим Хунхор устига.
Душман кимлигин англасин,
Емон кун бошга солмасин,

¹ Дастингда.

Юракда армон қолмасия,
Беш бир ёндан, ўн бир ёндан,
Дўндири, Аваҳон устига!
Мен ўзим Ҳунхор устига.

Отлар чопинглар майдонда,
Иш қилинг бугун мардона,
Беш бир ёндан, ўн бир ёндан
Дўндири, Аваҳон устига!
Мен ўзим Ҳунхор устига.

Жами бедовни ўйнатинг,
Лочиндай қанот бойлатинг,
Душман қонини қайнатинг,
Беш бир ёндан, ўн бир ёндан,
Дўндири, Аваҳон устига!
Мен ўзим Ҳунхор устига.

Бўлинг Аваҳдан боҳабар,
Жонига бўлсак сабабкор,
Холингдан ўзи хабардор,
Беш бир ёндан, ўн бир ёндан,
Дўндири, Аваҳон устига!
Мен ўзим Ҳунхор устига.

Тушарсиэ душман изина,
Гўрўғли рози тузина,
Оллоҳу акбар, деб султон,
Тортди фотиҳа юзина.

Отларнинг жиловин олди,
Бирдан майдонга от солди,
Тўпин ёзмайин қирқ йигит,
Бирдан дор остина борди.

Оқибди душман кўз ёши,
Олди жаллодларнинг бошин.
Юз қайтармайин от қўиди,
Ҳақлади султоннинг ошин.

Ғуборлар тутди осмонни,
Кўринг, Рустами достонни,

Ариллаб ҳарёна сурар,
Кўринг, Гўрўғли арслонни.

Офтоб юзин тутди чанглар,
Душманга солди туманлар,
Хужум қилиб душманларга,
Дарё бўлди қизил қонлар.

Душманга офатни солди,
Душманнинг бошини олди.
Калламан тана аралаш,
Айқашиб майдонда қолди.

Сочилиб ҳар ён қизил қон,
Ҳунхорга тушди қайғу-ғам.
Мисоли қарчигай қушдай,
Хусусан, энди Ҳасанхон,

Остида Жийронқуш оти,
Шердай бўлиб сиёсати,
Иш кўрсатиб у кун Ҳасан,
Бўлди душманнинг офати.

Бир-бирига қиласар таассуф,
Қилиб бўлмас уни тавсиф.
Қирап душманларнинг қавмин,
Душман ўликларин босиб.

У куни бўлган урушда,
Кетди майдонлар қон сасип,
Султон тахт устине борган,
Тутолмай Ҳунхорни қолган.

Ҳа деганда шоҳ Гўрўғли
Мажнункўк отини олган,
Кўнглида мақсади бўлган,
Отни олиб, кўнгли тўлган.

Аваҳонни олиб қўлга,
Давлати бошига қўнган.

Миниб Мажнункўк белига,
Кириб майдоннинг ерига,

Кирғин солади Авазхон,
Бу дам душманнинг әлига.

Каллалар танадан учиб,
Қийин кун душманга тушиб,
Душман ҳарёна суради,
Кизил қонларини кечиб.

Жиловни қўлга олмайди,
Танга қамчи солмайди,
Иш кўрган жами бедовлар,
Душман қавмин олдайди.

Қўлинда кескири Аваз,
Ўроқидайин қармайди.
Кўриб Авазнинг ишини,
Султонда армон қолмайди.

Әрлигин у дам билдири,
Душман қавмин бўлдири.
Мисоли қарчигай қушдай,
Душманни наизага илдири.

Бариси майдонга тушди,
Ишлатди олмос қиличини,
Ғазо қаттиқ қизғин вақтда,
Ҳасан кўлбар ҳам етишиди.

Ҳасан кўлбар келганини кўрган сўнг
Душманларнинг ҳуши бошидан учди,
Энди қолмас экан бу кун одам деб,
Ҳамма душманлар жонидан кечди.

Ҳасан кўлбар калтакни қўлга олди,
Ҳар тўда келганда, бир калтак солди.
Ҳар бир калтак сермагандан бу кўлбар,
Ўн-ўн беш, йигирмаси душмани қолди.

Бирор яримига иши бўлмайди,
Майда ишга сира кўнгли тўлмайди.
Ҳар бир калтак Ҳасан кўлбар сермаса,
Гўрўғлиниң ишин анча ўнглайди.

Эшагидан тушиб бўлган пиёда,
Ишлар қиласи эди неча хиёла,
Ҳасан кўлбар бу ишини кўрган сўнг,
Душманлар алами бўлди зиёда.

Тўрт қадам қиб соги-сўлни кезади,
Чангалласа қуртдай қилиб эзади,
Ҳасан кўлбар бу ишини кўрганлар,
Жондан умид узиб, юртдан безади.

Нечовларни қўли билан туртади,
Бўри теккан қўйдай душман ҳуркади,
Кўрсатмоқда душманларга кучине,
Чирик бўздай нечовларни йиртади.

Алқисса, бир кечаю кундуз айрилмай уруш бўлди.
Манман деганлар бариси майдонда йиқилди, қонлари тў-
килди. Қолганлар қўргонга қочиб қутулди. Ҳасан кўлбар-
дан сўрасангиз орқага тис бўлиб қалтагини сермайман деб,
орқасидан суриниб йиқилди, тор кўчага тиқилди. Икки
ёғидан икки девор қисиб олди. Жойидан бу туролмай қол-
ди. Қирқ йигит устидан келиб тортиб турғизайн деса,
Ҳасан кўлбар маълум, отнинг устидан олиб қолади. Шу
сабабдан қирқ йигитнинг ҳеч қайсиси бунга дахл қилмай-
ди. Устидан келса ҳам отларини иргитиб ўтиб кетади.
Йиқилгани яхши бўди, деб душманлар ҳам бунга йўла-
майди. Авазхон бир бўлак аскарни суриб элтиб қўргонга
тиқиб, қўлида яланғоч қилич, оч бўридай икки кўзи икки
ёқда чопиб келар әди. Ҳасан кўлбарнинг устидан келиб
қолди.

— Эй, Ҳасан кўлбар,— деди, Ҳасан кўлбар ётган
ерида:

— Отангни мозори, мени Ҳасан кўлбар деганча, жо-
йимдан турғизиб кет-да! — деган сўзини эшитиб, Авазхон
қўлидан тортиб турғизиб кетди. Ҳасан кўлбар калтагини
қўлига олиб душманга иши бўлмай, «аввал бунинг девори-
ни текислаб олмаса, одамга мушайт берар экан» деб қайта
бошдан деворни йиқита бошлади. Тўлаб ботир, ҳа деган-
дан майдондан қочди. Бир-икки белдан ошиб қаёққа ке-
тарини билмай шошиб, «Чамбйлга кетайин деса, боргандан
кеини ўлдиради» деб Ҳасанхондан қўрқади, «майдонга ке-
лайин» деса, душмандан қўрқади. У ёқ-бу ёққа чопиб, бир
кўҳна мозористонни топиб, ўзи мозористоннинг ичига ки-

риб, отининг жиловидан ушлаб, шу ерда ётди. Чўлда душманниң қочганлигини англаб отини миниб солиб чопди. Бир панада қолиб қочиб бораётган тўрт-беш душманни кўриб қолди, отининг жиловидан маҳкам тортиб, қочган душманларнинг изидан солди. Отни сира етгани қўймайди. Уларга бурди жонининг борича отнинг жиловини «Қўйма-чи-қўйма» деб шовқин беради. Шу ҳолда душманлар қочиб бориб қўргонга кирди, дарвозани ёпди. Дарвозанинг пешасини Тўлаб ботир бир чопиб;

— Мана бу Тўлаб ботир,— деб изига қайтди. Қиличини ўлиб қолган душманларнинг қонига бўяб олди. Шу вақтда Гўрўғли султон добил ҷалди. Қирқ йигит ундан-мундан йигилишиб Гўрўғлининг олдига борди. Тўлаб ботир ҳам борди. Ҳар қандай қилиб бўлса-да, душманни қочирдик, деб, турибди. Қирқ йигитни, икки боласини соғу саломат кўриб, Гўрўғли султон кўнгли тошиб бир ёз деб тургани:

Етти йил аввалда гўрида ётдим,
Тиклаб гўрдан чиқиб ҳарёна боқдим,
Чиқиб етти ёшда гўрнинг ичидан,
Ўн тўрт ёшда ўзим элимни топдим.

Саргардон бўп ҳар бир жойларга бордим,
Етимлик савдосин бошимга солдим,
Ўн бешман ўн олти ёшга келганда,
Райхон араб отидан тухум олдим.

Ҳеч ким келмасди тентак деб қошима,
Раҳми қилди ўзи кўзда ёshima,
Йигирма ёшга келганда хон бўлиб,
Давлат қуш айланисиб қўнди бошима.

Ғўононида Фиротимни йўқотдим,
От излаб икки йил саргардон чопдим,
Худойим дуч қилди элсиз чўлларга,
Беш яшар бўлганда отимни топдим.

Бир мўйсафид келди унда сўрашдим,
От устида меники деб талашдим,
Бир гадой деб назаримга илмайин,
Хизр бова билан ўзим курашдим.

Йиқилсан ҳам уч мартаба олишдим
Эрагишиб охир бир жой боришдим.

У ер әкан қирқ чилтоннинг макони,
Қирқ чилтоннинг маконида танишдим.

Кўнгилдан чиқардим алам-ҳасратни,
Дўғасиман чўян қилди жасатни,
Отса ўқ ўтмайди, чопса қилич деб,
Яна менга тила, деди мақсадни.

Қирқ чилтонлар тилаб дуосин олдим,
Қайтадан боз яна Чамбилга бордим.
Фиротимни топиб у кун мингган сўнг,
Душманлар йўлига бошимни солдим.

Ҳақладим мен бошлаб тогам тузини,
Тубан қилиб кетган Райхон юзини,
Олиб кетган эди тогам ёрини,
Бева учун олдим Райхон қизини.

Икки қилмадим мен онам сўзини,
Тўлибой синчи деб отам ўзини,
Иккинчидан талаб қилиб душманга,
Үйдим Темуршоҳнинг икки кўзини.

Кўрдим, неча одам кўрмас шаҳрини,
Душманларни кўп кўрганман заҳрини,
Қўҳиқофман, Эрам бояни оралаб,
Олиб келдим Юнус, Мисқол парини.

Кўрди ишларимни ҳамма ҳалойиқ,
Кай бир ишни сизга баён қилайиқ,
Юнус Мисқол келтирган сўнг Чамбилга,
Султонлик ном бизга бўлди илойиқ.

Алқисса, бу сўзни айтиб Гўрўғли султон қирқ йигитига
яна қанча панд-насиҳатлар қилиб, кўнглига мардоналик бе-
риб, шуйтиб, Ҳунхорга — қўргонига қараб айтиётган сўзи:

Авазхон бўлибди шаҳрингга меҳмон,
Авазни душман деб қилибсан гумон,
Гўрўғлидан қайт деб буни, қийнабсан,
Ана келдим, исмим Гўрўғли султон.

Қулоқ солгин аё, Ҳунхор, сўзима,
Кўринмай қочарсан менинг кўзима,

Қийнагунча Авазхондай ўғлонни,
Ишинг бўлса қилгин, Ҳунхор, ўзима.

Мард бўлсанг майдонда қилич тортарсан,
Орият йўлига жонинг сотарсан.
Душманинг бошининг келиб турганда,
Қочиб қалъя ичра кириб ётарсан.

Аскарингни тўккил, ўнгу сўлимдан!
Қайт дединг, Авазни менинг йўлимдан,
Қиличинг бўйнингга солиб келмасанг,
Қутулмассан қочиб, Ҳунхор, қўлимдан!

Қаҳрлансам дарвозангни бузарман,
Аё, Ҳунхор, сенинг бағринг эзарман,
Қочган билан қутулмассан қўлимдан,
Ахир, Ҳунхор, тандан бошинг узарман.

Дарвозанг олдини олиб ётарман,
Майдон деса, танда жоним сотарман,
Ерга кирсанг қазиб олиб, Ҳунхоршоҳ,
Ҳавога учсанг, оёғингдан тортарман.

Қирқ йигитга доим шароб ичдирган,
Исмимни дер, англа, Гўрўғли султон!
Қирқ йигитга олиб пари қучдирган —
Мен әдим душманга зарбим ўткарган.

Суянгanda мақсадига еткарган,
Қутулмайсан, Ҳунхор, қочиб қўлимдан.
Бугун энди сенга навбат еткарган.

Алқисса, Гўрўғли султондан бу сўзни эшитиб, Ҳунхорнинг жами саркарда вазирлари Ҳунхоршоҳнинг ёнига борди. Ҳунхоршоҳга қараб саркарда, вазирлари:

— Энди бу ётиш билан бўлмайди, ё чиқиб боқинасизда, қутуласиз, ё бўлмаса ўласиз-да қутуласиз. Бу қўргонингизга ихтимот бўлманг. У бир балоси, ҳозир қўргондан ташқарида девор қўймади, ҳаммасини ийқитди. Агар у келса, дарвозадагиларни уради, бузади, ичкарига киради. Бир ўзи кирса ҳам тамом қилиб беради,— деди. Буни ёшитиб Ҳунхоршоҳ қиличини бўйнига солиб келиб:— Энди бўлдик,— деб Гўрўғлига бўйинсиниб таслим бўлди. Гўрўғли

султон қирқ йигити билан Авазхон ва Ҳасанин билан, Тўлаб ботири билан, иззат-икром билан Ҳунхоршоҳ тахтига олиб борди. Гўрўғли султон бориб Ҳунхоршоҳ тахтига тинди. Даркори йўқ ишларни барҳам бериб ва даркор ишларни юргизиб, ўзининг таомили тартибини ҳалойиққа билдириб, қирқ кун подшолик қилиб турди. Қирқ кундан кейин Ҳунхоршоҳнинг ўзини тахтига миндириб, ўз юртини ўзига бериб, ўзига боқиндириб, Ҳунхоршоҳни, ўлганга раҳмат, қолганга саловат, деб Гўрўғли султон қирқ йигит, Авазхон ва яна Авазхоннинг онаси ва синглисини олиб Чамбилга қараб қайтиб кетди. Булдуриқ қассоб Гўрўғли деганда шаҳардан чиқиб қочиб кетган, шу кетганча, ўлмай эсон-омон қолди. Шу билан сўз тамом бўлди.

Қайтиб султон Чамбил йўлига тушди,
Бўлган сўнг мақсади кўп вақти хушди.
Олиб Авазхонни саломат қўлга,
Сарф қилиб майдонда ул қанча кучни.

Чамбил қараб бу йўлга кирди,
Кеча-кундуз тинмай бирдайин юриди,
Аввалдан мард бўлиб туққан онадан,
Ҳар ишки бўлса тақдирдан кўрди.

Биткариб кўнглида ўйлаган ишни,
Мақсадига энди султон етиши.
Қувонишиб завқ билан келади,
Қўлига қўндириб қарчигай қушни.

Сайлаб минган бедовларнинг сарасин,
Топиб Авазхондай суйган боласин,
Иигирма кун кечакундуз жой юриб,
Кўрди Чамбилбелнинг энди қорасин.

Коровуллар қараб турган, қўрибди,
Гўрўғли келди деб хабар берибди,
Хоҳи навкар, хоҳи бекор ҳаммаси,
Евмид халқи пешвоз чиқиб келибди.

Кўриб султон юраклари босилди,
Кизил гулдек ҳамма кўнгли очилди,

Шаънига чалдириб карнаю сурнай,
Бошларидан таига-тилла сочилди.

Териб олмоққа ул танга-тиллани,
Бақувватлар олиб, иочор босилди.
Шу силсила билан қўргонга кирди,
Авазнинг келганин ҳаммаси кўрди.

Олиб борган Хунхоршоқдан кўп дунё,
Чақириб, тарқатиб қаллочга берди,
Сахийлигин Гўрўғлийнинг билади,
Чўлоқ-майиб, камбағаллар келади.

Ҳар қачон тамили¹ шулдир Гўрўғли,
Юнус, Мисқол яна у икки ойим,

Кетишга кўзи қиймай ташлаб жойин,
Кўнгли кашал бўлиб Чамбилбелига,
Хабар олиб турарди унда доим.

Чамбилбелни у ҳар доим кўтарди,
Каптар бўлиб учиб кўкда юарди,
«Қайтиб келдимикан бунда Аваз» деб,
Икки пари хабар олиб турарди.

Аваз кетган вақти улар ҳам кетган,
Юнус, Мисқол ўзин жойига етган,
Авазхоннинг Юнус, Мисқол онаси,
«Сен келсанг, келамиз», деб ваъда этган.

Авазхон учун чекарди кўпвойим,
Хабардор эди икки пари доим.
Кўҳиқофман Эрам-богни оралаб,
Хўб томоша қилдилар юрган жойин.

Чамбиллинг баҳридан ҳаргиз ўтолмас,
У манзилга одамизод етолмас,
«Келдими деб Аваз», хабар олади,
Кўнгил узиб, Чамбилбелдан кетолмас.

Сўймас султон улардан бошқа ёрни,
Икки пари — ёрлиги эътиборли,

¹ Таомили.

Кетган билан Чамбилбелдан иккови,
Айрилмас, султонман ваъдаси борди.

Келмас қийинди(р) уларни топмоқ,
Сўроқлаб йўлинда бедовлар чопмоқ.
«Хотинлар кетди» деб қиласр маломат,
Ақли етмай неча душмани аҳмоқ.

Кетган эди душманларнинг қасдига,
Бехабарди қараб баланд-пастига,
Келгандан сўнг, қайтиб Аваз Чамбилга,
Юнус, Мисқол бу ҳам келди устига.

Гўрўғлийнг доим ҳолига боқди,
Беш-олти кун жонига ўтларни ёқди,
Ваъдаси бўйича келиб парилар,
Ҳам ёрини, ҳам боласини топди.

Кечакундуз ётса, турса ҳаммаси,
Гўрўғлини бундай дуо қилади,
Авазхон келганига тўй бошлади,
Сахий султон харажатдан қочмади.
Шоҳигадо ҳамма бўлиб баробар,
Дастурхонга ширавонлар чошлади.

Меҳмонлар олдига султон келади,
Кўзи билан ўзи келиб кўради,
Бой-бекларга қанча бўлса сулукат,
Гадойларга ундан зиёд беради.

Авазхонни олди, мақсадин топди,
Мой деганлар, гўёки сувдайнин оқди.
Неча кунлар, кечакундуз тўй бериб,
Чавандозлар кўпкарисини чопди.

Созандалар ўқиб турар суханлар,
Кечаси ёқилади шами — анвар,
Хушловоз ўқишиб, ҳам созандалар,
Кулдирган, яъни неччи нагмалар.

Неча кун кечалар тўйни тўйлаб,
Томошага қиз-жувонлар ўйнаб,
Келгандарни кутиб ҳам қирқ йигитлар,
Турарди хизматида белини бойлаб.

Жавоб бўлиб, босилганди ўйини,
Тарқатди Гўрўғли султон тўйини,
Икки бола бирдай туриб олдида,
Кўриб султон қувонади бўйини.

Алқисса, тўй тарқади. Шу билан икки-уч кун орадан ўтди. Гўрўғли султон, Авазнинг ва икки хотинининг разъига қараса, уларнинг ҳеч бир кўнгли очилмайди. Бирордан бир ёмон сўз эшитгандай Авазнинг хаёли қочгандай кўринади. Ахирни бир куни Гўрўғли султон Юнус, Мисқол ёри билан ўтириб:

Эй Юнус, Мисқол, икковинг ҳам севиб олган ёримсан. Шарт айтиб қўйилган ёрликда эътиборимсан,— деди.— Мен ўлиб кетсам, то қиёматгача Чамбидан хабардоримсан,— деди.— Мен Авазхоннинг кўнглини топмадим, сизлар шу Авазхондан бир сўрасангизлар, мақсадининг нима эканлигини айтса. Шунда Юнус пари туриб, Гўрўғлига қараб:

— Хўб бўлади, бизлар Авазхонни чақириб сўраймиз. Юзи очилмаган. ўш бола кўнглида бир сўзи бўлса, сизга айтмоққа уялиб юрган бўлса, ажаб эмас,— деди.

Шу сўзни айтиб турган вақтида Авазхон ўзи келиб қолди. Авазхон келгандан кейин Гўрўғли султон жойидан туриб:

— Авазхон, энди сен икки онанг билан сўйлашгин,— деб туриб кетди. Гўрўғли кетгандан кейин Юнус пари Авазхонга қараб бир сўз деб тургани:

Сен менинг очилган боғда гулимсан,
Сен гўёки менинг жони-дилимсан,
Сен бўлмасанг, келмас эдим Чамбилга,
Қиёматли менинг Аваз улимсан¹.

Ғанимлар босмасин сенинг изингни,
Етти йилдан бери бердим тузимни.
Бир кун мен кўрмасам бўлмас тоқатим,
Софинарман қўёзим, гулдай юзингни.

Кўлимда тарбият қилдим ўзингни,
Билмадим бобингни, сендан қўёзимни,

Нега, Аваз, сира кўнглинг очилмас?
Онам десанг, айтгин, менга сўзингни!

Мақсадингни сенинг Аваз, билайнин,
Талабга еткисин сени худойим,
Нима бўлса айтгин, Аваз, мақсадинг,
Қўлдан келса, мақсадингни қиласин.

Кўнглимдаги сўзинг ҳеч қим билмаса,
Сенинг фикринг бизга тўғри келмаса,
Яширмайин айтгин болам мақсадинг,
Билиб, отанг мақсадингни қиласаса...

Сенинг учун бизлар Чамбил келамиз,
Сен уялсанг, бизлар баён қиласимиз.
Бажо қиломаса, султон мақсадинг,
Сўнгра қилар ишни бизлар биламиз.

Алқисса, буни деб Авазхондан сўдаб, «Болам, нимаики мақсадинг бўлса айтгин, то ўзинг айтмасанг, бирорнинг кўнглидагини бирор билмайди»,— деди. Онасидан бу сўзи ни эшитиб, Авазхон бир сўз деб тургани:

Юрагимда кўпдир ҳали ҳасратим,
Эсга тушса, куяр жони-жасадим,
Келган билан Ҳунхоршоҳдан қутқариб,
Ҳали бўлган йўқди менинг мақсадим.

Бекор ерга чин бедовлар чопилмас,
Ҳеч сабабсиз, эрга носоқ тақилмас.
Қирқ кун тўй берганман келиб Чамбилга,
Аваз кўнгли дунё билан топилмас.

Она, менинг кўйайларим кесилган,
Юрак-бағри Авазхоннинг тешилган.
Бўтакўзининг «қул» деб айтган сўзлари,
То ўлгунча, кетмас, она, эсимдан.

Аҳмад сардорнинг мен кучин билмасам,
Сардор қизин бунда олиб келмасам,
Бўтакўзга айтган сўзим шу ёди,
Қирқ йигитга чилим солгич қилмасам,

¹ Улимсан.

Етти йил ўқидим келиб илимни,
Билдириңгиз мен билмаган билимни,
Яна бу Чамбидан, она, кетарман,
Бұтакүзга солдирмасам чилимни.
Мен кирмасман дўсти душман сўзига,
Сардор қизи, қул, деб айтган ўзимга,
Қирқ йигит-чун мен солдирб чилимни,
Ким эканим кўрсатмасам кўзимга.

Алқисса, Авазхон бу сўзни онасига айтгандан сўнг, онаси энди Авазхоннинг кўнглидаги мақсадини англади.

— Эй, Авазхон! Болам, бу сўзингни отангта айтмоқقا уялсанг, биз айтамиз,— деди. Шу билан Авазхоннинг кўнглини қутариб, димогини чоғлаб, унинг мақсадини қиласа ҳам, қилгандай бўлиб, яхши сўз билан жўнатди.

Гўрўғли султон қайтиб ўрдага келди. Юнус, Мисқолнинг олдига келиб ўтириб?

— Авазхондан не мақсади борлигини сўрадингларми?— деди. Икки пари:

— Сўрадик. Авазхон кўнглидаги муддаосини айтди. Бу қилган тўй-тамошаларингиз, Хунхоршоҳнинг қўлидан Авазхонни бўшатиб олиб келганингиз, бариси бекор. Авазхонга сардорнинг қизини келтириб берсангиз, нима ишга лозим кўрса, Авазнинг ихтиёрини ўзига берсангиз, сўнгра Авазхон бу Чамбил белингизда юрар экан. Бўлмаса, Гуржистон ёки бошқа бир юртга ҳали ҳам бўлса кетар экан,— деди. Гўрўғли султон буни эшитиб, ўйланиб туриб, Юнус билан Мисқолга айтди:

— Ундей бўлса, Аҳмад сардорга совчи юборсак, Аҳмад сардор қизини бермайди. Бермаган сўнг, бир-биримизга кўнглимиз тўғри келмайди. Аҳмад сардор сўзга қулоқ солмайди, ўчакишиб менинг сўзимни қабул қилмайди. Одам юбориб Аҳмад сардорни шу ерга чақирамиз,— деди. Аҳмад сардорни бир гапни баҳона қилиб зиндонга соламиз, сўнгра Бўтакўз ойимни олиб келамиз. Авазхон Бўтакўзни олмайди. Қирқ йигитнинг қўлига берамиз. Бўтакўз қирқ кунгача қирқ йигитта чилим солиб хизмат қилади. Шу билан Авазнинг айтган шарти битади. Бўтакўзийм хизмат қилганда кимга қилади? Қирқ йигитнинг бири оғаси бўлса бири тоғаси ва бири жияни бўлса, бири амакиси ва ўзининг оғалари, тоғаларига хизмат қилади. Сўнг Аҳмад сардорни зиндондан чиқариб оламиз, яна ҳам кўнглидан чиқариб хотиржам бўламиз,— деб шу маслаҳат би-

лан Гўрўғли султон Аҳмад сардорга одам юборди. Аҳмад сардорни Гўрўғли султон чақириб олди. Аҳмад сардор келгандан кейин, Гўрўғли кетди. Шу кетгандан сўнг Гўрўғли келмайди дебсан, Чамбил тахти бизники бўлади дебсан деб қаердаги бўлмагур сўзларни айтиб, туҳматни Аҳмад сардорнинг бўйнига тақиб уни зиндонга солди. Шу билан қирқ йигит ва Ҳасанхонга буюриб, бориб Аҳмад сардорнинг қизи Бўтакўзойимни отга миндириб олиб келди, қирқ йигитни қўлига берди. Қирқ кунгача қирқ йигитга чилим солиб берса, кечаси Юнус билан Мисқолни олдига бориб ётиб, қирқ кунни ўтказди. Шу билан Бўтакўзойим Авазхоннинг ким эканини билди. Иккинчи ундей сўз айтмасликка Бўтакўзойим тавба қилди. Аҳмад сардорни ҳам зиндондан чиқариб олиб келди. Утган сўзларни бир-бирисига гинаи гузорини айтиб яна қайта бошдан тоға-жиян ярашиб, шу билан муроди-мақсадига етди:

Айтаман деб Авазхонга сакта сўз,
Тарафкашлик қиламиз, деди, ўз-ўз.
Поёни бўлган сўнг келиб Чамбильга,
Авазхонни энди билди Бўтакўз.
Бу сўзлар бўлгани бари аниқди,
Ботирлиги, Аваз, элдан голибди,
Кетирган сўнг Бўтакўзни Чамбильга,
Кўз очилиб энди ҳамма танибди.
Эргашиб яна сардор қизиман,
Тенглигини ундан Аваз олибди.
Англамайин ким эканин Авазнинг,
Бўтакўз армони ичиди қолибди.
Ҳар қаерга етса, Аваз қадами,
Душманларга қора кунлар солибди.
Гўрўғлидан Мажнункўқдай от олди.
Обод қилиб Чамбильбелдай маконни.
Сўнгра бориб Аваз ботир атанди.
Кирмайин Хунхорнинг айтган сўзига,
Оғмачилик эп кўрмади ўзига.
Хоҳлаган сўнг Гўрўғли отин миндириди,
Қўл деб аввал ҳамма халқни кулдириди.
Ошиқмай, шошмайин у кун Авазхон,
Ким эканин ўзин халқа билдириди.
Ботирлиқда бундан одам ўтолмас,
Кўрган одам суҳбатидан кетолмас,
Ҳуснин кўрганлар шошар ақлидан.

Таърифини айтиб одам етолмас.
Бир умрга битса шоир таърифин,
Юздан бирин онинг баён этолмас,
Ишларига эшитганлар қойилди,
Донишманлар сўз маънисин айрди.
Бу йўл билан айтиб ўтган Авазни
Қорақалпоқда Ҳолмуроддай шоирди.
Ҳолмурод бахшидан бу йўл қолганди,
Чанкут бахши ундан таълим олганди.
Гўрўғли, Авазхон айтиб тайрифин.
Доим кўпнинг ўртасига солганди.
Авазхонни бошқалар ҳам айтади,
Кўписининг айтган сўзи ёлғонди.
Сабаби шул кўпи устод кўрмаган,
Шуйтиб айт деб, устод таълим бермаган.
Оти Аваз бўлган билан сўзининг
Кўп сўzlари монандига келмаган.
Чанкутнинг шогирди Қурбон шоирнинг
Овозаси кўп жойларга ғийиди.
Қозоқ, қорақалпоқ, туркмән, ўзбек,
Яна тоҷиклар ҳам унга қойилди.
Нурота райони туғилган жойим,
Шоирликка бўлди ёшликтан раъйим,
Бошқа ишдан буни мен кўп суярдим,
Шоирликни кўриб ўзимга қойим¹.
Ихлос қилиб юрар әдим ёшимдан,
Камбағаллик, меҳнат кетмай бошимдан,
Қурбон шоир айтганини кўрганда,
Тонг отганча кетмас әдим қошиндан.
Бу достонлар неча айтиб ўтилган,
Кўп айтиб улар машқига етилган.
Тинглаганман Қурбон шоир сўзини,
Айтган сўzlари кўнглима битилган.
Биз айтамиз неча турли достонни.
Бу достонлар бизга бори бўstonни.
Эшитганлар кўнглин ботир қилмоқقا
Мақтаймиз Алпомиш, Гўрўғли арслонни.
Мақсадимиз, улар отин билмоқдир,
Мақсадимиз, завқи сафо, кулмоқдир.
Айтиб бурунги ботирлар исмини,
Совет гражданин ботир қилмоқдир.

¹ Муносиб, маъқул.